

Kuyantika 1

Yobi

Kuyantika 2

Kuyantika 3

Kuyantika 4

Kuyantika 5

Kubasika-Levi

Kutanga-Kulonga

Yozue

Bazuzi-Ruti

1 Samuele, Bankunga

2 Samuele, 1 Bansangu

1 Bantotila

Luzingu ya Salomo

(1 Bantotila, 2 Bansangu,
Bingana, Longi, Kitoko)

Kimfumu ya Kukabana

2 Bantotila, 2 Bansangu

Photo: www.freebibleimages.org/MoodyPublishers Matondo!

KIMFUMU YA KUKABANA

(1 & 2 Bantotila, 2 Bansangu
Yonasi, Ozea ti Amosi)

(Baleso 24 sambu na bana
ti bajeune)

Musoniki: *Mama Lorella Rouster.* —
Edition 2025



Le Projet MWINDA—Ministères pour Chaque Enfant
Merci à www.freebibleimages.com/SweetPublishing sambu na dessin.

www.ecodimafrique.com

KIMFUMU YA KUKABANA**Dititi****Leso 1. Mawa na Yeroboami, yina twadisaka Israele kusamba biteki.**

1 Bantotila 12 :25 -13 :33, 14.....3

Leso 2. Roboami (Yuda-S) mpi fulusaka ntoto na biteki. Yo yina Nzambi yantikaka kupesa Kimfumu ya Yuda mpi ndola.

2 Bansangu 11 -12, 1 Bantotila 14 :21-31, 15 :1-8.....8

Leso 3. Abiya (S-Y) bingaka Nzambi na ntangu ya mvita, kansi sambaka biteki na luzingu ya konso lumbu.

2 Bansangu 13, 1 Bantotila 15 :1-8.....11

Leso 4. Bamfumu ya mbi na Israele (N-I) natila bantu na bo kaka mawa.

1 Bantotila 15 :25-16 :28 (Luyalu ya Nadabi, Basha, Zimri, Omri, ti Akabi).....14

Leso 5. Elia tesaka baprofete ya luvunu kusonga nani Nzambi ya kieleka.

1 Bantotila 18 :17-40.....17

Leso 6. Nzambi tindaka mvula na ndinga ya Elia.

1 Bantotila 18 :41-46.....20

Leso 7. Yezebele sosaka kufwa Elia, kansi Nzambi bumbaka yandi.

1 Bantotila 19 :1-1823

Leso 8. Elia bingaka Elisa kuvanda profete.

1 Bantotila 19 :19-21.....26

Leso 9. Akabi yumaka ntimba na kilanga ya Naboti.

1 Bantotila 21 :1-24.....29

Leso 10. Baprofete ya luvunu pesaka bamfumu conseye ya luvunu.

1 Bantotila 22 :1-28.....32

Leso 11. Basoda ya Mfumu Yozafati nungaka mvita na bankunga ya kumisa Nzambi.

2 Bansangu 20 :1-30.....35

Leso 12. Mfumu ya Yuda Yozafati tindaka balongi ya ndinga ya Nzambi, kansi bantu waka ve.

1 Bantotila 22 :41-50, 2 Bansangu 17, 19, 20.....38

Leso 13. Nzambi bakaka Elia na zulu na pusupusu ya tiya. Ebuna Elisa yingaka Elia bonso profeti.

2 Bantotila 2 :1-25.....41

Leso 14. Elisa sadisaka mufwidi ya kinzambi kubaka mafuta.

2 Bantotila 4 :1-7.....44

Leso 15. Elisa belulaka Namani, kapita ya basoda ya Syrie, ya maladi ya lepre. 2 Bantotila 5 :1-14.....47**Leso 16. Armee ya bawanzio ziungaka armee ya Israele.**

2 Bantotila 6 :8-33.....50

Leso 17. Mwana ya bamvula 7 kumaka mfumu ti yalaka mbote, sambu yandi wilaka malongi ya Nzambi.

2 Bantotila 11 :1-20, 12 :1-3.....53

Leso 18. Yoashi yidikaka Nzo-Nzambi.

2 Bansangu 24 :1-14.....56

Leso 19. Yoakazi bingaka Nzambi na ntangu ya mpasi kansi vilaka Yandi na nima.

2 Bantotila 13 :1-13, 14 :24.....60

Leso 20. Israele ti Mbeni na Bo Nineve, Nzambi wilaka yonso zole mawa na ndinga ya profete Yonasi.

2 Bantotila 14 :23-29 , Mukanda ya Yonasi.....63

Leso 21. Lulendo bebisaka luyalu ya mbote ya Oziasi.

2 Bansangu 26.....66

Leso 22. Na Israele, baprofete bingaka bamfumu kuvutuka na Nzambi, kansi bo landaka kaka mbi.

2 Bantotila 15 :8-31, Mikanda ya Ozea ti Amosi.....69

Leso 23. Kimfumu ya Israele zwaka ndola ti Nzambi panzaka bo. Ozea mfumu ya nsuka na bo.

2 Bantotila 17 :1-23.....73

Leso 24. Revisio.....76**Mikanda ya Bible-Bangindu ya Kulonga Yo.....78****Bankunga sambu na Baleso Yai.....79****Linya ya Ntangu sambu na revisio83**

Yai me pesa beto nswa kusadila bafoto na bo. Merci mingi! www.freebibleimages.org/ Sweet Publishing, Arabs for Christ, Didier Martin, Richard Gunther, Moody Publishing

Baverse yonso ya Bible kele ya Version Mwindi sambu na bana.

KIMFUMU YA KUKABANA

Moniteur, atasio ! Na baleso yai, kimfumu ya Israele me kabana. Ebuna beto ke landa bamfumu ya bimfumu zole mbala mosi. Bazina ya bamfumu kele mingi. Yo yina, na nima ya zina ya mfumu beto me yika (N-I) kana yandi vandaka mfumu na nordee, kimfumu ya Israele. Beto me yika (S-Y) kana yandi vandaka mfumu na sudee, kimfumu ya Yuda. Bambuka nde bimfumu yai zole yantikaka bonso kimfumu mosi—Kimfumu ya Israele. Bantu ya bimfumu yai vandaka bampangi. Kansi na nima ya Mfumu Salomo, bo wakanaka diaka ve. Mawa ming. Bo kabanaka.

**Bambuka ! (N-I) =Nordee, Israele
(S-Y) =Sudee, Yuda**

Leso 1. Mawa na Yeroboami, yina twadisaka Israele kusamba biteki.

1 Bantotila 12 :25 -13 :33, 14

I. PREPARASIO SAMBU NA MONITEUR--



Kuyidika na ntwala :

Tala karte geografika bonso yai na nsuka ya lesa yai. Nge ta sadila yo mbala mingi na baleso yai.

🕒 Kikuma ya Leso :

Bana ta landa Yesu kaka na munoko ve, kansi na kulemfuka na ndinga na Yandi.

♥ Verse ya Kulonguka :

Luka 6 :46 (Yesu nde:) « Sambu na nki beno ke binga Mono : 'Mfumu, Mfumu,' kansi beno ke sala ve mambu ya Mono ke tubila beno ?' »

👤 Bankunga ya kwenda nzila mosi ti lesa :

Kana Beno Ke Zolaka Mono

Ee, Mfumu, Ee

[Moniteur, tala bandinga ya bankunga yonso kele na nsuka ya mukanda yai.]

II. REVISIO--

👤 Kuyindula diaka baleso me luta :

Na ntangu ya Mfumu Salomo, kimfumu ya Israele vandaka nene. Kansi na nima ya mwana na yandi Roboami kumaka mfumu, nki salamaka na kimfumu ?

(Yo kabanaka, sambu Roboami waka ve conseye ya mbote. Yandi landaka conseye ya banduku na yandi.)

Ntangu yai, beto ke landa bimbumu yina zole. Kimfumu na nordee parti ya ntoto, bo bingaka yo Israele. Beno ta bambuka nde Yeroboami kumaka mfumu ya ntete na yo. (Moniteur, songa yo na karte geografika, p. 7)

Kimfumu na sudee parti ya ntoto, bo bingaka yo Yuda. Mwana ya Salomo, Roboami, vandaka

mfumu ya ntete na yo. (Songa yo mpi na karte geografika, p. 7)

III. KULONGA LESO YAI--

➔ Kuyantika :

Bamfumu vandaka zole—Roboami, na ntoto ya Yuda na sudee, ti Yeroboami, na nsi ya Israele na nordee. Yonso zole tubaka nde bo zolaka Nzambi ti sambaka Yandi. Keti bisambu na bo vandaka ya kieleka ? Keti bisambu na BETO kele ya kieleka ? Yai kele mambu ya beto ta yindula bubuyai.

🏠 Malongi ya nene ya lesa yai (developpement) na banti ya malongi 4 :

1.1 Yeroboami tungaka biteki zole sambu bantu zola diaka ve kukwenda kusamba na Yeruzalemi.

📖 Tangila bana : 1 Bantotila 12 :25-28

25-27 Ntotila Yeroboami ...yindulaka nde :
«...Kana bantu na mono fweti kwenda tii na Yeruzalemi sambu na kupesa makabu na nzo ya Mfumu Nzambi, bo ta yantika zola diaka ntotila na bo...bo ta fwa mono...»

28 ...Yandi salaka biteki ya bangombe zole ya wolo. Yandi songaka bantu ya Israele nde :
« Beno vandaka kukwenda mbala na mbala na Yeruzalemi na kusamba. Imene ntangu yai ! Bantu ya Israele, tala banzambi na beno ya basisaka beno na nsi ya Ezipte ! »

❓ Yula bana bakestio.

🏠 Bana sala bageste.

👤 Bana yimba ti kina.

1.2 Yeroboami yidikaka bisambu ndambu ya Nzambi ti ndambu ya biteki, na mpila yandi mosi monaka mbote.

📖 Tangila bana : 1 Bantotila 12 :30-33

30 Mpidina yandi bendaka bantu kusala masumu...

31 Yeroboami yidikaka mpi bisika ya kusamba na zulu ya bangumba...kusambila banzambi ya biteki. Yandi solaka mpi banganga Nzambi ya bantu ya vandaka ya dikanda ya Levi ve,

mutindu Nzambi me tuba.

32-33 Yandi tulaka mpi kilumbu ya nkinsi sambu na bantu yonso ya Israele, bonso Nkinsi ya bo vandaka kusala na Yeruzalemi.

? Yula bana bakestio.

🏠 Bana sala bageste.

👑 Bana yimba ti kina.

1.3 Profete ya Nzambi songaka Yeroboami mpasi ya ta landa nzila yandi me sola, kansi yandi landaka kaka nzila na yandi ya mbi.



Tangila bana : 1 Bantotila 13 :1-6, 33-34

1 Mfumu Nzambi songaka profete mosi ya Yuda kukwenda na Betele. Yandi kumaka kuna ntangu Yeroboami vandaka kutelama na ntuala ya mesa-kimenga kupesa makabu.

2 Yandi singaka mesa-kimenga mutindu Mfumu Nzambi songaka yandi...

4 Ntangu Yeroboami waka mutindu muntu ya Nzambi singaka mesa-kimenga, yandi songaka musapi ti tubaka nde : « Kanga muntu yina ! » Na mbala mosi diboko ya ntotila yumaka. Mpila ya kuvutula yo vandaka ve.

5 Na mbala mosi mpi, mesa-kimenga kubwaka. Putulu ya vandaka na zulu na yo losanaka, kaka mutindu profete tubaka...

6 Ntotila Yeroboami tubaka na profete nde : “Pardo, samba Mfumu Nzambi...Yandi belula diboko na mono. » Profete sambaka...Nzambi. Ebuna diboko ya ntotila belukaka.

33-34 Ntotila Yeroboami bikaka ve bikalulu na yandi ya mbi...

? Yula bana bakestio.

🏠 Bana sala bageste.

👑 Bana yimba ti kina.

1.4 Nzambi pesaka Yeroboami ndola ya ngolo, kansi Yeroboami landaka nzila na yandi ya mbi kaka. Yandi twadisaka Israele na mbi tii na lufwa na yandi.



Tangila bana : 1 Bantotila 14 :1-18

1-2 Na ntangu yo yina ...mwana ya ntotila Yeroboami belaka ngolo. Yeroboami tubaka

na nkento na yandi nde : “...bumba ilungi na nge na mpila nde bo zaba ve nde nge kele nkento na mono. Kwenda na ...kisika profete Ahiya kele...

3-4 ...Yula yandi nki mambu ta bwila mwana na beto...» Nkento ...kwendaka ...na nzo ya profete Ahiya. Ahiya vandaka me kuma mununu, meso me fwa.

5 Kansi Mfumu Nzambi songaka yandi na ntuala nde : “Nkento ya Yeroboami ke kwisa ...Ebuna...Nzambi songaka Ahiya nki yandi fweti tubila yandi.

6 Mpidina, ntangu Ahiya waka ...muntu vandaka kukwisa kukota na nzo. Yandi nde : “Kota, nkento ya Yeroboami ! Sambu na nki nge ke kusa nde nge kele muntu ya nkaka ? ...

7-9 Kwenda kusonga YeroboamiNge me sala mbi ya nene... Nge me buya Nzambi....na kusala biteki...

10-12 Yo yina, Nzambi ta kotisa fami na nge na mpasi... Mwana na nge mpi ta fwa.

14-16 Mfumu Nzambi ta tula ntotila ya nkaka ...ta pesa Israele ndola....ta panza bo ...sambu Yeroboami salaka masumu. Yandi bendaka mpi bantu ya Israele kusala masumu. »

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Nzambi ndimaka ve bisambu ya Yeroboami sambu yandi landaka ve ndinga ya Nzambi tubaka. Ata yandi tulaka zina ya Nzambi na kati na yo, ya kieleka yandi landaka mabanza na yandi mosi kaka.

Bisambu ya Nzambi ke ndimaka kele ve yina ya munoko kaka. Yo kele bisambu ya muntu ya ke landa ndinga na Yandi.

♥ Verse ya Kulonguka :

Moniteur, yula bana nki mutindu Yeroboami vandaka muntu ya tubaka ‘Mfumu, Mfumu,’ kansi landaka ve ndinga na Yandi.

Bana tuba verse mbala 2 fraze na fraze na nima na

nge. Na nima, bo tuba yo mbala zole na bageste. Kumanisa, bo tula ton ti ritima ti yimba yo mbala zole na kukina.

Bankunga ya kwenda nzila mosi ti leso :

Yimba nkunga mosi ya ke kwenda nzila mosi na leso.

Devoir sambu na bakristo :

Devoir mono ke pesa beno bakristo bubuyai, yo yai : Tula ngolo mposo yai kulanda Yesu Kristo kaka na munoko ve, kansi na ntima yonso ti na kieleka yonso.

Invitation sambu na bo ya me yamba Yesu ntete ve :

Kana nge zaba ntete ve nde nge me zenga kulanda Yesu Kristo, zaba nde, kana Mpeve ya Nzambi ke bula na ntima na nge, nge lenda balula ntima bubu yai. Kana nge ke na mawa sambu na masumu ya nge me sala, zaba nde Nzambi zola kulolula nge


kana nge ta ndima yo na ntwala na Yandi. Yesu kele Mwana ya Nzambi ya me bika nzo ya kitoko na Yandi na zulu, me kulumuka awa na nsi-ntoto sambu na kugulusa konso muntu yina ta kwikila Yandi. Keti nge ta binga zina na yandi bubuyai ?

Bana, nki muntu lenda sala kana yandi zola ndima Yesu, ti yandi ke sosa beto kutendula yo kuluta to kusamba ti yandi ? (Ee, yandi bikala awa na bakiti yai na nima ya ecodim. Na kiese yonso, beto ta kwisa kusadisa yandi. Kwisa bubu kana Nzambi ke benda nge.)

Kana ntangu lunga : Longa mikanda ya Bible

 Kana ntangu lunga, longa ndambu ya mikanda ya Bible. Bangindu ke monika na nsuka ya mukanda.


==NSUKA YA LESO 1



Kimfumu ya Israele kabanaka. Yo kumaka bimfumu zole—Israele na nordee ti Yuda na sudee. Mfumu ya ntete ya Israele na nordee, Yeroboami. Mfumu ya ntete ya Yuda na sudee, Roboami, mwana ya Salomo. Kansi bantu ya bimfumu yai zole, bo yonso vandaka bampangi.

Leso 1

Luka 6 :46 (Yesu nde:)



« Sambu
na nki
beno ke
binga
Mono :

‘Mfumu, Mfumu,’

kansi beno ke **sala ve**
mambu ya Mono ke tubila
beno ? »

Leso 2. Roboami (Yuda-S) mpi fulusaka ntoto na biteki. Yo yina Nzambi yantikaka kupesa Kimfumu ya Yuda mpi ndola.

2 Bansangu 11-12, 1 Bantotila 14 :21-31, 15 :1-8

I. PREPARASIO SAMBU NA MONITEUR--

🕒 Kikuma ya Leso :

Nzambi ke ndima nde beto samba Yandi kaka. Yo yina, bana ta kudipesa kusamba ti kulanda Mfumu Nzambi.

♥ Verse ya Kulonguka :

Kansi Roboami salaka mbi sambu yandi kudipesaka ve kuzaba luzolo ya Mfumu Nzambi.

2 Bansangu 12 :14

🗨️ Bankunga ya kwenda nzila mosi ti leso :

Kana Beno Ke Zolaka Mono
Ee, Mfumu Ee

II. REVISIO--

📌 Kuyindula diaka baleso me luta :

Beto ke landa histoire ya bantu ya Israele na kati ya ntoto ya Nzambi pesaka bo. Histoire na bo kele mfunu, sambu Nzambi solaka bo kusonika ndinga na Yandi--Bible na Kuwakana ya Ntama, mpi kupesa beto Mvulusi Yesu Kristo.

Beto me mona nde na nima ya Mfumu Salomo, kimfumu kabanaka. Batribu kumi na nordee parti ya ntoto, bo bingaka Israele. Mfumu na bo Yeroboami. Yandi tulaka biteki ti bendaka bantu kusamba yo. Nzambi vandaka na yandi makasi. Yo yina Yandi zengaka nde Yandi ta manisa dikanda ya Yeroboami.

III. KULONGA LESO YAI--

➡ Kuyantika :

Ntangu yai, beto kuma na sudee parti ya ntoto. Batribu zole landaka mwana ya Salomo, Roboami. Tribu ya nene ya landaka yandi, Yuda. Yo yina, bo bingaka kimfumu yina, Kimfumu ya Yuda. Tribe ya fioti Benyamini landaka yandi mpi.

Keti bantu ya Yuda ta sala kuluta mbote ti bampangi na bo na Kimfumu ya Israele ? Ketu Roboami ta sala na mpila ya ta pesa Nzambi kiese ? Beto ta mona na leso yai.

🏠 Malongi ya nene ya leso yai (developpement) na banti ya malongi 4 :

2.1 Roboami (S-Y) zolaka kunwana na bampangi na kimfumu ya Israele sambu kimfumu yonso vutuka na yandi. Kansi profete ya Nzambi songaka yandi kusala yo ve, ti Roboami waka conseye na yandi.

📖 Tangila bana : 2 Bansangu 11 :1-4

1 ...Roboami...bakaka bantu 180,000...yandi tindaka bo kukwenda kunwana ti makanda ya Israele ya nordee, sambu na kuvutula kimfumu na yandi...

2-3 Kansi Mfumu Nzambi songaka profete Shemaya kusonga Roboami... ti bantu yonso... nde :

4 « Mono Mfumu Nzambi ke tuba nde, beno kwenda ve kunwana ti bampangi na beno Israele. Beno vutuka na babwala na beno, sambu mambu ya me bwa, Mono mosi me sala yo. » Bo yonso landaka ndinga ya Mfumu Nzambi ti vutukaka na babwala na bo.

❓ Yula bana bakestio.

🏠 Bana sala bageste.

🗨️ Bana yimba ti kina.

2.2 Yeroboami (N-I) katulaka banganga-Nzambi na kimfumu na yandi. Yo yina, bo kwendaka na Yuda (S-Y). Bamvula tatu, banganga pesaka bantu ngolo kulanda Nzambi.

📖 Tangila bana : 2 Bansangu 11 :13

13-14 Banganga-Nzambi...katukaka na ntoto yonso ya Israele ti kwisaka na Roboami na ntoto ya Yuda sambu Yeroboami ti bana na yandi kangaka bo nzila kusala kisalu na bo ya kinganga na ntoto ya Israele.

15 Yeroboami yandi mosi solaka bantu kuvanda banganga ya banzambi ya luvunu...

? Yula bana bakestio.

🏠 Bana sala bageste.

👤 Bana yimba ti kina.

2.3 Na nima Roboami kumaka ngolo, yandi landaka Nzambi diaka ve. Yuda yonso landaka mbandu na yandi.

📖 Tangila bana : 2 Bansangu 12 :1

12 :1 Ntangu Roboami kumisaka kimfumu na yandi ngolo imene, bo bikisaka kulanda bansiku ya Mfumu Nzambi.

? Yula bana bakestio.

🏠 Bana sala bageste.

👤 Bana yimba ti kina.

2.4 Nzambi pesaka bo ndola na maboko ya Shishaki, Mfumu ya Ezipte, yina yibaka bo. Kansi bo kudikulumusaka, yo yina Nzambi kangaka Shisaki nzila kubebisa bo. Bo kumaka kaka bampika na yandi.

📖 Tangila bana : 2 Bansangu 12 :2-5, 9, 10, 12

2-3 ...Shishaki ntotila ya Ezipte kwisaka kunwanisa Yeruzalemi sambu bantu ya Yuda salaka mubulu na Mfumu Nzambi. Shishaki kwisaka na bapusupusu ... ti basoda mingi...

5 Ntangu yina, profete Shemaya kwisaka kukuta Roboami ti bambuta ya Yuda... Yandi nde : « Mfumu Nzambi me tuba nde beno me bikisa Mono. Yo yina Mono mpi me buya beno, me pesa beno na maboko ya Shishaki.”

9 Shishaki nwanisaka Yeruzalemi. Yandi bakaka kimvwama yonso ya Nzo-Nzambi ti ya nzo ya kimfumu....

12 Bu Roboami kudikulumusaka, Mfumu Nzambi wilaka yandi makasi diaka ve. Yandi fwaka yandi ve kimakulu..

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Roboami salaka mbi sambu yandi kudipesaka ve kulanda nzila ya Nzambi. Ntangu ya nkaka, yandi

landaka Nzambi. Ntangu ya nkaka, yandi landaka ve. O, Nzambi zola beto kudipesa ntangu yonso kulanda Yesu !

♥ Verse ya Kulonguka :

Bana tuba verse fraz na fraz na nima na nge. Na nima, lomba mwana mosi kutendula nki yo tuba. Na nima, bana ya bamvula 8+ tuba yo, bana ya bamvula 6-7, ti na nsuka bana ya bamvula tii na 5. Kutula ritima sambu bo yonso tuba yo mbala ya nsuka.

👤 Bankunga ya kwenda nzila mosi ti leso

Bana yimba nkunga mosi ya kwenda nzila mosi ti leso.

👤 Devoir sambu na bakristo :

Devoir mono ke pesa beno bakristo, yo yai : Na mposo yai, yindula mbote konso lumbu. Ketu nge kele kudipesa kulanda Yesu ? Landa kusala mutindu Nzambi ta songa nge.

✝ Invitation sambu na bo ya me yamba Yesu ntete ve :


Nge lenda kudipesa na Yesu kaka na nima nge me zaba Yandi bonso Mvulusi ti Mfumu na nge. Yandi me fwa na zulu ya kulunsi ti Yandi me telama na lufwa. Yonso sambu na nge. Yo ke bikala mvutu na nge. Ketu nge ta yamba Yandi na maboko zole ?

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda ya Bible. Bangindu ke monika na nsuka ya mukanda.

==NSUKA YA LESO 2

Leso 2



***Roboami salaka mbi
sambu yandi kudipesaka
ve kuzaba luzolo ya
Mfumu Nzambi.
2 Bansangu 12 :14***

Leso 3. Abiya (S-Y) bingaka Nzambi na ntangu ya mvita, kansi sambaka biteki na luzingu ya konso lumbu.

2 Bansangu 13, 1 Bantotila 15 :1-8

I. PREPARASIO SAMBU NA MONITEUR-

🎯 Kikuma ya Leso :

Bana ta sosa lusadisu ya Nzambi ntangu yonso—na ntangu ya mpasi ti konso lumbu.

♥ Verse ya Kulonguka :

Bingana 3 :6 Yindula Mfumu Nzambi na mambu yonso ya nge ke salaka. Yandi ta songa nge nzila ya mbote.

🗣️ Bankunga ya Kwenda Nzila Mosi ti Leso :

Kilumbu Yai
Konso Lumbu Kiese Kele
Ee, Mfumu, Ee !

II. REVISIO

👤 Kuyindula diaka baleso me luta :

Beto me mona nde mwana ya Mfumu Salomo, Roboami, yalaka na Yuda na ndambu ya sudee.
Beto me mona nde yandi landaka Nzambi ve.
Yandi fulusaka ntoto na biteki. Yo yina,
Nzambi pesaka Mfumu ya Ezipte mpila kukwisa kunwanisa yandi.

III. KULONGA LESO YAI

➡ Kuyantika :

Bantu ya nkaka yindula nde kana bo kwisa na bisambu na nzo-Nzambi, Nzambi ta vanda na kiese na bo. Yo yindula nde, mambu ve nki mutindu bo zinga na kintete ti na kizole, ti na kitatu. Bubuyai beto ta mona mwana ya Roboami, zina ya Abiya. Yandi yantikaka na mpila mosi ya mbote. Kansi nki landaka na nima ?

🏠 Malongi ya nene ya leso yai (developpement) na banti ya malongi 4 :

3.1 Abiya (S-Y) yingaka tata na yandi Roboami (S-Y). Abiya vandaka kunwana bitumba ti Yeroboam (N-I).

📖 Tangila bana : 1 Bansangu 13 :1-2a

1-2 Ntangu Yeroboami lungisaka bamvula 18 na kimfumu na yandi na Israele, Abiya kumaka ntotila ya Yuda. Yandi yalaka bamvula 3 na Yeruzalemi...

? Yula bana bakestio.

🏠 Bana sala bageste.

🗣️ Bana yimba ti kina.

3.2 Abiya tulaka ntima na Nzambi sambu na kunungisa Israele na bitumba.

📖 Tangila bana : 1 Bansangu 13 :2c-12

2c,4 Abiya ti Yeroboami nwanaka bitumba. Abiya kwendaka kutelama na zulu ya ngumba.... Yandi tubaka na Yeroboami ...nde : “Beno wa mono !

5 Keti beno me zaba ve nde Mfumu Nzambi... wakanaka kuwakana mosi ya kukonda nsuka na Davidi...? Kuwakana yai, muntu lenda kufwa yo ve.

8-9 Ebuna ntangu yai, beno ke zola kubuya kimfumu ya Mfumu Nzambi... Beno me kwisa na basoda mingi, beno mpi ke na biteki ya ngombe ya wolo...beno me sala banganga ya beno mosi...ya banzambi ya luvunu.

10 “Kansi beto, Mfumu Nzambi kele Nzambi na beto. Beto me buya Yandi ve....

12 Nzambi Yandi mosi kele na beto. Banganga-Nzambi na Yandi mpi kele awa... Bo ke zola kubula mpungi na kusonga nde, beno ti beto, bitumba kele. Beno...kunwana ve na Mfumu Nzambi, Nzambi.... Beno ta nunga ve !”

? Yula bana bakestio.

🏠 Bana sala bageste.

🗣️ Bana yimba ti kina.

3.3 Nzambi nungisaka Abiya na bitumba. Bantu ya Israele tinaka.

📖 Tangila bana : 2 Bansangu 13 :13-21a

14 Ntangu bantu ya Yuda balulaka ti kutala mpidiyai, bo monaka nde basoda ya Israele me ziunga bo. Bo didilaka Mfumu Nzambi sambu

Yandi kusadisa bo. *Ntangu banganga-Nzambi bulaka mpungi,*

15-17 basoda ya Yuda tulaka milolo ya bitumba, ebuna...Nzambi salaka na mpila nde...bantu ya Israele tinaka bantu ya Yuda. Nzambi pesaka bo na maboko ya bantu ya Yuda. Abiya ti basoda na yandi bedisaka bo mpenza....

18 Kilumbu yo yina, bantu ya Israele monaka nsoni, kansi bantu ya Yuda nungaka, sambu bo lemfukaka na Mfumu Nzambi...

20-21a Ntangu Abiya vandaka ntotila, Yeroboami kumaka diaka ve ngolo...Kansi Kimfumu ya Abiya kumaka ngolo mpenza.... Yandi butaka bana (mingi).

? Yula bana bakestio.

🏠 Bana sala bageste.

👤 Bana yimba ti kina.

3.4 Kansi ata Nzambi nungisaka Abiya na bitumba, yandi landaka Nzambi ve na luzingu na yandi lumbu na lumbu. Yandi landaka biteki ya tata na yandi.

📖 Tangila bana : 1 Bantotila 15 :3

1 Bantotila 15 :3 Abiya salaka mpi masumu kiteso mosi bonso tata na yandi. Yandi lemfukaka ve na Mfumu Nzambi, Nzambi na yandi, mutindu vandaka nkaka na yandi Davidi.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Mfumu Abiya sosaka lusadisu ya Nzambi na ntangu ya mpasi, ya mvita, ebuna Nzambi sadisaka yandi. Kansi Nzambi zola beto sosa lusadisu na Yandi ntangu yonso, na luzingu na beto yonso.

♥ Verse ya Kulonguka :

Yindula Mfumu Nzambi na mambu yonso ya nge ke salaka. *Yandi ta songa nge nzila ya mbote.*
Bingana 3 :6

👤 Nkunga :

Yimba mosi ya bankunga ya kwenda nzila mosi ti leso.

👤 Devoir sambu na bakristo :

Devoir mono ke pesa beno bakristo kele kusosa lusadisu ya Nzambi na mambu yonso nge sala na mposi yai.

✝ Invitation sambu na bo ya me yamba Yesu ntete ve :

Beto ke na mfunu ya Nzambi ntete-ntete na mambu ya kuguluka. Ata muntu mosi ve lenda guluka na ngolo na yandi mosi. Beto tanga na mukanda ya Tite 3 :5 nde : “Beto gulukaka ve sambu beto salaka mambu ya mbote, kansi beto gulukaka sambu Yandi (Nzambi) wilaka beto mawa. » Nge mpi, nge lenda ve sala mambu ya mbote ya ta gulusa nge. Na ngolo na beto mosi, beto lenda ve kuma na zulu.

Kansi nsangu ya mbote ikele nde na ngolo ya Yesu Kristo beto lenda guluka. Na mawa na Yandi. Yandi dezia me fwaka sambu na kufuta mfuka ya masumu na nge na meso ya Nzambi. Yandi me telama na lufwa kusonga nde Nzambi me ndima yonso ya Yandi salaka.

Keti nge ta tula Yandi ntima bubuyai ? Yandi kaka lenda gulusa nge. Konso mposi, beto kangula nzila nde muntu ya zola kwisa na Yesu, yandi bikala na nima ya ecodim, beto samba ti yandi. Kana nge me balula ntima na Yandi ntete ve, keti nge ta kwikila Yandi bubuyai ?

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda ya Bible. Bangindu ke monika na nsuka ya mukanda.

==NSUKA YA LESO 3

Mfumu Abiya (S-Y) tulaka Nzambi ntima na ntangu ya mvita, ti Nzambi sadisaka yandi. Kansi yandi landaka Nzambi ve na luzingu na yandi lumbu na lumbu. Nzambi zola beto kulanda Yandi na luzingu na beto yonso.



Leso 3

**Yindula Mfumu Nzambi na
mambu yonso ya nge ke salaka.
Yandi ta songa nge nzila ya
mbote.**

Bingana 3 :6

Leso 4. Bamfumu ya mbi na Israele (N-I) natila bantu na bo kaka mawa.

1 Bantotila 15 :25-16 :28 (Luyalu ya Nadabi, Basha, Zimri, Omri, ti Akabi)

I. PREPARASIO SAMBU NA MONITEUR-

🕒 **Kikuma ya Leso :**

Bana ta landa Nzambi mbote, sambu bo ta zaba nde kubuya Yandi ke nata kaka mawa.

♥ **Verse ya Kulonguka :**

...Bo mosi ke kudipesa mpasi ti nsoni. Yerima 7 :19b

👤 **Bankunga ya kwenda nzila mosi ti leso :**

Mawa, Mawa
Yezaya 53:6

II. REVISIO

👤 **Kuyindula diaka baleso me luta :**

Beto me yindula bamfumu ya kimfumu ya Yuda na sude. [Moniteur, songa Yuda na carte geografika, p.6.] Bamfumu ya nkaka na Yuda salaka ndambu mbote. Ya nkaka na bo katulaka biteki ti sambilaka Nzambi.

Ntangu yai, beto ta yindula bamfumu ya kimfumu ya Israele na norde. [Moniteur, songa Israele na carte]. Bamfumu na kimfumu yai, bo yonso kaka mbi, mbi, mbi. Ata mosi ve ya mbote.

III. KULONGA LESO YAI

➡ **Kuyantika :**

Kana bantu buya Nzambi, keti luzingu na bo ta vanda ya mbote? Nki beno banza? Beto ta mona mvutu na leso ya bubuyai.

🏠 **Malongi ya nene ya leso yai (developpement) na banti 4 ya malongi :**

4.1 Na Israele na norde, Nadabi yalaka bamvula zole. Yandi landaka bampila ya mbi ya tata na yandi Yeroboami kaka.

📖 **Tangila bana : 1 Bantotila 15 :25 -26**
25 ...Nadabi mwana ya ntotila Yeroboami

kumaka ntotila ya Israele. Yandi yalaka bamvula zole.

26 Yandi salaka masumu na meso ya Mfumu Nzambi bonso tata na yandi. Yandi bendaka bantu ya Israele kusala masumu.

? **Yula bana bakestio.**

🏠 **Bana sala bageste.**

👤 **Bana yimba ti kina.**

4.2 Basha fwaka Mfumu Nadabi. Yandi simbaka kimfumu ti fwaka bantu yonso ya dikanda ya Yeroboami, bonso profete Ahiya me tuba. Mawa, kaka mawa.

📖 **Tangila bana : 1 Bantotila 15 :27-30**

27 Basha... sosaka mpila na kufwa Nabadi. Yandi fwaka yandi ntangu basoda ya Israele nwanaka ti bantu ya Filistia.... Yo yina Basha yingaka Nadabi na kimfumu ya Israele.

29 Na mbala mosi, yandi yantikaka kufwa fami ya Yeroboami..... Ata muntu mosi bikalaka ve, na mutindu Mfumu Nzambi tubaka na munoko ya profete Ahiya....

30 Mambu yai yonso kubwaka sambu Yeroboami pesaka ...Nzambi makasi ntangu yandi bendaka bantu ya Israele kusala masumu.

? **Yula bana bakestio.**

🏠 **Bana sala bageste.**

👤 **Bana yimba ti kina.**

4.3 Ela, mwana ya Basha, yingaka yandi. Lumbu mosi Ela vandaka kunwa malafu, ebuna Zimri, mfumu ya basoda, fwaka yandi. Yandi fwaka mpi dikanda yonso ya Ela, bonso profete Yehu tubaka.

📖 **Tangila bana : 1 Bantotila 16 :7-13**

7 Mfumu Nzambi waka makasi sambu Basha fwaka Yeroboami ti fami na yandi yonso.

8-9 ...Ela mwana ya Basha kumaka ntotila ya Israele. Yandi yalaka bamvula zole... Zimri, mfumu ya basoda, sosaka mpila ya kufwa Ela. Kilumbu mosi, Ela vandaka kunwa malafu...

10-12 Zimri kwiskaka kukota, yandi fwaka Ela, ebuna Zimri kumaka ntotila ya Israele. Yandi fwaka bantu yonso ya fami ya Basha, kaka mutindu Mfumu Nzambi tubaka na munoko ya profete Yesu.

13 Basha ti mwana na yandi Ela pesaka Mfumu Nzambi...makasi na biteki ya bo salaka, ti sambu bo bendaka bantu ya Israele kusala masumu.

? Yula bana bakestio.

🏠 Bana sala bageste.

👤 Bana yimba ti kina.

4.4 Bamfumu ya nkaka ya Israele, bo landaka kaka kusala mbi, kusamba biteki, ti kufwa bo na bo. Mawa, mawa, kaka mawa.

📖 Tangila bana : 1 Bantotila 16 :15-28

15-16 ...Zimri yalaka bilumbu 7... Ntangu basoda waka nde Zimri me fwa Ela, bo tulaka mfumu na bo Omri kuvanda ntotila ya Israele.

17-18 Ntangu yai, Omri ti basoda na yandi ...kwendaka kuziunga bwala ya Zimri. Ntangu Zimri monaka nde bo vandaka kubotula bwala, yandi tinaka... Yandi kotaka na nzo, yandi tulaka yo tiya. Ebuna yandi fwaka kuna na kati ya tiya.

19 Mambu yai kubwaka sambu yandi salaka masumu na meso ya Mfumu Nzambi. Yandi mpi salaka mambu ya mbi bonso Yeroboami... kubenda bantu ya Israele kusala masumu.

25 Kansi Omri salaka masumu na meso ya Mfumu Nzambi kuluta bamfumu ya nkaka.

28 Omri kufwaka. Bo zikaka yandi, ebuna mwana na yandi Akabi yingaka yandi na kimfumu.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Bamfumu ya Israele (I-N) landaka kaka mbi ya biteki ya Yeroboami, ti bo yikaka konso ntangu mbi na mbi. Ata mosi ve balulaka ntima to landaka Nzambi. Luzingu na bo yonso kaka mawa. Bo yonso fwaka na nsoni, ti bampangi na bo mpi. Kubuya Nzambi ke natila bantu kaka mawa.

♥ Verse ya Kulonguka :

Bana tuba verse na nima ya nge, moniteur. Na nima, bo tula yo ton ti ritime, bo yimba ti kina yo mbala tanu. Na nsuka, bana tatu tuba yo. Mwana mosi meka kutendula yo.

👤 Bankunga ya kwenda nzila mosi ti leso :

Mawa, Mawa

Yezaya 53:6

👤 Devoir sambu na bakristo :

Bana bakristo, zaba mbote nde bo yina landa Nzambi ve, bo me kota na nzila mosi ya mpasi ti ya mawa. Na mposi yai, keti nge ta tula ngolo kulanda Nzambi na mambu yonso ?

✝ Invitation sambu na bo ya me yamba Yesu ntete ve :

Kana nge zaba ntete ve nde nge me yamba Yesu Kristo kuvanda Mvulusi ti Mfumu na nge, zaba nde nge kele na nzila ya mawa. Beto yonso, beto vandaka kulanda nzila yina tii ntangu ya beto monaka mbi na beto, ye beto balulaka ntima. Beto bikisaka nzila yina ya masumu, ti beto kotaka na nzila ya Yesu. Beto yantikaka kulanda Yandi. Keti nge ta yantika kulanda Yandi bubuyai ?

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda ya Bible. Bangindu ke monika na nsuka ya mukanda.

NSUKA YA LESO 4

Leso 4



**...Bo mosi ke
kudipesa mpasi
ti nsoni.**

Yeremia 7:19b

Leso 5. Elia tesaka baprofete ya luvunu kusonga nani Nzambi ya kieleka.

1 Bantotila 18 :17-40

I. PREPARASIO SAMBU NA MONITEUR-

🕒 Kikuma ya Leso :

Bana ta landa Nzambi na kieleka yonso, sambu Yandi kele Nzambi ya moyo.

🧠 Bankunga ya kwenda nzila mosi ti leso :

Banzambi ya Nkaka
Mono Me Sila Kulanda Yesu

♥ Verse ya Kulonguka :

... « Ntangu ikwa beno ta yindula kana nki ya banzila zole beno fweti landa ? Kana Mfumu Nzambi kele Nzambi, beno samba Yandi... »

1 Bantotila 18 :21

II. REVISIO

👉 Kuyindula diaka baleso me luta :

Beto me kuma na Mfumu Akabi, mfumu ya Israele na norde—mfumu mosi ya mbi mingi. Nzambi songaka profete Elia kukwenda kutana ti yandi. Bubuyai beto ta mona mambu ya nene ya salamaka ntangu ya Akabi ti Elia vandaka kutana.

III. KULONGA LESO YAI

➔ Kuyantika :

Keti mbala na mbala, nge me mona kisakasaka na mabanza na nge ? Mbala ya nkaka, bantu ya nkaka tubaka nde, « Kusala yai. Yai mbote. » Kansi ya nkaka tubaka nde, « Ve, kusala yina ve. Kwise, kusala mpila ya beto ke songa nge. Yai nzila ya mbote. » Kana ndambu ya bantu ke tuba kima mosi, kansi bantu bantu ya nkaka ke tuba mutindu ya nkaka, kisakasaka lenda kota. Nki mambu ya kieleka ?

Bantu ya Israele vandaka na mabanza ya kisakasaka na bilumbu ya Mfumu Akabi. Bo zabaka nde bambuta na bo sambaka Mfumu Nzambi, kansi Mfumu Akabi vandaka kudipesa na kiteki zina ya Baale. Nkento na yandi Yezabele vandaka kupesa baprofete ya Baale madia. Yandi vandaka kufwa

baprofete mingi ya Nzambi. Mfumu Nzambi to Baale—nani vandaka Nzambi ya kieleka ?

🏠 Malongi ya nene ya leso yai (developpement) na banti ya malongi 4 :

5.1 Profete Elia songaka Mfumu Akabi kubinga baprofete yonso ya kiteki Baale ti Ashera, bo tesa bo sambu na kuzikisa nani Nzambi ya kieleka.

📖 Tangila bana : 1 Bantotila 18 :17-24

17-19 ...Elia songaka Akabi nde : « Songa bantu ya Israele bo kuta mono na ngumba... Bo kwisa mpi ti baprofete ya Baale... »

20 ...Akabi bingaka makanda yonso ya Israele ti baprofete ya nzambi Baale kukwisa...

21 Elia nde : “Ntangu ikwa beno ta yindula kana nki ya banzila zole beno fweti landa ? Kana Mfumu Nzambi kele Nzambi, beno samba Yandi. Kana Baale kele Nzambi, beno samba yandi !”...

23 Kwise kunata bangombe zole. Ngombe mosi, bo fwa yo...bo tula yo na zulu ya bankuni, kansi bo tula tiya ve. Mono mpi ta sala mutindu mosi na ngombe ya nkaka.

24 Bika baprofete ya Baale samba nzambi na bo. Mono mpi ta samba Mfumu Nzambi. Nzambi yina ta tinda tiya, Yandi kele Nzambi. » Bantu yonso ndimaka nde : « Nge me tuba mbote. »

❓ Yula bana bakestio.

🏠 Bana sala bageste.

🧠 Bana yimba ti kina.

5.2 Baprofete ya Baale bingaka yandi na bampila yonso, kansi yandi pesaka mvutu ve.

📖 Tangila bana : 1 Bantotila 18 :25-29

25-26 Elia tubilaka baprofete ya Baale nde : « Beno vanda bantu ya ntete. Bo yidikaka bangombe. Ebuna bo yantikaka kusamba Baale ti kubinga zina na yandi katuka suka tii midi. Bo vandaka kutuba na ndinga ya ngolo nde : « Baale, ndima bisambu na beto ! » Bo vandaka kukina kaka na lweka ya mesa-kimenga. Kansi bo bakaka ata mvutu mosi ve.

27 ...Elia yantikaka kuseka bo nde : “Samba

kaka na ndinga ya ngolo. Mbala ya nkaka yandi ke yindula kima ya nkaka, to yandi me kwenda na wese, to yandi kele na vwayaze, to yandi me lala... »

28 Baprofete dilaka ngolo. Bo bakaka bambele, bo kudizengaka tii menga basikaka.

29 Bo landaka kaka kusamba na ndinga ya ngolo bonso bantu ya kilau tii na nkokila. Kansi bo zwaka ata mvutu ve...

? Yula bana bakestio.

🏠 Bana sala bageste.

👤 Bana yimba ti kina.

5.3 Elia tulaka masa mingi na zulu ya mesa-kimenga na yandi. Ebuna Yandi bingaka Nzambi, ti Nzambi tindaka tiya na mesa-kimenga yina.

📖 Tangila bana : 1 Bantotila 18 :30-33

30-33 Ntangu yai, Elia yantikaka kubongisa mesa-kimenga ya Mfumu Nzambi.” Yandi timunaka diaka na lweka yonso na yo. Yandi tulaka bankuni na mesa-kimenga. Yandi zengaka ngombe ti tulaka yo na zulu ya bankuni.

34 Yandi tubaka nde : “Beno fulusa mabungu iya na masa ti losa yo na zulu ya makabu ti bankuni.” Bo salaka mpidina. Yandi tubaka nde : “Beno yika diaka.” Ebuna bo yikaka masa ya nkaka. Yandi nde : “Beno yika diaka,” ti bo yikaka.

35-37 Masa fulumukaka na ntoto na lweka ya mesa-kimenga. Yo fulukaka dibulu yonso. Yandi sambaka Nzambi nde, “Mfumu Nzambi, songa bubuyai nde Nge kele Nzambi sambu bantu yai kuzaba... »

38 Mfumu Nzambi tindaka tiya. Yo yokaka makabu yonso, bankuni, matadi ti ntoto. Masa mpi yumaka na dibulu.

? Yula bana bakestio.

🏠 Bana sala bageste.

👤 Bana yimba ti kina.

5.4 Bantu ndimaka nde Mfumu Nzambi kele Nzambi ya kieleka.

📖 Tangila bana : 1 Bantotila 18 :39

39 Ntangu bantu monaka mpidina, bo kudilosaka na ntoto. Bo nde : “Mfumu Nzambi mpamba kele Nzambi !”

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Nzambi songaka bo nde Yandi kele Nzambi ya moyo, Yandi Nzambi yina ke wa bisambu. Ebuna bo yina monaka mambu yango, bo ndimaka Yandi. Nzambi me songa beto mpi mambu mingi ya ke songa nde Yandi kele Nzambi. Muntu na muntu, beto fweti zenga kana beto ta sadila nani.

👤 Bankunga ya kwenda nzila mosi ti leso :

Banzambi ya Nkaka

Mono Me Sila Kulanda Yesu

♥ Verse ya Kulonguka :

Pesa konso ndonga ya bana fraze mosi ya verse. Kana nge songa bo diboko, bo telama ti tuba fraze yina. Bo yonso tuba wapi yo kele na Bible. Kana nge me sala pratike mbala 4, sala yo diaka bonso competisio.

👤 Devoir sambu na bakristo :

Beno bakristo, zaba nde Nzambi na beto kele ya kufwa ve. Yandi ke waka bisambu ya bantu na Yandi. Devoir mono ke pesa beno kele kubinga zina na Yandi na mposho yai na mambu yonso ya nge ke na yo mfunu.


✝ Invitation--bo ya me yamba Yesu ntete ve :

Nzambi ke wa bisambu ya bantu na Yandi. Ketu nge zaba kieleka nde nge kele muntu na Yandi ? Beto yonso kele bantu ya Nzambi salaka. Kansi beto yonso kele na fami na Yandi ya kimpeve ve. Muntu kota fami na Yandi ya kimpeve ntangu yandi yamba Yesu Kristo, mwana ya Nzambi, bonso Mvulusi ti Mfumu.

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 5



***... « Ntangu ikwa beno ta
yindula kana nki ya banzila
zole beno fweti landa ?
Kana Mfumu Nzambi kele
Nzambi, beno samba Yandi... »***

1 Bantotila 18 :21

Leso 6. Nzambi tindaka mvula na ndinga ya Elia.

1 Bantotila 18 :41-46

I. PREPARASIO SAMBU NA MONITEUR-

🎯 Kikuma ya Leso :

Bana ta kwikila ndinga ya Nzambi, sambu bo ta zaba nde yonso Nzambi tuba, yo fweti salama kaka.

♥ Verse ya Kulonguka :

Bansiku ya Mfumu Nzambi kele ya masonga. Yo ta vandaka tii kuna. Bankunga 19 :10a

👤 Nkunga ya kwenda nzila mosi ti leso :

O, Bible kele Kieleka

II. REVISIO

↑ Kuyindula diaka baleso me luta :

- Na mposo me luta, beto monaka nde Profete Elia tesaka Nzambi ti banzambi ya luvunu. Nki mutindu Nzambi songaka nde Yandi kele kieleka ? (Yandi waka lombilu ya Profete Elia. Yandi tindaka tiya kubaka nkailu ya bo me pesa.)
- Nki mutindu bo bakisaka nde Baale vandaka nzambi ya luvunu? (Yandi waka ve lombilu ya bapofete na yandi.)

III. KULONGA LESO YAI

➔ Kuyantika :

Akabi vandaka mfumu mosi ya mbi. Bantu ya Israele mpi me sala mbi mingi na bilumbu na yandi. Yo yina, Nzambi kangaka mvula na mpila nde yo kunoka ve. Yandi zolaka kubaka atasio na bo, kusonga bo nde Yandi vandaka Nzambi ya kieleka. Nzambi tindaka profete Elia kusonga Mfumu Akabi nde mvula na noka diaka ve tii ntangu yandi tuba diaka. Yo salamaka na mpila Elia tubaka, sambu Elia tubaka ndinga ya Nzambi. Akabi tindaka bantu kusosa ata ndambu ya masa, kansi bo monaka kima ve.

🏠 Malongi ya nene ya leso yai (developpement) na banti ya malongi 4 :

6.1 Nzambi songaka Elia kuyilama sambu Yandi ta tinda mvula diaka.

📖 Tangila bana : 1 Bantotila 18 :41

41 Elia tubaka na Akabi nde : “Ntangu yai, kwenda kudia ti kunwa. Mono me wa makelele ya mvula. »

? Yula bana bakestio.

🏠 Bana sala bageste.

👤 Bana yimba ti kina.

6.2 Mbala nsambwadi nsadi ya Elia talaka na zulu kumona ntangu ya mvula ta kwisa. Na mbala ya nsambwadi, yandi monaka dituti mosi ya fioti.

📖 Tangila bana : 1 Bantotila 18 :42-44

42 Akabi kwendaka sambu na kudia, kansi Elia tombukaka tii na nsongi ya ngumba ya Karmele. Yandi fukamaka na ntoto, ilungi na kati ya mabolongo.

43 Ebuna yandi tubaka na nsadi na yandi nde : « Kwenda kutala kuna na ndambu ya nzadi ya nene kana nki kima kele.” Muntu na yandi kwendaka kutala. Yandi kwisaka kuvutuka ti kutuba nde : “Mono me mona kima ve.” Mbala nsambwadi Elisa songaka muntu na yandi kukwenda kutala. Yandi vutulaka mpi mbala nsambwadi.

44 Kansi na mbala ya nsambwadi, yandi kwisaka kuvutuka ti kutuba nde : « Mono me mona dituti. Yo kele fioti bonso diboko ya muntu...”

? Yula bana bakestio.

🏠 Bana sala bageste.

👤 Bana yimba ti kina.

6.3 Na nswalu yonso, Elia tindilaka Akabi ndinga nde mvula ke kwisa.

📖 Tangila bana : 1 Bantotila 18 :44b

44b Ebuna Elia nde : “Kwenda kusonga Akabi, yandi mata na pusupusu. Yandi vutuka nswalu na bwala. Kana ve, mvula ta kangisa yandi.”

? Yula bana bakestio.

🏠 Bana sala bageste.

👤 Bana yimba ti kina.

6.4 Mvula kwisaka nswalu ti ngolo bonso Nzambi me tuba. Yo simbaka bo yonso na nzila.



Tangila bana : 1 Bantotila 18 :45-46

45 Ntama ve, zulu yonso fulukaka na matuti ya ndombe. Mupepe mingi. Mvula ya ngolo yantikaka kunoka. Akabi mataka na pusupusu. kuvutuka na bwala Yizrele.

46 Diboko ya Nzambi simbaka Elia. Yandi kangaka mukaba na yandi ngolo ti bakaka ntinu. Yandi kwendaka na ntwala ya pusupusu ya Akabi tii na munoko ya bwala Yizrele.

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Nzambi songaka nde Yandi ta kanga mvula; ebuna yo kangamaka. Mvula nokaka ve. Ntoto, ti bambisi, ti bantu yonso monaka mpasi.

Nzambi songaka diaka nde mvula ta kwisa. Elia zabaka nde mambu yonso ya Nzambi me tuba, yo fweti salama. Yandi kwikilaka ndinga ya Nzambi. Yo yina, yandi kwendaka kutala kana nki ntangu mvula ta kwisa. Nzambi tindaka yo ngolo, bonso mpila Yandi me tuba. Beto lenda kwikila ndinga ya Nzambi !



Verse ya Kulonguka :

Tula bana na bandambu zole kutuba verse. Konso ndambu telama kutala ndambu ya bana ya nkaka. Konso ndambu ya bana tuba fraze na bo. Na nima

kutuba yo mbala tatu, bo balula ti konso ndambu ya bana baka fraze ya nkaka.



Nkunga ya kwenda nzila mosi ti leso :

O Bible kele Kieleka



Devoir sambu na bakristo :

Bana bakristo, ndinga ya Nzambi bubuyai kele kusonika na Bible. Keti nge ke tanga ndambu na yo, to kuwa ndambu na yo, konso lumbu ? Kana nge me yantika kutanga to kuwa ndinga ya Nzambi konso lumbu ntete ve, beto pesa beno devoir kuyantika yo na mposho yai.



Invitation sambu na bo ya me yamba Yesu ntete ve :

Yesu me tuba nde : « Konso muntu yina ta kwisa na Mono, Mono ta buya yandi ve. » Nge lenda kwikila promese yina, sambu Yesu kele Nzambi ya kieleka. Kestio yo yai : Keti nge me kwisa na Yandi, kutula ntima na Yandi bonso Nzambi na nge, Mvulusi na nge, Mfumu na nge ? Kana nge kwikila nde Yesu kele Mwana ya Nzambi, kansi nge me tula ntima na Yandi ntete ve, nge lenda zenga mambu yina bubuyai.

Kana ntangu lunga : Longa mikanda ya Bible



Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 6

Leso 6



***Bansiku ya Mfumu Nzambi
kele ya masonga.***

Yo ta vandaka tii kuna.

Bankunga 19 :10a

Leso 7. Yezebele sosaka kufwa Elia, kansi Nzambi bumbaka yandi.

1 Bantotila 19 :1-18

I. PREPARASIO SAMBU NA MONITEUR-

🎯 Kikuma ya Leso :

Bana ta kwenda na Nzambi na ntangu ya dekurazema, sambu Yandi zaba nki mutindu kulunda beto.

♥ Verse ya Kulonguka :

Nzambi kele kisika ya beto ke tininaka, ti ngolo na beto. Yandi kele awa sambu na kusadisa beto na ntangu ya mpasi. Bankunga 46 :2

👤 Nkunga ya kwenda nzila mosi ti leso :

Nzambi Ta Kuwa Nge

II. REVISIO

↑ Kuyindula diaka baleso me luta :

Beto me mona nde mfumu ya mbi mingi zina ya Akabi kumaka mfumu na Israele. Yandi ti nkento ya mbi na yandi Yezabele sambaka biteki ya mbi. Nki mutindu Nzambi songaka bo nde Yandi Nzambi ya kieleka ? (Yandi tindaka tiya na kuyoka makabu bu profete Elia bingaka Yandi.)

III. KULONGA LESO YAI

➔ Kuyantika :

Beto monaka mpi nde Elia songaka Akabi nde mvula ta noka diaka ve tii ntangu ya yandi ta tuba. Bima yonso vandaka ya kuyuma ti ya kufwa. Mpasi ! Na nima, Nzambi songaka Elia nde Yandi ta tinda mvula diaka. Yandi tubaka yo, ti yo salamaka kaka na mpila Nzambi tubaka. Kansi mambu yina yonso pesaka Yezabele kiese ve.

🏠 Malongi ya nene ya leso yai (developpement) na banti ya malongi 4 :

7.1 Yezabele zolaka kufwa Elia. Yai pesaka yandi dekurazema na mpila nde yandi zolaka kaka kufwa.

📖 **Tangila bana :** 1 Bantotila 19 :1-4

1 Akabi telaka nkento na yandi Yezabele

mambu yonso ya Elia salaka ...

2 (somere) Yezabele tindaka ndinga na Elia nde yandi me zenga na kufwa yandi na kati ya lumbu mosi kaka.

3-4 Elia waka boma... Yandi salaka kilumbu ya mvimba kutambula na makulu na ntoto ya zelo na zelo.Yandi tubaka nde : « Mfumu Nzambi, mpasi me lutila mono. Pardo, baka moyo na mono...”

? Yula bana bakestio.

🏠 Bana sala bageste.

👤 Bana yimba ti kina.

7.2 Wanzio ya Nzambi pesaka Elia masa ti madia sambu na kupesa yandi ngolo diaka.

📖 **Tangila bana :** 1 Bantotila 19 :5-8

5-6 Elia lalaka na nsi ya nti, ebuna...na mpongi, wanzio kwisaka kusimba yandi ti kutubila yandi nde : « Telama. Dia. » ...Yandi monaka dimpa mosi...ti dibungu ya masa penepene...

7 Wanzio ya Mfumu Nzambi kwisaka kuvutuka. Yandi tedimisaka Elia diaka mbala ya zole nde : « Telama. Dia. Nge fweti kwenda nzila mosi ya nda. »

8 Elia telamaka. Yandi diaka ti nwaka. Madia pesaka yandi ngolo mingi na kutambula bilumbu makumi iya mpimpa ti mwini, tii na ngumba ya Nzambi.

? Yula bana bakestio.

🏠 Bana sala bageste.

👤 Bana yimba ti kina.

7.3 Elia vandaka kubokuta na Nzambi. Ebuna Nzambi vutulaka Elia na ndinga mosi ya fioti.

📖 **Tangila bana :** 1 Bantotila 19 :0-12

19 :9 ...Yandi kotaka na dibulu mosi na kati ya matadi...yandi lalaka muna. Yandi waka ndinga ya Mfumu Nzambi ke tuba nde : « Elia, nki nge ke sala awa ? »

10 Elia vutulaka nde : « Mfumu Nzambi...konso ntangu mono ke zolaka kaka kusadila Nge. Kansi bantu ya Israele me fwaka kuwakana ya Nge wakanaka ti bo. Bo me...bwisa bamesa-

kimenga na Nge. Bo me fwa...baprofete na Nge. Kaka mono mpamba me bikala, kansi bo ke sosa mpi kufwa mono.

11 Mfumu Nzambi tubaka...nde : “Basika, kwenda. Telama na ntwala na MonoMono ke kwisa kuluta. » Ntangu yai, mupepe ya ngolo telamaka. Yo pasulaka ngumba ti matadi. Kansi Mfumu Nzambi vandaka ve na kati ya mupepe yina. Na nima, ntoto yantikaka kunikana, kansi Mfumu Nzambi vandaka ve na kati....

12 Na nima, tiya pelaka, kansi Mfumu Nzambi vandaka ve na kati ya tiya. Na nima, ndinga ya fioti-fioti wakanaka.

? Yula bana bakestio.

🏠 Bana sala bageste.

👂 Bana yimba ti kina.

7.4 Nzambi pesaka Elia enkurazema nde kisalu ya mfunu me bikala sambu na yandi kusala, ti yandi me bikala yandi mosi ve na lukwikilu. Bantu 7,000 ya nkaka me samba ve kiteki Baale.

📖 Tangila bana : 1 Bantotila 19 :13-18

13 Ntangu Elia waka yo, yandi fikaka ilungi. Yandi telamaka na munoko ya dibulu. Yandi waka diaka ndinga ke tuba nde : « Elia, nki nge ke sala awa ? »

14-15 (somere) Yandi vutulaka kiteso mosi. Mfumu Nzambi tubaka na yandi nde : “Vutuka. Kwenda kutula Azaele mafuta na ntu sambu yandi kuma ntotila ya Siria.

16 Tula mpi Yehu...sambu yandi kuma ntotila ya Israele. Na nima, tula Elisa mafuta na ntu sambu yandi bika kuyinga nge na kiprofete.

18 Kansi zaba nde bantu 7,000 me bikala na ntoto ya Israele yina me fukama ve na biteki ya nzambi Baale .

? Yula bana bakestio.

🏠 Bana sala bageste.

👂 Bana yimba ti kina.

>|< Kumanisa Malongi :

Elia me lemba. Yandi waka bumosi ti dekurazema. Kansi Nzambi lundaka yandi. Wanzio pesaka yandi madia mbala tatu. Nzambi songaka yandi nde kisalu ya mfunu me bikala sambu na yandi, mpi nde bantu 7,000 ya nkaka me vanda kwikama na Nzambi, me samba ve kiteki ya Baale.

O, Nzambi zaba kulunda bantu na Yandi ! Beto bokuta ve, kansi beto kwenda na Yandi na ntangu ya mpasi.

♥ Verse ya Kulonguka :

Bana tuba verse mbala tatu ti bageste. Na nima, bana ya ke lwata kulere ndombe tuba yo, bana ya ke lwata bleu, bana ya ke lwata rouge to kulere ya nkaka.

👂 Nkunga ya kwenda nzila mosi ti leso :

Nzambi Ta Kuwa Nge

👉 Devoir sambu na bakristo :

Beno bakristo, na mposo ke kwisa, konso mbala ya nge kuwa dekurazema, kwenda nswalu na Nzambi sambu Yandi kuvutula ngolo na nge.

✝ Invitation--bo ya me yamba Yesu ntete ve :

Mpasi na beto ya nene kele masumu beto me sala—mambu ya me pesa Nzambi kiese ve. Beto yonso me sala masumu. Yo me kanga beto nzila kuvanda na kinduku ti Nzambi. Kansi Nzambi zolaka beto mingi. Yandi tindaka Mwana na Yandi Yesu Kristo na nsi-ntoto yai. Yandi futaka menga ti moyo na Yandi bonso nkailu ya kulunga sambu na masumu na beto. Yesu fwaka na sika na beto. Yandi telamaka na lufwa. Bubuyai, Yandi ke binga beto kukuma balandi na Yandi. Kana nge me guluka ntete ve, bikala ve na masumu na nge. Kwisa na Yandi bubuyai. Yandi me sila nde, konso muntu ya kwisa na Yandi, Yandi ta buya yandi ve.

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 7

Leso 7



**Nzambi kele kisika ya beto ke
tininaka, ti ngolo na beto.**

**Yandi kele awa sambu na
kusadisa beto na ntangu ya
mpasi.**

Bankunga 46 :2

Leso 8. Elia bingaka Elisa kuvanda profete.

1 Bantotila 19 :19-21

I. PREPARASIO SAMBU NA MONITEUR-

Kuyidika na ntwala : Nata lele bonso kazaki. Nge ta sadila yo na 8.2.

🎯 Kikuma ya Leso :

Bana ta wila bansadi ya nkaka ya Nzambi kimpala ve. Bo ta kuwa mpeve ya competisio ve ti bo, kansi bo ta zaba kusadisana, sambu bo ta bakisa nde Nzambi me pesa beto yonso kisalu ya mfunu.

♥ Verse ya Kulonguka :

Beto ke sadila Nzambi na kimvuka...

1 Korinto 3 :9a

👤 Bankunga ya kwenda nzila mosi ti leso :

Beto Bakristo Sadisana
Kusala Mbote na Kimvuka

II. REVISIO

↑ Kuyindula diaka baleso me luta :

Beto me mona mpila Nzambi bumbaka Elia, sambu mfumu-nkento ya mbi Yezebele sosaka mpila ya kufwa yandi. Beto me mona mpila Nzambi tubaka na Elia, ti mpila Nzambi pesaka yandi kisalu.

III. KULONGA LESO YAI--

➔ Kuyantika :

Na kati ya bisalu Nzambi pesaka Elia vandaka kubinga muntu ya ta yinga yandi kuvanda profete. Zina na yandi Elisa. Nki mutindu Elia ta baka ndinga yina ? Keti yandi ta wa kimpala sambu Elisa ta baka sika na yandi ? Keti yandi ta zola kusadisa mulandi na yandi ? Keti yandi ta mona kimpala competisio ti yandi, nani ta luta nene to ngolo ?

🏠 Malongi ya nene ya leso yai (developpement) na banti ya malongi 4 :

8.1 Elia kingaka ve. Yandi kwendaka nswalu kusosa Elisa. Yandi kutaka yandi ya kubondula ntoto sambu na kilanga.

📖 Tangila bana : 1 Bantotila 19 :19

19 Elia kwendaka. Yandi monaka Elisa vandaka kubondula bilanga...

? Yula bana bakestio.

🏠 Bana sala bageste.

👤 Bana yimba ti kina.

8.2 Elia losilaka Elisa kazaka na yandi ya kiprofete. Yai vandaka kidimbu ya songaka nde yandi vandaka kubinga Elisa kulanda yandi na kisalu ya kiprofete.

📖 Tangila bana : 1 Bantotila 19 :19b

19b Ntangu Elia kumaka penepene na yandi, yandi losilaka Elisa kazaka na yandi.

[Moniteur, losa kazaka na kipeka ya mwana mosi.]

? Yula bana bakestio.

🏠 Bana sala bageste.

👤 Bana yimba ti kina.

8.3 Elisa bakisaka, ebuna yandi landaka Elia nswalu. Yandi lombaka nzila kaka kupesa bampangi bikala mbote.

📖 Tangila bana : 1 Bantotila 19 :20

20 Elisa bikisaka bangombe, yandi landaka Elia ntinu. Yandi tubaka na Elia nde : "Bika mono ntete kwenda kupesa tata ti mama na mono mbote ya nsuka. Na nima mono ta kwisa kulanda nge. »

? Yula bana bakestio.

🏠 Bana sala bageste.

👤 Bana yimba ti kina.

8.4 Elisa salaka fete ya kukabana ti bampangi. Ebuna yandi kwendaka kulanda Elia ti kusadila yandi. Yandi yantikaka kulonguka kisalu ya profete.

**Tangila bana : 1 Bantotila 19 :21**

21 Ntangu yai, Elisa vutukaka na bilanga na yandi. Yandi bakaka bangombe na yandi zole. Yandi fwaka yo, ebuna yandi lambaka yo... Yandi pesaka yo na bantu, bo diaka. Na nima, yandi kwendaka kulanda Elia. Yandi kumaka kusadila yandi.

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Elia zabaka nde Elisa fweti yinga yandi. Kisalu ya Elia ta suka, ti Elisa ta landa kisalu yina ya kiprofete. Kansi Elia waka kimpala ve. Yandi kingaka ve, kansi yandi kwendaka nswalu kubinga Elisa. Bo yantikaka kusala sika mosi, na mpeve ya competisio ve, kansi ya kusadisana. Bo zole vandaka kusala kisalu ya Nzambi, ti yina vandaka mambu ya kiese.

**Verse ya Kulonguka :**

Beto ke sadilaka Nzambi na kimvuka...

1 Korinto 3 :9a

**Bankunga ya kwenda nzila mosi ti leso :**

Beto Bakristo Sadisana

Kusala Mbote na Kimvuka

**Devoir sambu na bakristo :**

Beno bakristo, devoir mono ke pesa beno na mposo ke kwisa, yo yai : Bika konso kitini ya kimpala ya nge ti bansadi ya nkaka ya Nzambi. Sosa mpila kusadisa bo, sambu beto yonso ke sadila kaka Nzambi.

**Invitation sambu na bo ya me yamba Yesu ntete ve :**

Mbala ya nkaka, kubinga ya kele mfunu na luzingu

na nge kele ve kubinga na kisalu ya Nzambi.

Mbala ya nkaka nge zaba Nzambi ntete ve. Beto lenda zaba Nzambi na nzila ya Yesu Kristo. Yesu kele Mwana ya Nzambi. Yandi me zinga mvu ya mvu ti Tata na Yandi na zulu, kansi Yandi bikisaka zulu, Yandi kulumukaka awa na nsi-ntoto sambu na kumanisa probleme ya masumu ya beto bantu. Masumu kele kukanga beto nzila kuvanda na kintwadi ti Nzambi. Yo kele kukanga beto nzila kukuma na bwala na Yandi na zulu.

Yesu kudipesaka moyo ti menga na Yandi na zulu ya kulunsi bonso nkailu ya Nzambi lenda ndima, sambu na kumanisa masumu na beto. Yandi telamaka na lufwa.

Yandi kele na moyo bubuyai. Yandi ta kuwa kana nge binga zina na Yandi. Yandi ta lolula masumu yonso ya nge ti pesa nge ntima ya mpa ya kinzambi. Kana nge me binga Yandi kugulusa nge ntete ve, mbote kusala yo bubuyai. Nge mpi ta kuma mukristo.

Kana ntangu lunga : Longa mikanda ya Bible

Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 8

Leso 8

Nzambi me songa Elia nde Elisa ta yinga yandi na kiprofete. Yo yina, Elia kutaka Elisa na kubondula ntoto ya kilanga. Yandi losaka kazaka na zulu ya mapeka na yandi. Yo songaka nde yandi vandaka kubinga Elisa kulanda yandi. Elisa landaka yandi, ti Elia longaka yandi kusala kisalu ya kiprofete.



***Beto ke sadila Nzambi na
kimvuka...***

1 Korinto 3 :9a

Leso 9. Akabi yumaka ntima na kilanga ya Naboti.

1 Bantotila 21 :1-24

I. PREPARASIO SAMBU NA MONITEUR-

🕒 Kikuma ya Leso :

Bana ta yuma ntima ve na konso kima, kansi bo ta vanda na kiese ti lutondo na bima ya Nzambi me pesa bo.

♥ Verse ya Kulonguka :

Kuyuma ntima ve na ...konso kima ya ngani.

Kubasika 20:17 (10eme ya Bansiku Kumi ya Nene Nzambi me pesa beto)

🔊 Bankunga ya kwenda nzila mosi ti leso :

Bansiku Kumi (nsiku ya kumi)

Mono Ta Mona Kiese

II. REVISIO

↑ Kuyindula diaka baleso me luta :

Na mposo me luta, beto monaka nde Elia bingaka Elisa kukwisa kulanda yandi, sambu Nzambi me songa nde Elisa muntu ta yinga yandi. Beto ta wa mambu ya Elisa diaka na baleso ke kwisa.

III. KULONGA LESO YAI

➔ Kuyantika :

Nani me mona kima ya muntu ya nkaka, ti zolaka kuvanda na kima yina ? Mbala ya nkaka lele, to velo, to nzo ya kitoko, to madia. Nzambi zaba nde kuyuma ntima ke bendaka beto kusala masumu mingi. Yo yina, na nsiku kumi ya Bansiku Kumi ya Nene, Nzambi tubaka, “Kuyuma ntima ve.” Na histoire beto ta landa bubu, beto ta mona nki salamaka bu Mfumu Akabi yumaka ntima na kilanga ya muntu ya nkaka.

🏠 Malongi ya nene ya leso yai (developpement) na banti ya malongi 4 :

9.1 Akabi yumaka ntima sambu na kilanga ya Naboti. Yandi waka mawa ti makasi sambu Naboti buyaka kutekila yandi kilanga yina.

📖 **Tangila bana : 1 Bantotila 21 :1-5**

1 Penepene na nzo ya Ntotila Akabi kuvandaka

kilanga mosi ya vinu ya muntu mosi Naboti.

2 Kilumbu mosi, Akabi tubaka na Naboti nde : « Pesa mono kilanga na nge ya vinu.... Mono ta pesa nge kilanga ya nkaka ya kuluta mbote to mbongo... »

3 Naboti tubaka nde : « Na zina ya Mfumu Nzambi, mpila kele ve. Kilanga yai bankaka na mono bantu bikilaka mono yo. »

4 Akabi vutukaka na nzo na yandi na mawa ti makasi mpi sambu na mvutu ya Naboti. Yandi kwendaka kulala na zulu ya mbeto, ilungi na kibaka, kubuya kudia. »

5 Nkento na yandi Yezabele kwisaka kuyula yandi nde : « Sambu na nki nge kele mawa-mawa ?Ebuna Akabi tendulaka Yezabele mambu yina ya me luta.

? Yula bana bakestio.

🏠 Bana sala bageste.

🔊 Bana yimba ti kina.

9.2 Yezabele salaka lukanu kuyiba ntoto ya Naboti. Yandi sosaka bantemwe ya luvunu sambu bo kufwa Naboti, bo botula ntoto na yandi.

📖 **Tangila bana : 1 Bantotila 21 :7-16**

7 Yezabele nde : «Nge kele ntotila to ve? Mono muntu ta pesa nge kilanga ya Naboti ! »

8-9 Yandi sonikaka mikanda na bantu ya leta yina vandaka kuzinga bwala mosi ti Naboti, kutuba nde : «... Binga bantu yonso kisika mosi, ebuna tula Naboti na ntwala....»

10-11 Ntangu yai, tula bantu zole ya mabulu na ntwala na yandi. Bo funda yandi nde : « Nge me finga Nzambi ti ntotila na beto ! » Na nima, baka yandi...fwa yandi na matadi. » Bo salaka mambu ya Yezabele songaka bo.

14-15 Bo tindaka ndinga na Yezabele nde : “Naboti me fwa.” Ntangu Yezabele waka nsangu yina, yandi tubilaka Akabi nde : “Naboti me fwa. Ntangu yai, kwenda kubaka kilanga na yandi”

16 Ntangu Akabi waka mpidina, na mbala mosi yandi kwendaka kubaka kilanga yango, yo

kumaka na yandi.

? Yula bana bakestio.

🏠 Bana sala bageste.

👤 Bana yimba ti kina.

9.3 Nzambi ponaka Elia kusonga Akabi mbi na yandi ti ndola Nzambi me zenga sambu na yandi.

 **Tangila bana : 1 Bantotila 21 :17-32**

17-18 Ntangu yai, Mfumu Nzambi tubaka na profete Elia...nde" « Kwenda na Akabi, Ntotila ya Israele na bwala Samaria. Nge ta mona yandi ...na kilanga ya vinu ya Naboti. Yandi me kwenda kuna sambu na kubaka kilanga yina.

19 23 Songa yandi mambu yai ya Mono Mfumu Nzambi ke tuba na nge, nde : 'Nge me fwa muntu. Ntangu yai, nge ke zola kubotula mpi bima na yandi ?' Yo yina, Mono Mfumu Nzambi ke tuba nde...Fami na nge, Mono ta manisa yo sambu beno yala diaka ve.

? Yula bana bakestio.

🏠 Bana sala bageste.

👤 Bana yimba ti kina.

9.4 Akabi kudikulumusaka na ntwala ya Nzambi, ebuna Nzambi zengaka nde ndola yina ta kwisa na ntangu bana na yandi ta yinga yandi na luyalu.

 **Tangila bana : 2 Bantotila 21 :27-29**

27 Ntangu Akabi waka mambu ya Elia tubaka, yandi pasulaka bilele na yandi. Yandi lwataka saki. Yandi buyaka kudia. Yandi vandaka kutambula malembe-malembe ti mawa.

28-29 Ntangu yai, Mfumu Nzambi tubaka na profete Elia nde : « Nge me mona mutindu Akabi me kudikulumusa na meso na Mono ? Mpidina, Mono ta tindila yandi mpasi ve na bilumbu yai ya yandi ke na moyo, kansi Mono ta tindila fami na yandi mpasi na ntangu ya mwana na yandi me kuma ntotila. »

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Akabi vandaka mvwama, na mfunu ya kima ve.

Kansi yandi yantikaka kuyuma ntima sambu na kilanga ya Naboti. Kuyuma ntima natilaka yandi kaka mawa ti makasi. Yandi vandaka na madia ya mbote, kansi yandi monaka kiese ve na kudia yo. Ntangu Yezabele tubaka nde yandi ta simba kilangi ya Naboti, Akabi yulaka ve nki mutindu yandi ta sala yo, kana na mpila ya mbote to ya mbi. Yezabele salaka na mpila nde bantu tuba luvunu sambu bo fwa nkwa-ntoto, yandi botulaka ntoto na yandi.

Ntete, kuyuma ntima. Na nima, mawa, makasi, luvunu, kufwa muntu, kuyiba. Tala mambi yonso ya landaka sambu Akabi yumaka ntima.

♥ Verse ya Kulonguka :

Kuyuma ntima ve na ...konso kima ya ngani.

Kubasika 20:17

👤 Nkunga ya kwenda nzila mosi ti leso :

Mono Ta Mona Kiese

👤 Devoir sambu na bakristo :

Devoir mono ke pesa beno bakristo na mposo ke kwisa, yo yai : Beno tonda Nzambi sambu na bima yonso ya mbote Yandi me pesa beno. Kuyuma ntima ve na bima ya bantu ya nkaka.

✝ Invitation--bo ya me yamba Yesu ntete ve :

Nki mutindu muntu lenda vanda na ngolo kuzinga luzingu kukonda kuyuma ntima sambu na bima ya bantu ya nkaka ? Kaka Yesu Kristo lenda pesa beto ngolo kuzinga mutindu yina. Keti nge zaba Yesu Kristo ya kieleka ? Keti nge zaba nde nge me balula ntima, me zenga kulanda Yandi ?

Yesu bikisaka nzo na Yandi na zulu. Yandi kwisaka kukota nsi-ntoto sambu Yandi gulusa beto. Yandi zola kumisa nge mwana na Yandi. Yandi lenda pesa nge ngolo ya kubuya mpukumunu. O, kwisa na Yandi bubuyai.

Kana ntangu lunga : Longa mikanda ya Bible

 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 9

Leso 9

Profete Elia songaka Ntotila Akabi mbi yandi me sala kuyiba kilanga ya Naboti. Sambu na yo, fami na yandi ta yala Israele diaka ve.



Kuyuma ntima ve na
...konso kima ya ngani.

Kubasika 20 :17

Leso 10. Baprofete ya luvunu pesaka bamfumu conseye ya luvunu.

1 Bantotila 22 :1-28

I. PREPARASIO SAMBU NA MONITEUR-

🎯 Kikuma ya Leso :

Bana ta tesa malongi ya baprofete na Ndinga ya Nzambi, sambu baprofete ya luvunu mpi ikele.

♥ Verse ya Kulonguka :

Mpeve-Santu ke tuba mbote nde, na bilumbu ya nsuka, bantu ya nkaka ta bika lukwikilu ya kieleka. Bo ta lemfuka na bampeve ya luvunu ti na malongi na bampeve ya mbi. 1 Timoteo 4:1

👤 Bankunga ya kwenda nzila mosi ti leso :

Banzambi ya Nkaka
Vutuka, Afrika ! Vutuka !

II. REVISIO

↑ Kuyindula diaka baleso me luta :

Na mposo me luta, beto me mona nde Mfumu Akabi ti nkento na yandi Yezabele, bo salaka nki mambu ya mbi ? (Ee, Yezabele tindaka bantu ya luvunu, bo funda Naboti sambu yandi kufwa. Na nima, Akabi yibaka kilanga na yandi.)

Nki ndola Nzambi silaka bo? (Bana na bo ta yinga bo ve na kimfumu.)

III. KULONGA LESO YAI

➔ Kuyantika :

🏠 Malongi ya nene ya leso yai (developpement) na banti ya malongi 4 :

10.1 Yozafati, mfumu ya Yuda, zolaka sadisa Akabi, mfumu ya Israele, na mvita. Kansi yandi zolaka ntete kusosa nki Nzambi ta tuba.

📖 **Tangila bana : 1 Bantotila 22 :2-5**

2-4...Yozafati, ntotila ya Yuda, kwisaka kutala Akabi, ntotila ya Israele. Akabi yulaka Yozafati nde : « Ketu nge ta kwenda ti beto na kunwanisa bwala Ramoti ? » Yozafati vutulaka nde, «Ee, mono ke kwenda. Basoda na mono ti bampunda na mono mpi ke kwenda.

5 Kansi yula ntete Mfumu Nzambi.”

? Yula bana bakestio.

🏠 Bana sala bageste.

👤 Bana yimba ti kina.

10.2 Baprofete ya luvunu songaka bo kukwenda kunwana. Bo silaka nde Nzambi ta nungisa bo. Kansi Yozafati zolaka kusosa profete ya Nzambi. Yo yina, bo bingaka profete Mika.

📖 **Tangila bana : 1 Bantotila 22 :6-9**

6-7 Akabi bingaka baprofete kiteso ya 400. Yandi yulaka bo nde : “Ketu mono fwetu kwenda kunwanisa bwala Ramoti to ve?” Bo vutulaka nde, “Ee, kwenda kunwanisa yo. Mfumu Nzambi ta nungisa nge.” Kansi Yozafati yulaka nde: “Profete ya nkaka kele ve sambu beto lenda yula Mfumu Nzambi ?”

8 Akabi nde : “Ee, muntu ya nkaka kele zina ya Mika. Kansi mono zola yandi ve, sambu yandi ke tubila mono kaka mambu ya mbi...”

9 Ebuna Akabi tindaka muntu mosi ya kisalu kusosa Mika...

? Yula bana bakestio.

🏠 Bana sala bageste.

👤 Bana yimba ti kina.

10.3 Mika kutubaka nde bampeve ya mbi na munoko ya baprofete ya luvunu zolaka kubenda Akabi na mvita sambu yandi kufwa kuna.

📖 **Tangila bana : 1 Bantotila 22 :10-23**

10 Bantotila yina zole Akabi ti Yozafati me vanda na zulu ya bakiti ya kimfumu. Bo me lwata bilele na bo ya kimfumu. Baprofete yonso mpi kwisaka kutuba na ntuala na bo.

13 Muntu yina kwendaka kubinga profete Mika nde: “Baprofete yonso me tuba kiteso mosi nde ntotila ta nunga. Nge mpi, tuba mutindu yina. »

14 Kansi Mika vutulaka nde : « ...mono ta tuba mambu ya Mfumu Nzambi ta songa mono. »

22:15 ...Ntotila Akabi...yulaka yandi nde : «Mika, ketu beto fwetu kwenda kunwanisa bwala Ramoti to ve ? »

19 ...Mika tubaka diaka nde :”Wa mambu yina ya Mfumu Nzambi me songa mono. Mono me mona Mfumu Nzambi na zulu na kiti na Yandi ya kimfumu, bawanzio kutelama na lweka na Yandi...”

20 Yandi yulaka nde : *“Nani ta kwenda kukusa Akabi nde yandi kwenda kunwanisa bwala Ramoti, mpidina bo fwa yandi ? ...*

21-23 Ebuna mpeve mosi kwisaka kutuba na Mfumu Nzambi nde : *“Mono ta kwenda kukusa yandi...Mono ta sala na mpila nde baprofete yonso ya Akabi kutuba luvunu.” ...Ebuna Mika manisaka na kutuba nde : « Mfumu, ntangu yai nge ke mona mutindu...baprofete yai yonso me kusa nge....*

? Yula bana bakestio.

🏠 Bana sala bageste.

👑 Bana yimba ti kina.

10.4 Baprofete ya nkaka vandaka kusaula Mika, ti Mfumu tulaka yandi na prison. Kansi yo salamaka na Akabi kaka mutindu Mika me tuba, sambu Mika tubaka ndinga ya Nzambi.

📖 Tangila bana : 1 Bantotila 22 :24-28, 34, 37

24 Ntangu yai, profete mosi kwendaka kubula Mika mbala na ditama. Yandi tubaka nde : *“Nki mutindu Mpeve ya Mfumu Nzambi me katuka na mono sambu na kutuba na nge ?”*

26-27 Ebuna Ntotila Akabi tubaka na sielo na yandi mosi nde : *“Kanga Mika....Songa bo kutula yandi na boloko. ”*

28 Mika nde : *“Kana nge kwisa vutuka mbote, tuba nde Mfumu Nzambi tubaka ve na munoko na mono.” ...*

34 (Na kati ya mvita yina), muntu mosi losaka toloto, ti yo simbaka Ntotila Akabi na sika ya yandi vandaka ve na protektio...

37 Yo yina Akabi fwaka...

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Bamfumu ya Yuda ti ya Israele vandaka na mfunu kuzaba kana Nzambi ta nungisa bo na mvita. Bo yulaka baprofete mingi ya monikaka bonso mitubi

ya Nzambi. Kansi bo vandaka baprofete ya luvunu. Bo tubaka na ngolo ya bampeve ya mbi.

Lukanu ya bampeve yina vandaka kubenda Mfumu Akabi sambu yandi kufwa na mvita. Kansi Akabi zolaka ve kundima Ndinga ya Nzambi, kansi kaka bandinga ya baprofete ya luvunu. Aii, yo ke nata yandi na lufwa !

👏 Devoir sambu na bakristo :

Bible ke tuba nde baprofete ya luvunu kele mingi. Beto fweti tesa malongi ya bantu yonso, kuzaba kana yo ke kwenda nzila mosi na Ndinga ya Nzambi. Kana yo ke kwelana ve, yo kele luvunu, malongi ya mpeve ya mbi.

Kuzenga nani profete ya luvunu, yo lomba nde beto zaba ntete nki Nzambi me tuba. Keti nge kele kutanga to kuwa ndinga na Yandi konso lumbu ? Kana ve, yantika kusala yo na mposi yai.

♥ Verse ya Kulonguka :

Bana tuba verse fraze na fraze na nima ya nge, moniteur. Na nima, bo yika bageste. Kana bo me tuba yo mbala 4, nge yantika kutuba yo, ebuna nge kanga ti songa diboko na mwana mosi. Yandi fweti manisa fraze yina. Na nsuka, bo yonso telama ti tuba yo yonso.

✝ Invitation--bo ya me yamba Yesu ntete ve :


Malongi ya luvunu kele mingi ya ke zola kukanga nge nzila kukwenda na zulu. Kana muntu songa nge nde, “Kaka sala mbote. Nzambi ta yamba nge na zulu,” yina kele luvunu. Bible ke songa beto nde « Beto gulukaka ve sambu beto salaka mambu ya mbote, kansi ...sambu Yandi wilaka beto mawa. » (Tite 3 :5).

Tula ntima na Yesu, ebuna nge ta baka moyo.

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 10



Leso 10

Baprofete
mingi
tubaka
luvunu.
Kaka
profete
Mika
tubaka
mambu ya
kieleka.
Mfumu
zolaka
kuwa yo
ve, kansi
yo
vandaka
mambu ya
kieleka.

**Mpeve-Santu ke tuba mbote nde,
na bilumbu ya nsuka,
bantu ya nkaka ta bika lukwikilu
ya kieleka.**

**Bo ta lemfuka na bampeve ya
luvunu ti na malongi ya bampeve
ya mbi.**

1 Timoteo 4:1

Leso 11. Basoda ya Mfumu Yozafati nungaka mvita na bankunga ya kumisa Nzambi.

2 Bansangu 20 :1-30

I. PREPARASIO SAMBU NA MONITEUR-

🎯 Kikuma ya Leso :

Bana ta kumisa Nzambi mingi, sambu Yandi ke lunga na kubaka lukumu, mpi sambu Yandi zola sadisa bantu na yandi bu bo kumisa Yandi.

♥ Verse ya Kulonguka :

Ntangu bo yantikaka kuyimba nkunga, Mfumu Nzambi kumisaka basoda ya bambeni kisakasaka. Bo yantikaka kunwana bo na bo. 2 Bansangu 20 :22

🗣️ Bankunga ya kwenda nzila mosi ti leso :

Kumisa Nzambi

Kumisa Zina ya Yesu

II. REVISIO

↑ Kuyindula diaka baleso me luta :

Akabi waka ndinga ya Nzambi ya songaka yandi kunwana to kunwana ve ? (Kana yandi nwana mvita yina, yandi ta fwa po pana.) Kansi Akabi wilaka ndinga ya Nzambi ve. Yandi kotaka mvita, ebuna nki salamaka ? (Yandi fwaka, kaka mpila Nzambi songaka.)

III. KULONGA LESO YAI

➔ Kuyantika :

Na mposo ya me luta, beto monaka mpila Mfumu Akabi fwaka sambu yandi kwikilaka ve ndinga ya Nzambi. Akabi vandaka Mfumu ya Kimfumu Israele, na nordee parti ya ntoto. Keti beno bambuka mfumu ya vandaka kusolula ti yandi, mfumu ya zolaka kuyula profete ya Nzambi? Yandi Yozafati, mfumu ya sude parti ya ntoto ya Israele, ya bo bingaka Kimfumu ya Yuda. Yozafati zolaka Nzambi mingi. Bubuyai beto ta mona mpila Nzambi sadisa yandi na mvita ya nkaka.

🏠 Malongi ya nene ya leso yai (developpement) na banti ya malongi 4 :

11.1 Bambeni kwisaka mingi kunwanisa Mfumu

Yozafati ti bantu ya Yuda. Na boma, Yozafati twadisaka bantu ya Yuda kusosa Nzambi ngolo.

📖 Tangila bana : 2 Bansangu 20 :1-10

1-2 Na nima, bantu kwisaka kuzabisa Ntotila Yozafati nde : « Basoda mingi ke kwisa kunwanisa nge bitumba....

3 Boma simbaka Yozafati. Yandi tubaka nde yandi fweti yula Mfumu Nzambi. Yandi songaka bantu yonso ya ntoto ya Yuda na kubuya kudia.

4 Bantu katukaka na babwala yonso ya Yuda. Bo kwisaka na Yeruzalemi sambu na kusamba Mfumu Nzambi sambu Yandi sadisa bo.

5-6 Yozafati telamaka na kati-kati ya lupangu ya Nzo-Nzambi. Bantu ya Yuda ti ya Yeruzalemi me ziunga yandi, ebuna yandi sambaka Nzambi nde, “Mfumu Nzambi...Nge ke yala zulu ti ntoto. Nge ke vandaka na ngolo mingi mpenza. Muntu lenda kuka Nge ve.

10-12 « Mfumu Nzambi, tala. Ntangu yai, bantu ya Amoni ti Moabi ti Edomi ke kwisa kunwanisa beto...Beto ke na ngolo ve. Beto ke kuka ve kunwana na basoda yai mingi-mingi. Beto ke zaba ve nki beto fweti sala. Yo yina, beto ke tula meso na Nge.”

❓ Yula bana bakestio.

🏠 Bana sala bageste.

🗣️ Bana yimba ti kina.

11.2 Profete Yahaziele songaka bo nde mvita yai kele ya bo ve, kansi ya Nzambi.

📖 Tangila bana : 2 Bansangu 20 :14-17

20 :14 Mpeve ya Mfumu Nzambi bwilaka Yahaziele....

15 Yandi tubaka nde: “Beni yonso bantu ya Yuda ti Yeruzalemi, ti nge mpi Mfumu Yozafati, beni wa mbote-mbote. Mfumu Nzambi ke tuba: “Vanda kikesa. Tina basoda yai mingi boma ve. Bitumba yai me tadila beni ve, kansi yo me tadila Mono, Nzambi.

17 Beni ta vanda na mfunu ya kunwanisa bo ve. Beni ta telama kaka pana, beni vingila.

*Beno ta mona mutindu Mono ta gulusa beno.
Mona boma ve. Tekita va. Kwenda kaka
kutana ti bo. Mono Mfumu Nzambi ta vanda
na beno.*

? Yula bana bakestio.

🕯 Bana sala bageste.

🕯 Bana yimba ti kina.

11.3 Bo yantikaka kaka kumisa Nzambi na bankunga.

 **Tangila bana : 2 Bansangu 20 :20-21**

*20 Na kilumbu landaka na suka-suka, bantu
kwendaka...Ntangu bo zolaka kwenda, Yozafati
tubaka na bo nde : « Tula ntima na Mfumu
Nzambi, ebuna beno ta nunga. »*

*21 Yozafati songaka bantu ya nkaka kubula
miziki. Yandi tulaka bo na ntuala ya basoda
sambu na kukumisa Mfumu Nzambi nde :
« Lukumu na Mfumu Nzambi, kuzola na Yandi
ke manaka ve ! »*

? Yula bana bakestio.

🕯 Bana sala bageste.

🕯 Bana yimba ti kina.

11.4 Ntangu bo yantikaka kumisa Nzambi, Nzambi tindaka bawanzio na yandi kutula mbeni na bo kisaka-saka. Bantu ya Yuda nungaka kukonda kunwana. Bo vutukaka kaka na kumisa Nzambi .

 **Tangila bana : 2 Bansangu 20 :22-29**

*22 Ntangu bo yantikaka kuyimba nkunga,
Mfumu Nzambi kumisaka basoda ya bambeni
kisaka-saka. Bo yantikaka kunwana bo na bo.*

*27 Yozafati vutulaka basoda na yandi na
Yeruzalemi na kiese yonso, sambu Mfumu
Nzambi bedisaka bambeni na bo.*

*28-29 Bo kwisaka kukota na bwala na kubula
bagitare ti bampung. Ntangu nsangu
panzanaka, bantu ya bantoto yonso yantikaka
kutina Nzambi boma.*

? Yula bana bakestio.

🕯 Bana sala bageste.

🕯 Bana yimba ti kina.

>|< Kumanisa Malongi :

Profete ya Nzambi songaka Mfumu Yozafati nde bo nwana ve na mvita yina, kansi bo kaka kumisa Nzambi na bankunga. Ebuna, na mpila bo pesaka Nzambi lukumu, Yandi mpi sadisaka bo. Yandi tindaka bawanzio na Yandi sambu na kunwanisa bambeni na bo. Bambeni kumaka kisaka-saka. Bo yantikaka kunwana bo na bo. Bantu ya Yuda vutukaka na kiese yonso. Nzambi nwanisaka bambeni na bo ntangu bo yimbilaka Yandi bankunga. O, Nzambi ke zola mingi beto kumisa Yandi. Yandi zola sadisa bo ya pesa Yandi lukumu.

♥ Verse ya Kulonguka :

Bana tuba verse fraze na fraze na zulu ya nge. Na nima, kabisa bo na bandambu zole. Ndambu mosi tuba verse ti ndambu ya zole sala yo theatre. Na nima bo me tuba yo mbala 3, balula bandambu. Bo ya tubaka, bo sala theatre, ti bo ya salaka theatre, bo tuba. Na nsuka, bo yonso tuba yo.

🖐 Devoir sambu na bakristo :

Bana bakristo, na mposho yai, beto kumisa Nzambi kuluta. Beto kumisa Yandi konso lumbu na bankunga. Nzambi ke na kiese kana beto pesa Yandi lukumu na ntima na beto yonso.

✝ Invitation--bo ya me yamba Yesu ntete ve :

Mbala ya nkaka ntima na nge zola mingi ve kumisa Nzambi. Yai lenda vanda sambu kieleka, nge ke zaba Yandi ve. Yo lenda vanda sambu nge me yamba Yesu ntete ve bonso Mvulusi ti Mfumu na nge. O, tula ntima na Yandi bubuyai. Binga Yandi sambu Yandi vulusa nge ti lolula masumu yonso ya nge. Yandi ta kitula nge mpi mukristo, ti Yandi ta pesa nge ntima ya zola kumisa Yandi.

Kana ntangu lunga : Longa mikanda ya Bible

 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 11

Leso 11



Ntangu bo yantikaka **kuyimba nkunga**, Mfumu Nzambi kumisaka basoda ya bambeni kisakasaka. Bo yantikaka kunwana bo na bo.

2 Bansangu 20:22

Leso 12. Mfumu ya Yuda Yozafati tindaka balongi ya ndinga ya Nzambi, kansi bantu waka ve.

1 Bantotila 22 :41-50, 2 Bansangu 17, 19, 20

I. PREPARASIO SAMBU NA MONITEUR-

🕒 Kikuma ya Leso :

Ntangu bana kuwa malongi ya Nzambi, bo ta tula ntima mpi kulanda yo.

♥ Verse ya Kulonguka :

...Beno ta sosa Mfumu Nzambi. Kana beno sosa Yandi na ntima yonso mpenza, beno ta mona Yandi. Kulonga 4 :29

👤 Bankunga ya kwenda nzila mosi ti leso :

Sosa Ntete

Kana Nge Me Vuluswa

II. REVISIO

👤 Kuyindula diaka baleso me luta :

Na mposo me luta, beto monaka mpila Nzambi nungisaka Mfumu Yozafati ti bantu na yandi na ntangu ya kingonsa, kaka ntangu bo kumisaka Yandi na bankunga. Bubuyai, beto ta mona nsuka ya luzingu ya Yozafati.

III. KULONGA LESO YAI

➡ Kuyantika :

Kana nge me zwa kima ya mbote, keti nge zola bampangi na nge kuvanda na yo mpi ? Ee. Konso kima ya mbote, beto zola kaba yo na bampangi ya nkaka. Yozafati sosaka Nzambi na ntima na yandi yonso, ti Nzambi sadisaka yandi na mambu mingi. Yandi zabaka nde kukwikila na Mfumu Nzambi, yo kele mambu mosi ya mbote. Yandi talaka bampangi na yandi, bantu ya Yuda. Mingi na kati na bo me kangama na biteki ya mbi. Biteki yina lendaka kusadisa bo ve. Biteki yina ta sala bo mbi, sambu yo me kangama na bampeve ya mbi. Nki Yozafati lenda sala sambu na kusadisa bampangi ?

🏠 Malongi ya nene ya leso yai (developpement) na banti ya malongi 4 :

12.1 Yozafati katulaka biteki na ntoto ya Yuda.

📖 Tangila bana : 2 Bansangu 17 :3-6

3 Mfumu Nzambi vandaka na Yozafati sambu

yandi vandaka kulanda bifu ya mbote. Yandi vandaka kusambila ve nzambi Baale.

4 Kansi yandi vandaka kutula ngolo kuzaba luzolo ya Nzambi ... ti kulemfukila bansiku ya Nzambi....

6 Ntima na yandi vandaka kumona kiese kulanda luzolo ya Mfumu Nzambi. Yandi fwaka bisika yonso ya kusambila biteki na ntoto ya Yuda....

? Yula bana bakestio.

🏠 Bana sala bageste.

👤 Bana yimba ti kina.

12.2 Yozafati yandi mosi longaka bantu ndinga ya Nzambi, ti yandi tindaka banlongi sambu na kulonga yo. Yandi tindaka mpi bazuzi kuzenga makambu na mpila ndinga ya Nzambi tubaka. Kiese ya nene !

📖 Tangila bana : 2 Bansangu 19 :4, 17 :4-9, 19 :5-6

19 :4 Ntotila Yozafati konso ntangu vandaka kubinga bantu kukwisa kuvutuka na Mfumu Nzambi...

2 Bansangu 17 :4 Yandi vandaka kutula ngolo kuzaba luzolo ya Nzambi...ti kulemfuka na bansiku ya Nzambi. Yandi vandaka kulanda ve bifu ya bantotila ya Israele.

7 Yandi tindaka bantu tanu kukwenda kulonga bantu ya babwala ya Yuda.

8 Bo kwendaka nzila mosi na banganga-Nzambi zole ti bantu uvwa ya dikanda ya Levi...

9 Bo nataka Mukanda ya Bansiku ya Mfumu Nzambi, ebuna bo tambulaka na babwala yonso ya Yuda sambu na kulonga bantu.

19 :5-6 Yandi tulaka bazuzi na konso bwala ya ngolo na kimfumu ya Yuda ti songaka bo nde : "Beno sala kisalu na nzila ya mbote, sambu beno ke zengaka makambu na zina ya bantu ve, kansi na zina ya Mfumu Nzambi.

? Yula bana bakestio.

🏠 Bana sala bageste.

👤 Bana yimba ti kina.

12.3 Kansi ata bo waka ndinga ya Nzambi, bantu ya Yuda yidikaka ve ntima na bo kusosa Nzambi.

Mawa na bo !**Tangila bana : 2 Bansangu 20 :31-33***31-32 Yozafati ... vandaka kusala mambu ya mbote na meso ya Mfumu Nzambi.**33 Kansi bisika ya kusambila banzambi ya biteki, yandi fwaka yo ve kimakulu. Mpidina, bantu vandaka kudipesa ve na ntima na bo yonso na Nzambi...***? Yula bana bakestio.****🏠 Bana sala bageste.****👤 Bana yimba ti kina.**

12.4 Bana ya Yozafati monaka mpila yandi landaka Nzambi. Kansi na nima yandi fwaka, mwana na yandi Yorami landaka Nzambi ve. Yandi fwaka bampangi yonso ti salaka mbi na ntwala ya Nzambi. O, mawa mingi !

**Tangila bana : 2 Bansangu 21 :1-6***1 Ntangu Yozafati kufwaka, Mwana na yandi Yorami bikaka kuyinga yandi na kimfumu.**2 Yorami vandaka na bampangi sambanu ya babakala.**4 Ntangu Yorami me kumisa kimfumu na yandi ngolo, yandi fwaka bampangi na yandi yonso sambanu, ti bambuta ya nkaka ya Israele.**6 Yandi landaka bifu ya mbi ...mutindu vandaka bifu ya fami ya Akabi, sambu yandi kwelaka mwana ya ntotila Akabi. Yorami vandaka kusala masumu na meso ya Mfumu Nzambi.***? Yula bana bakestio.****🏠 Bana sala bageste.****👤 Bana yimba ti kina.****>|< Kumanisa Malongi :**

Nzambi sakumunaka bantu ya Yuda kupesa bo Mfumu ya zolaka Nzambi ti tulaka ngolo kulanda Yandi. Mfumu Yozafati tindilaka bo banlongi sambu bo mpi zaba ndinga ya Nzambi. Bo waka malongi ya Nzambi, kansi bo yidikaka ve ntima na bo kulanda yo. O, mawa ! Mwana ya Yozafati, Yorami, yingaka tata, kansi yandi kwendaka nswalu

kusala mbi, sambu na ntima na yandi, yandi zengaka ve kulanda Nzambi.

**Devoir sambu na bakristo :**

Bana bakristo, nki mutindu beno ke wa ndinga ya Nzambi ? (Na nzo-Nzambi, na malongi ya ecodim, ti na kutanga to kuwa Bible na nzo.) Nki mutindu beno lenda sadisa bampangi ya nkaka sambu bo mpi kuwa yo? (Kulomba bo kukwenda na bisambu to na ecodim ti nge, kutangila bo ndambu ya Bible, kulomba bo kukwisa kuwa ntangu muntu ya nkaka kutanga yo.) Na mposo yai, beto sosa mpila kubenda mpangi ya nkaka, bo mpi kuwa ndinga ya Nzambi.

**Verse ya Kulonguka :**

Bana tuba verse fraze na fraze na nima ya nge, moniteur. Yula bana nki bandinga bo mona na verse kuluta mbala mosi. (beno, sosa) Kabisa bana na bandambu, ti konso ndambu tuba yo na ndinga ya nkaka (na zulu, na nsi, na ngolo, ya pima, etc.)

**Bankunga ya kwenda nzila mosi ti leso :**

Sosa Ntete

Kana Nge Me Vuluswa

**Invitation-- bo ya me yamba Yesu ntete ve :**

Keti nge kele bonso Mfumu Yozafati, yina landaka Nzambi na ntima na yandi yonso ? To, keti nge kele bonso bantu ya Yuda, yina waka ndinga ya Nzambi kansi bo yidikaka ntima ve kusosa Nzambi ? To bonso Yorami, yina waka malongi ya tata ti monaka luzingu ya kinzambi na yandi, kansi yandi mosi zengaka nde yandi ta landa na nzila yina ve ? Ketu nge me yamba Yesu Kristo na ntima na nge yonso ? Ketu nge kele kulanda Yesu Kristo ?

Ata tata ti mama na nge ke landa Nzambi, nge fweti zenga kana nge mpi ta kuma mulonguki ya Yesu. Kana nge ke zaba ve mbote-mbote, bubuyai nge lenda zikisa mambu yina.

Kana ntangu lunga : Longa mikanda ya Bible

Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 12

Leso 12



Mfumu
Yozafati
tindaka
balongi
sambu na
kulonga
bantu
Ndinga ya
Nzambi,
kansi bo
wilaka
malongi
yina ve.

**...Beno ta sosa Mfumu Nzambi.
Kana beno sosa Yandi na
ntima yonso mpenza,
beno ta mona Yandi.**

Kulonga 4 :29

Leso 13. Nzambi bakaka Elia na zulu na pusupusu ya tiya. Ebuna Elisa yingaka Elia bonso profeti.

2 Bantotila 2 :1-25

I. PREPARASIO SAMBU NA MONITEUR-

🎯 Kikuma ya Leso :

Bana ta landa Nzambi ata bantwadisi kuchanger, sambu bo ta bakisa nde Nzambi kele kiteso mosi. Yandi ke changaka ve.

♥ Verse ya Kulonguka :

Yesu Kristo kiteso mosi na bilumbu ya ntama, ti bubu yai, ti mvu ya mvu. Ba-Ebreo 13 :8

👤 Nkunga ya kwenda nzila mosi ti leso :

Mazono, Bubu, Mvu ya Mvu

II. REVISIO

👤 Kuyindula diaka baleso me luta :

Elia me manisa kisalu ya kiprofete na yandi. Yandi me binga Elisa, ti yandi me sala sikamosi ti yandi. Ntangu yai, nsuka ya luzingu ya Elia na ntoto yai me kuma penepene.

III. KULONGA LESO YAI

➡ Kuyantika :

Keti nge me vanda na dibundu sika nge zolaka pasteur to ntwadisi mingi ? Kansi na nima, pasteur ya nkaka kwisaka. To mbala ya nkaka nge vandaka na longi ya nge zolaka mingi, to ntwadisi ya chorale. Nki bantu ya Nzambi fweti sala ntangu Nzambi pesa bo ntwadisi ya mpa ? Beto tala bubuyai mutindu Elisa salaka ntangu Nzambi bakaka longi na yandi Elia.

🏠 Malongi ya nene ya leso yai (developpement) na banti ya malongi 4 :

13.1 Elisa vandaka kutambula ti longi na yandi Elia. Nzambi songaka yandi ti baprofete ya nkaka nde ntangu me lunga nde Nzambi kubaka Elia.

📖 Tangila bana : 2 Bantotila 2 :1-3

1 Ntangu Mfumu Nzambi tombulaka Elia na zulu na kati ya mupepe ya ngolo, Elia vandaka na nzila ti Elisa...

2 Ebuna ...Elia tubaka na Elisa nde : « Bikala awa... » Kansi Elisa vutulaka nde : « Monota bika nge ve. »

3 Ndonga ya baprofete ...kwisaka kusonga Elisa nde : « Ketu nge ke zaba nde bubu yai Mfumu Nzambi ke katula nge mfumu na nge, Yandi ke nata yandi na zulu ? » Elisa nde, « E, mono me zaba... »

? Yula bana bakestio.

🏠 Bana sala bageste.

👤 Bana yimba ti kina.

13.2 Na ngolo ya Nzambi, Elia kangulaka masa ya Yordani na kazaka na yandi.

📖 Tangila bana : 2 Bantotila 2 :8

8 Ntangu yai. Elia bakaka kazaka na yandi, yandi bulaka yo na masa. Masa kabanaka na ndambu zole, ebuna yandi ti Elisa kwendaka na simu na zulu ya ntoto ya kuyuma.

? Yula bana bakestio.

🏠 Bana sala bageste.

👤 Bana yimba ti kina.

13.3 Elisa lombaka Elia nde mpeve ya Nzambi kuvanda na yandi duble mpila Yandi me vanda na Elia. Elia nde : kana nge mona ntangu mono kwenda na zulu, yo ta salama mpidina.

📖 Tangila bana : 2 Bantotila 2 :9

9 Ntangu bo me sabuka imene, Elia songaka Elisa nde : « Awa ya Mfumu Nzambi me katula mono ntete ve, songa mono nki nge zola mono sala nge. » Elisa vutulaka nde : « Pardo, bikila mono mpeve na nge ya kiprofete mbala zole. Mpidina mono ta zaba kuyinga nge. »

10 Elia nde : « Nge me lomba kima mosi ya ngolo, kansi nge ta baka yo kana nge mona ntangu Nzambi ke katula mono. Kana ve, nge ta baka yo ve. »

? Yula bana bakestio.

🏠 Bana sala bageste.

 Bana yimba ti kina.

13.4 Elisa monaka Nzambi kubaka Elia na zulu na bampunda ti pusupusu ya tiya. Yo yina, ntangu yandi vutukaka, yandi kangulaka masa ya Yordani kaka mpila Elia salaka. Mpidina, baprofete yonso monaka nde Mpeve ya Nzambi vandaka na yandi.

 **Tangila bana : 2 Bantotila 2 :11-15**

11 Ntangu bo vandaka kukwenda ti kusolula na nzila, pusupusu mosi ya tiya ti bampunda ya tiya kwisaka, ebuna mupepe ya ngolo nataka Elia ti na zulu.

12 Elisa ...yantikaka kudila Elia nde : « Tata na mono, tata na mono !” Mawa simbaka Elisa ngolo...

13-14 Ebuna yandi lokutaka kazaka ya Elia ya kubwaka na ntoto. Yandi kwendaka kutelama na lweka ya Yordani, ebuna yandi bulaka kazaka ya Elia na masa ti kutuba nde : “Wapi ...Nzambi ya Elia ?” Masa kabanaka, ebuna yandi sabukaka na ntoto ya kuyuma tii na simu.

15 Ntangu baprofete ya nkaka monaka Elisa na simu, bo tubaka nde : “Mpeve yina vandaka kunata Elia, Yandi me kuma na Elisa!”....

? Yula bana bakestio.

 **Bana sala bageste.**

 **Bana yimba ti kina.**

>|< Kumanisa Malongi :

Nzambi bakaka profete Elia na zulu, kansi ngolo ya Nzambi manaka ve. Ngolo ya Mpeve ya Nzambi kwisaka na Elisa, na mpila yandi me lomba. Elisa vandaka na mpila kusala bimpa kaka kiteso mosi na yina ya Elia salaka. Bansadi ya Nzambi ke fwaka. Bo ke kwenda kusadila Nzambi na sika ya nkaka. Bansadi ya nkaka ke kwisaka, kansi ngolo ya Nzambi kele kiteso mosi. Yo kele kushanger ve. Beto landa Yandi kaka.

 **Verse ya Kulonguka :**

Kabisa bana na bandambu iya. Konso ndambu ya bana telama ti tuba fraze mosi ya verse. Na nima bo me tuba mbala tatu, bo yonso tuba yo nzila mosi. Yula mwana mosi kutendula verse. Na nsuka, yula nani lenda tuba yonso yandi mosi.

 **Nkunga ya kwenda nzila mosi ti leso :**

Mazono, Bubu, Mvu ya Mvu

 **Devoir sambu na bakristo :**

Beno bakristo, devoir mono ke pesa beno, yo yai : Beno landa Nzambi na mposho yai, ata beno ke zola mingi bantwadisi kele na ntwala na beno, ata beno zola bo mingi ve. Beto ke landa bantu ve, kansi Nzambi.

 **Invitation sambu na bo ya me yamba Yesu ntete ve :**

Bu ntangu lungaka Elia kukwenda na zulu, yandi vandaka na boma ve. Yandi zabaka nde Nzambi ta vanda na yandi ti Nzambi ta baka yandi na nzo na Yandi.

Keti nge zaba Nzambi mutindu yina ? Ketu nge zaba nde kana Nzambi baka moyo na nge bubuyai, nge ta kwenda na bwala na Yandi ? Ketu nge zaba nde Yesu Kristo me lolula masumu yonso ya nge ? Kana nge kele ve sur, nge lenda zenga mambu yina bubuyai. Kana nge ke na mfunu ya lusadisu, kwisa kumona beto na nima ya ecodim. Beto ta vanda na kiese kusadisa nge.

Kana ntangu lunga : Longa mikanda ya Bible

 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 13



Leso
13

Nzambi nataka Elia na zulu na kati ya pusupusu ya tiya. Elisa monaka yo, ebuna yandi zabaka nde yandi na yinga Elia na kiprofete.

**Yesu Kristo kiteso mosi
na bilumbu ya ntama,
ti bubu yai,
ti mvu ya mvu.**

Ba-Ebreo 13 :8

Leso 14. Elisa sadisaka mufwidi ya kinzambi kubaka mafuta.

2 Bantotila 4 :1-7

I. PREPARASIO SAMBU NA MONITEUR-

🎯 Kikuma ya Leso :

Bana ta tula Nzambi ntima na kusadisa bo na konso kima beto ke na yo mfunu.

♥ Verse ya Kulonguka :

Nzambi na beto ta pesa beno bima yonso ya beno ke na yo mfunu, bonso kele kimvwama na Yandi na Yesu Kristo. Filipi 4:19

🗨️ Bankunga ya kwenda nzila mosi ti leso :

Lomba na Nzambi Kaka
Nani Kele Ngolo ?

II. REVISIO

👆 Kuyindula diaka baleso me luta :

Beto me mona nde Nzambi bakaka moyo ya Elia, kansi Elisa yingaka yandi na kiprofete. Ngolo ya Nzambi vandaka na Elisa bonso yo vandaka na Elia.

III. KULONGA LESO YAI

➡ Kuyantika :

Beto kele na mfunu ya bima mingi na luzingu yai. *[Bana lenda tuba mbandu bonso lele, madia, masa, etc.]* Kansi nki beto ta sala kana ntangu ya mpasi kwisa, ti bima ya beto ke na yo mfunu, beto ke mona yo ve ? Elisa kutaka nkento ya vandaka na mpasi mutindu yina.

🏠 Malongi ya nene ya leso yai (developpement) na banti ya malongi 4 :

14.1 Mufwidi ya profete mosi songaka Elisa mpasi na yandi : Bakala me fwa, ti yandi me bikala na bamfuka. Kana yandi futa ve, bantu zola baka bana na yandi zole, bo kuma bampika.

📖 Tangila bana : 2 Bantotila 4 :1

1 Kilumbu mosi mufwidi ya nkento mosi kwisaka kudidila profete Elisa. Bakala na yandi vandaka profete. Nkento tubilaka Elisa nde : “Mfumu, bakala na mono me fwaka. Nge zaba

nde yandi vandaka kusamba Mfumu Nzambi ngolo. Kansi tala, ntangu yai, muntu mosi ya beto fweti futa mfuka, yandi me kwisa kubaka bana na mono zole. Yandi zola kumisa bo bampika sambu na mfuka yina.”

? Yula bana bakestio.

🏠 Bana sala bageste.

🗨️ Bana yimba ti kina.

14.2 Elia yulaka nkento nki yandi vandaka na yo. Yandi vutulaka nde, Kaka mulangi mosi ya fioti ya mafuta.

📖 Tangila bana : 2 Bantotila 4 :2

2 Elisa yulaka yandi nde : “...Songa mono nki nge ke na yo na nzo. » Nkento vutulaka nde : « Kima mingi ve, kaka mulangi ya fioti ya mafuta. »

? Yula bana bakestio.

🏠 Bana sala bageste.

🗨️ Bana yimba ti kina.

14.3 Elia songaka yandi kudefa milangi mingi, ebuna kutula mafuta na yo. Ebuna yandi salaka mpidina, ti milangi yonso fulukaka.

📖 Tangila bana : 2 Bantotila 4 :3-6

4 :3 Elisa nde: “Kwenda na bantu yina ke vandaka penepene na nge. Defa tumilangi mingi ya mpamba na kati. Baka yo mingi.

4 Ebuna kota na nzo ti bana na nge. Kanga kielo. Ntangu yai, yantika kutula mafuta na milangi yina. Konso mulangi me fuluka, tula yo na lweka.”

5 Nkento yango kwendaka ka yandi. Yandi kotaka na nzo ti bana na yandi ti kangaka kielo. Ebuna yandi yantikaka kutula mafuta na kati ya tumilangi ya bana natilaka yandi.

6 Ntangu bo me fulusa milangi yonso, yandi yulaka kana ya nkaka me bikala. Mwana mosi tubaka nde : “Yonso me mana.” Ntangu yai, mafuta mpi basikaka diaka ve.

? Yula bana bakestio.

🏠 Bana sala bageste.

🗨️ Bana yimba ti kina.

14.4 Elisa songaka mufwidi kuteka mafuta sambu na kufuta bamfuka, ebuna kuzinga na yina me bikala.



Tangila bana : 2 Bantotila 4 :7

7 Nkento vutukaka na profete Elisa ti songaka yandi mambu yina yonso. Elisa tubaka na yandi nde : “Kwenda kuteka mafuta yina. Na mbongo yina, futila mfuka yonso. Mbongo yina ta bikala, zingila ti bana na nge. »

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Mufwidi yina sosaka lusadisu ya Nzambi na nzila ya profete na Yandi. Yandi landaka yonso profete Elisa songaka yandi kusala. Yo yina, Nzambi sadisaka yandi. Yandi manisaka bamfuka, ti yandi zwaka mafuta ya sadisaka yandi ti fami, bo kudia. Nzambi zaba yonso ya beto ke na yo mfunu. Yandi zola sadisa beto ntangu beto sosa Yandi.



Devoir sambu na bakristo :

Nki nge ti fami na nge ke na yo mfunu ? Devoir mono ke pesa beno bakristo, yo yai : Na mposho yai, sosa lusadisu ya Nzambi na yonso beno ke na yo mfunu, Yandi sadisa beno.



Verse ya Kulonguka :

Bana tuba verse fraze na fraze na nima ya nge, moniteur, mbala 2. Na nima, bo tuba yo na diboko mosi na zulu, na diboko ya nkaka na zulu, na dikulu mosi, na dikulu ya nkaka.



Bankunga ya kwenda nzila mosi ti leso :

Lomba na Nzambi Kaka

Nani Kele Ngolo ?



Invitation sambu na bo ya me yamba Yesu ntete ve :

Mambu mosi ya beto yonso ke na yo mfunu kele ndolula sambu na masumu na beto. Beto yonso me yungana, me vila nzila ya Nzambi. Beto ke na mfunu ya Mvulusi kuvutula beto na nzila ti kutula beto mbote diaka ti Nzambi. Kaka Yesu Kristo kele Mvulusi yina lenda sala yo.

Keti nge me tula Yandi ntima ? Kana ve, keti nge ta sala yo bubu ?

Kana ntangu lunga : Longa mikanda ya Bible



Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 14

Leso 14



**Nzambi na beto ta pesa beno
bima yonso ya beno ke na yo
mfunu,
bonso kele kimvwama na Yandi
na Yesu Kristo.**

Filipi 4:19

Leso 15. Elisa belulaka Namani, soda ya Syrie, ya maladi ya lepre.

2 Bantotila 5 :1-14

I. PREPARASIO SAMBU NA MONITEUR-

🕒 Kikuma ya Leso :

Bana ta tina lulendo, ti bo ta kudikulumusa na ntwala ya Nzambi. Bo ta ndima nde Yandi ke sala na mpila na Yandi, sambu Yandi kele Nzambi.

♥ Verse ya Kulonguka :

Beno kudikulumusa na meso ya Mfumu Nzambi, ebuna Yandi ta tombula beno. Yakobo 4 :10

🗨 Bankunga ya kwenda nzila mosi ti leso :

Kudikulumusa na Meso ya Nzambi
Mo' Ta Kwise na Nzambi na Lulendo Ve

II. REVISIO

👉 Kuyindula diaka baleso me luta :

Beto me mona bimpa ya Elisa salaka na ngolo ya Mpeve ya Nzambi—mpila yandi kangulaka nzadi ya Yordani, mpila yandi sadisaka mfwidi sambu mafuta kuma mingi. Bubuyai beto ta mona nde yandi sadisaka muntu ya nsi ya nkaka, muntu ya Israele ve—muntu zina ya Namani.

III. KULONGA LESO YAI

➔ Kuyantika :

Mbala mingi, lulendo na beto ke sala na mpila ya ke kanga beto kubaka lusakumunu ya Nzambi. Bu beto yindula Namani bubuyai, yindula mambu yai ya lulendo.

🏠 Malongi ya nene ya leso yai (developpement) na banti ya malongi 4 :

15.1 Namani vandaka muntu ya Siria—muntu ya mbote. Kansi yandi vandaka lepre. Mwana-sielo songaka nkento ya Namani nde profete Elisa lenda belula yandi.

📖 Tangila bana : 2 Bantotila 5 :1-4

1 Kuvandaka mfumu mosi ya basoda ya nsi ya Siria, zina ya Namani. Yandi vandaka kubela

maladi ya lepre.

2 Kilumbu mosi, bantu ya nkaka...kotaka na ntoto ya Israele sambu na kunwana ti kuyiba. Bo simbaka mwana-nkento mosi ya fioti ya Israele. Bo kumisaka yandi mpika...

3 Ntangu yai, mwana-nkento yango tubilaka mfumu na yandi ya nkento nde : « Mbote kana mfumu na mono Namani kwenda na profete Elisa. Yandi ta belula yandi . »

4 Namani waka mambu yina. Yandi kwendaka kusonga mfumu na yandi...

? Yula bana bakestio.

🏠 Bana sala bageste.

🗨 Bana yimba ti kina.

15.2 Namani kwendaka ntete na Mfumu ya Israele, kansi yandi monaka mpasi bonso Namani zolaka kunwana ti yandi.

📖 Tangila bana : 2 Bantotila 5 :5-7

5 Ntotila ya Siria songaka yandi nde : « Kwenda na ntotila ya Israele. Natila yandi mukanda yai. »...

6 Mukanda yina ...vandaka kutuba nde : “Awa mono me tindila nge sielo na mono Namani, sambu nge belula yandi na maladi ya yandi ya lepre.”

7 Ntangu Ntotila ya Israele tangaka mukanda yina, yandi pasulaka bilele na yandi ti bokutaka nde: “Keti mono kele Nzambi ? Nki mutindu ntotila ya Siria fweti songa mono nde mono kubelula muntu yai ? Yo ke songa nde yandi ke sosila mono makambu ! »

? Yula bana bakestio.

🏠 Bana sala bageste.

🗨 Bana yimba ti kina.

15.3 Elisa waka mambu yina, ebuna yandi songaka Namani kuyobila mbala 7 na masa ya Yordani sambu yandi beluka.

📖 Tangila bana : 2 Bantotila 5 :8-10

8 Ntangu profete Elisa waka ... mambu yina, yandi tindika ndinga nde : « ...Tindila mono

muntu yina, mpidina yandi ta zaba nde profete ikele na ntoto ya Israele.

9-10 Yo yina, Namani kwisaka na nzo na yandi. Elisa songaka sielo na yandi na kutuba na Namani nde : « Kwenda na nzadi ya Yordani. Yobila mbala 7, ebuna maladi na nge yonso ta mana. Nitu na nge ta kuma mbote bonso yo vandaka ntete.

? Yula bana bakestio.

🔊 Bana sala bageste.

👤 Bana yimba ti kina.

15.4 Ntete, na lulendo, Namani waka makasi. Yandi zolaka ve kulemfuka na ndinga ya Elisa. Kansi basielo na yandi bendaka yandi. Yo yina, yandi yobilaka mpila Elisa tubaka. Nzambi belulaka yandi. Maladi ya lepre manaka.

📖 Tangila bana : 2 Bantotila 5 :11-12

11-12 Namani katukaka pana na makasi, kwendaka kutuba nde : « A mono vandaka kuyindula nde profete yango ta kwisa yandi mosi, ebuna mono kubeluka ! Ketu banzadi na nsi ya Siria me luta ve banzadi yonso ya Israele ? Ketu mono lenda yobila kuna ve ti kubeluka ?

13 Kansi basielo na yandi kwisaka kutubila yandi nde : «Pardo mfumu, kana profete songaka nge mambu ya mpasi na kusala, nge zolaka kusala yo kaka. Sambu na nki nge zola yobila ve mutindu yandi me songa nge, sambu nge beluka ? »

14 Namani ndimaka. Yandi kwendaka na nzadi ya Yordani. Yandi kudikotisaka na masa mbala 7, mutindu Elisa songaka yandi. Ebuna - maladi na yandi yonso manaka ! Nitu na yandi kumaka diaka mbote ti kitoko bonso mwana ya fioti.

? Yula bana bakestio.

🔊 Bana sala bageste.

👤 Bana yimba ti kina.

Ntete, lulendo zolaka kukanga Namani nzila ya kuguluka. Kansi ntangu Namani kudikulumusaka, Nzambi belulaka yandi mbala mosi, sambu yandi lemfukaka na ndinga ya profete ya Nzambi. Beto bantu ve lenda songa Nzambi nki kusala, to nki mutindu kusala, sambu beto kele kaka bantu, kansi Yandi kele Nzambi.



Devoir sambu na bakristo :

Beno bakristo, devoir mono ke pesa beno na mposi yai kele nde beno sala lulendo ve, kansi beno lemfuka na konso mambu ya ndinga ya Nzambi. Nzambi ke sakumuna bo yina ke lemfuka na Yandi.



Verse ya Kulonguka :

Bana tuba verse fraze na fraze na nima ya nge, moniteur, mbala 2. Na nima, bo tuba yo na 'shane'. Nge tuba ndinga ya ntete, ebuna mwana mosi landa na ndinga ya zole, ti konso mwana landa na ndinga ya ke landa yo. Na nima, bana yonso tuba yo na kimvuka, ti na nima na yo, bo tuba yo na 'shane.' Sala mpidina mbala 3.



Bankunga ya kwenda nzila mosi ti leso :

Kudikulumusa na Meso ya Nzambi
Mo' Ta Kwisa na Nzambi na Lulendo Ve



Invitation sambu na bo ya me yamba Yesu ntete ve :

Nzambi lombaka Namani kuyobila mbala nsambwadi na Yordani sambu yandi beluka. Yandi lombaka beto bantu ya masumu kukwisa na Yandi na nzila ya Yesu Kristo. Beto sala lulendo ve kuyindula nde beto lenda kwisa na Yandi na nzila ya nkaka. Beto kwisa na nzila yandi me yidika. Kana nge me tula ntima na Yesu ntete ve, balula ntima ti tula kivuvu na Yandi bubuyai.

Kana ntangu lunga : Longa mikanda ya Bible



Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 15

>|< Kumanisa Malongi :

Leso 15

Namani kudikotisaka mbala 7 na masa ya Yordani, mutindu Elisa me songa yandi kusala. Yo yina, Nzambi belulaka yandi na maladi ya lepre.



Beno kudikulumusa na meso ya Mfumu Nzambi, ebuna Yandi ta tombula beno.

Yakobo 4 :10

Leso 16. Armee ya bawanzio ziungaka armee ya Israele.

2 Bantotila 6: 8-33

I. PREPARASIO SAMBU NA MONITEUR-

🎯 Kikuma ya Leso :

Bana ta vanda na kikesa, sambu bo ta zaba nde bawanzio ya Nzambi kele kutanina bantu na Yandi.

♥ Verse ya Kulonguka :

Wanzio ya Nzambi me ziungaka bantu yina ke wilaka Yandi sambu na kukatula bo na mambu ya kingonsa. Bankunga 34 :8

🗣️ Nkunga ya kwenda nzila mosi ti leso :

Nzambi Ikele Nene, Vs 1 &2
Nani Kele Ngolo?

II. REVISIO

👆 Kuyindula diaka baleso me luta :

Na leso me luta, beto me mona nde profete Elisa songaka Namani nki mutindu yandi lenda beluka ya maladi ya lepre. Nzambi kele ngolo ! Yai raison mosi nde bantu na Yandi ke wa boma ve.

III. KULONGA LESO YAI--

➡ Kuyantika :

Bubuyai beto ta mona raison ya nkaka nde beto bantu ya Nzambi kele na kikesa. Kuwa mbote sambu nge zaba yo kele nki.

🏠 Malongi ya nene ya leso yai (developpement) na banti ya malongi 4 :

16.1 Elisa zabaka mambu yonso ya Mfumu ya Siria zolaka kusala. Mfumu ya Siria kumaka kisakasaka sambu na yo.

📖 Tangila bana : 2 Bantotila 6 :8-12

10 Ntotila ya Siria vandaka kunwana bitumba ti Israele. Konso ntangu, Elisa vandaka kutinda muntu na kusonga ntotila ya Israele nde : “Keba, kwenda ve penepene na kisika yina, sambu basoda ya Siria ke vingila beno kuna.”...

11 Ntotila ya Siria kumaka kisakasaka sambu mambu yina vandaka kubwa konso ntangu

mpidina. Yandi bingaka bamfumu ya basoda na yandi ti yulaka bo nde : “Nani awa na beno ke teka beto na ntotila ya Israele ?”

12 Muntu mosi songaka yandi nde : « Mfumu, ata muntu mosi ve...kansi profete Elisa ke songaka ntotila ya Israele mambu yonso ya nge ke tubaka, ata ... na kati ya shambre.”

? Yula bana bakestio.

🏠 Bana sala bageste.

🗣️ Bana yimba ti kina.

16.2 Basoda ya Siria ziungaka Israele sambu na kunwana.

📖 Tangila bana : 2 Bantotila 6 :13-15

13 Ebuna ntotila ya Siria tubaka nde : “Beno sosila mono yandi. Beto kanga yandi.” Bo songaka yandi nde Elisa vandaka na bwala Dotani.

14 Ebuna yandi tindaka basoda mingi kuna. Bo kwisaka ti bo ziungaka bwala yina.

15 ...Sielo ya Elisa telamaka. Yandi....monaka bo me ziunga bwala yonso na basoda ti bampunda ti bapusupusu. Ebuna yandi kwisaka kusonga Elisa nde : Mfumu, imene na beto ! Nki beto ta sala?”

? Yula bana bakestio.

🏠 Bana sala bageste.

🗣️ Bana yimba ti kina.

16.3 Nzambi songaka bo nde bawanzio na Yandi ya kuluta mingi me ziunga bo mpi, sambu na kusadisa bo.

📖 Tangila bana : 2 Bantotila 6 :16-17

16 Elisa vutulaka nde : « Kuwa boma ve. Bo yai kele na beto, bo kele mingi kuluta bo.”

17 Ntangu yai, Elisa sambaka Nzambi nde : «...kangula meso na yandi, yandi mona.” Mfumu Nzambi kangulaka meso ya sielo ya Elisa. Yandi monaka ngumba me fuluka na bampunda ya tiya ti bapusupusu ya tiya, me ziunga Elisa.

? Yula bana bakestio.

🏠 Bana sala bageste.

 Bana yimba ti kina.

16.4 Elisa sambaka, ebuna Nzambi kumisaka meso ya basoda ya Siria mpimpa. Bo salaka bantu ya Israele ata mbi mosi ve, ti bo kwisaka diaka mpi ve kuyangisa bo.

 **Tangia bana : 2 Bantotila 6 :18-23**

*18 Ntangu basoda ya Siria yantikaka kukwisa penepene, Elisa sambaka Nzambi nde :
« ...kumisa meso ya bantu yai yonso mpimpa. »
Mfumu Nzambi salaka mpidina.*

*19 ...Elisa tubilaka bo nde : « Landa mono.
Mono ta songa beno muntu ya beno ke sosa.”
Yandi nataka bo na bwala Samaria.*

*20-21 ...Elisa sambaka Nzambi diaka nde :
« Kangula meso na bo.” Mfumu Nzambi kangulaka meso na bo. Ntotila ya Israele yulaka Elisa nde : “Keti mono fwa bo ?”*

22 Yandi vutulaka nde : “Ve, fwa bo ve. ...Pesa bo madia ti masa, ebuna bo vutuka na mfumu na bo. »

23Katuka ntangu yina, bantu ya Siria kwisaka kukota diaka ve na ntoto ya Israele sambu na kuyiba.

? Yula bana bakestio.

 **Bana sala bageste.**

 **Bana yimba ti kina.**

>|< Kumanisa Malongi :

Ata basoda ya mbeni me ziunga bo, Elisa waka boma ve, sambu Nzambi songaka yandi nde bawanzio ya Nzambi vandaka mingi na kunwana sambu na bo. Bible ke tuba nde banwanzio na Yandi kele kuziunga beto bantu ya zola Yandi, sambu na kusadisa beto.

 **Verse ya Kulonguka :**

Bana tuba verse fraze na fraze na nima ya nge, moniteur. Na nima, bo tuba yo na geste ya kusonga bawanzio ya kele kuziunga bo. Mbala zole diaka, bo balula nitu na bo malembe-malembe ntangu bo ke tuba yo. Mbala zole ya nsuka bo tuba

yo ti diboko na zulu ya meso bonso bo ke tala bawanzio mingi.

 **Nkunga ya kwenda nzila mosi ti leso :**

Nzambi Ikele Nene, Vs 1 &2

Nani Kele Ngolo?

 **Devoir sambu na bakristo :**

Bana ya Nzambi, kuwa boma ve. Mposho yai yonso tii kuna, tula ntima na Nzambi, Yandi kutanina nge.

 **Invitation sambu na bo ya me yamba Yesu ntete ve :**

Kansi mbala ya nakaka bawanzio ya Nzambi kele kuziunga nge ve, sambu nge kele ntete ve mwana ya Nzambi. Nge me yamba ntete ve Yesu Kristo. Nzambi tindaka Mwana na Yandi sambu na kugulusa beto, sambu na kusukula beto na masumu, ti sambu na kumisa beto bantu na Yandi.

Kana nge kele kukianga, o, kinga diaka ve. Kwenda na Yandi bubuyai sambu nge guluka.

Kana ntangu lunga : Longa mikanda ya Bible

 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 16



Leso 16

Nzambi songaka
Elisa nde bawanzio
mingi vandaka
penepene sambu
na kusadisa bantu
na Yandi.

***Wanzio ya Nzambi me
ziungaka bantu yina ke
wilaka Yandi sambu na
kukatula bo na mambu ya
kingonsa.***

Bankunga 34 :8

Leso 17 Mwana ya bamvula 7 kumaka mfumu ti yalaka mbote, sambu yandi wilaka malongi ya Nzambi.

2 Bantotila 11 :1-20, 12 :1-3 (2 Bansangu 22 :10-12 & 23 :12-14 ke tuba kiteso mosi.)

I. PREPARASIO SAMBU NA MONITEUR-

🕒 Kikuma ya Leso :

Bana ta wila malongi ya Nzambi, ebuna bo ta vanda na mpila kusala kisalu ya mfunu, ata na kileki na bo.

♥ Verse ya Kulonguka :

Mwana ke songaka nde yandi kele nani na mambu ya yandi ke salaka.

Nge lenda zaba kana yandi kele mwana ya mbote to ve. Bingana 20 :11

🗨️ Bankunga ya kwenda nzila mosi ti leso :

Kuwa Bible

Bana ya Fioti Yonso

II. REVISIO

👉 Kuyindula diaka baleso me luta :

Beto ke landa ntangu ya bantotila yalaka, kansi Kimfumu ya Israele me kabana na bimbumu zole—Kimfumu ya nordee ya bo bingaka nki ? (Israele), ti Kimfumu ya sudee ya bo bingaka nki ? (Yuda) Na nordee, na Kimfumu ya Israele, bamfumu yonso vandaka nki mutindu ? (Kaka mbi, bo yonso.) Na sude, na Kimfumu ya Yuda, mingi vandaka mbi mpi, kansi ndambu vandaka mbote. Bubuyai beto ta yindula mosi ya vandaka mbi, ti mosi ya mbote.

III. KULONGA LESO YAI

➡ Kuyantika :

Mama Atalia vandaka mwana ya Akabi. Keti beno ke bambuka yandi? Mfumu ya kuluta mbi. Mama Atalia sadilaka biteki ti sambaka Nzambi ve. Mwana na yandi mosi kumaka mfumu, ti yandi salaka mbi, sambu mama na yandi Atalia longaka yandi kusala mbi. Mawa ! Na nima mfumu yina fwaka, Mama Atalia yai, yandi zolaka nde yandi mosi kuyala bonso mfumu. Yo yina, yandi fwaka

bana na yandi yonso na mpila nde bo lenda ve kuyala, kaka yandi yala. O, mawa mingi !

Kansi yandi nungaka ve na lukanu na yandi ya kumanisa fami yonso. Bubuyai beto ta mona mpila yo salamaka.

🏠 Malongi ya nene ya leso yai (developpement) na banti ya malongi 4 :

17.1 Mama Atalia sosaka kufwa bana yonso ya mwana na yandi, Mfumu Ahazia.

📖 Tangila bana : 2 Bantotila 11 :1

Ntangu Atalia, mama ya Ntotila Ahazia, waka nde bo me fwa mwana na yandi, Yandi zengaka nde yandi fweti fwa bantu yonso ya dikanda ya ntotila ya Yuda.

? Yula bana bakestio.

🏠 Bana sala bageste.

🗨️ Bana yimba ti kina.

17.2 Mbuta ya nkento bumbaka mwana Yoashi na Nzo-Nzambi. Bamvula 6 yandi yelaka na kinsweki.

📖 Tangila bana : 2 Bantotila 11 :2-4a

11 :2 Kansi ntangu bo vandaka kufwa bantu yango, nkento zina ya Yosheba tinisaka na kinsweki mwana mosi ya Ahazia, zina na yandi Yoashi. Yandi kwendaka kubumba yandi...

3 Yosheba bumbaka mwana yina bamvula sambanu na kati ya Nzo-Nzambi, ntangu Nkento-Ntotila Atalia vandaka kuyala na Yuda.

4a Kansi na mvula ya nsambwadi...

? Yula bana bakestio.

🏠 Bana sala bageste.

🗨️ Bana yimba ti kina.

17.3 Bu Yoashi me lungisa bamvula 7, Nganga-Nzambi Yoyada tulaka yandi mfumu.

📖 Tangila bana : 2 Bantotila 11 :4b-12

11 :4b-5 Nganga-Nzambi Yoyada bingaka bantu kukwisa na Nzo-Nzambi... Ebuna yandi basisilaka bo Yoashi mwana ya Ahazia.

11 Yandi tedimisaka basoda na este ya Nzo-Nzambi... Bamfumu ya basoda salaka mambu

yonso ya nganga-Nzambi Yoyada songaka bo kukengila Yoashi...

12 Ntangu yai, Yoyada songaka bantu kubasisa Yoashi. Yandi tulaka yandi mpu ya kimfumu. Yandi pesaka yandi mukanda ya bansiku ya kimfumu, ebuna yandi tulaka yandi mafuta na ntu kusonga nde yandi me kuma ntotila. Bantu yonso bulaka maboko ti tubaka na ndinga ya ngolo nde : “Luzingu ya nda na ntotila Yoashi !”

? Yula bana bakestio.

🏠 Bana sala bageste.

👤 Bana yimba ti kina.

17.4 Yoashi wilaka conseye ya mbote ya nganga-Nzambi Yoyasi pesaka yandi. Yo yina, yandi yalaka mbote, ti Nzambi pesaka bo ngemba.

📖 Tangila bana : 2 Bantotila 11 :13-12 :1-2

13 Ntotila-nkento Atalia waka makelele ya basoda ti ya bantu ya nkaka. Ebuna yandi kwendaka nswalu na Nzo-Nzambi, kisika vandaka bantu yango.

14 Ntangu yandi kumaka kuna, yandi monaka ntotila ya nkaka me telama na kisika ya ntotila. Bantu yonso vandaka kutula milolo ya kiese. Bantu ya kubula miziki vandaka kubula bampungi....

17 Yoyada songaka Ntotila Yoashi ti bantu yonso nde bo kuwakana na Mfumu Nzambi kuvanda bantu na Yandi)....

18 Ntangu yai, bantu kwendaka na nzo ya nzambi Baale. Bo fwaka yo....

19 Basoda bakaka Ntotila Yoashi, ebuna bo nataka yandi na nzo ya kimfumu. Bantu yonso landaka bo. Ebuna Yoashi bakaka kiti ya kimfumu.

20 Bantu yonso vandaka kiese mingi. Bwala mpi kumaka pima na nima ya lufwa ya Atalia.

12 :1-3 Na ntangu yina, Yoashi vandaka bamvula 7. Yoashi na luzingu na yandi yonso pesaka Mfumu Nzambi kiese na mambu ya yandi vandaka kusala, sambu Nganga-Nzambi Yoyada vandaka kupesa yandi conseye.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa Malongi :

Yoashi kumaka ntotila ntangu yandi vandaka mwana ya bamvula 7 kaka. Kansi yandi yalaka mbote kuluta bamfumu mingi na age kuluta yandi. Yandi yalaka mbote sambu yandi wilaka Ndinga ya Nzambi na munoko ya Nganga-Nzambi Yoyada.

👤 Devoir sambu na bakristo :

Beno bakristo, Nzambi lenda pesa beno mayele kusala mbote mpi kana beno wila Ndinga na Yandi. Beto kuwa yo, beto wila yo mposho yai.

♥ Verse ya Kulonguka :

Bana tuba verse fraze na fraze na nima na nge, moniteur. Yoashi yantikaka kuyala na age ya 7. Yo yina, bana songa misapi 7 ya diboko mosi ntangu bo tuba verse mbala ya 2. Na nima, bo songa misapi 7 na diboko ya nkaka ti tuba yo diaka. Na nsuka, bo tanga 1 tii na 7, ebuna bo tuba verse na ritima. Bo sala yo mbala 3.

👤 Bankunga ya kwenda nzila mosi ti leso :

Kuwa Bible

Bana ya Fioti Yonso

✝ Invitation sambu na bo ya me yamba Yesu ntete ve :

Kana nge me kwikila Yesu Mwana ya Nzambi ntete ve, malongi ya ntete Nzambi zola nge kuwila, yo yai : Kuzaba nde Nzambi zolaka beto mingi, yo yina Yandi tindilaka beto Mwana mosi yina kele na Yandi, na mpila nde konso muntu yina ta kwikila Yandi, Yandi kufwa ve, kansi yandi kuvanda na moyo ya mvula na mvula.

Keti nge me kwikila Yesu ? Ketu nge ta kwikila Yandi bubuyai ?

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 17



Leso 17

Mwana
Yoashi
kumaka
mfumu bu
yandi me
lungisa kaka
bamvula 7.
Yandi
yalaka
mbote
sambu
yandi
wilaka
malongi ya
Nzambi na
Nganga-
Nzambi
Yoyada.

***Mwana ke songaka nde yandi
kele nani na mambu ya yandi ke
salaka.***

***Nge lenda zaba kana yandi kele
mwana ya mbote to ve.***

Bingana 20 :11

Leso 18. Yoashi yidikaka Nzo-Nzambi.

2 Bansangu 24 :1-14 (Yo ke monika mpi na 2 Bantotila 12 :1-21.)

I. PREPARASIO SAMBU NA MONITEUR-

Kuyidika na ntwala :

Kana mikobodi kele, bana lenda sala mwa-sanduku ti munoko na zulu na yo. Nge ta songa yo na 18.3. Kana beno baka offrante na ecodim na beno, bana lenda tula offrante na bo na kati. Pesa offrante na dibundu sambu na kusadisa bo kutunga to kuyidika Nzo-Nzambi.

🎯 Kikuma ya Leso :

Bana ta landa conseye ya kinzambi.

♥ Verse ya Kulonguka :

*Kiese na muntu yina ke ndimaka ve ngindu ya bantu ya mbi,
ke landaka ve banzila ya bantu ya masumu,
ke vandaka ve kisika mosi na bantu yina ke sekaka Nzambi,
Kansi yandi ke monaka kiese na bansiku ya Mfumu Nzambi.
Yandi ke yindulaka yo mpimpa ti mwini.
Bankunga 1 :1-2*

🗨 Bankunga ya kwenda nzila mosi ti lesa :

Kuwa Bansongidila ya Mbote
Mfumu Zaba Nzila na Mono

II. REVISIO

↑ Kuyindula diaka baleso me luta :

Beto kele kuyindula bamfumu ya yalaka na ntangu kimfumu ya Israele me kabana, me kuma bimfumu zole. Kukabana yina me pesa kimfumu ya Israele na norde ti kimfumu ya Yuda na sude. Beno ta bambuka nde kimfumu kabanaka sambu, na nima ya Mfumu Salomo, mwana na yandi Rehoboami waka ve conseye ya mbote.

Na norde, kimfumu ya Israele vandaka na bamfumu kaka mbi, mbi, mbi. Na sude, na kimfumu ya Yuda, bamfumu ya mbi vandaka ti

ya mbote mpi vandaka. Nani mosi ya mbote ?
(Yosafati, Yoashi)

III. KULONGA LESO YAI

➔ Kuyantika :

Ntangu yai, beto me kuma na Mfumu Yoashi. Nki beno ke bambuka sambu na yandi ?

- Nki salamaka na yandi ntangu yandi vandaka kaka mwana ya mvula mosi ?
(Mpangi na nkento Yosheba bumbaka yandi sambu Mama Atalia zolaka kufwa bana yonso ya Mfumu Ahazia, yandi mosi kuma mfumu.)
- Bo bumbaka Yoashi wapi ?
(Na Nzo-Nzambi)
- Yandi yantikaka kuyala na nki age ?
(Bamvula 7)
- Nani pesaka Yoashi conseye ya mbote ?
(Nganga-Nzambi zina ya Yoyada)

🏠 Malongi ya nene ya lesa yai (developpement) na banti ya malongi 4 :

18.1 Yoashi vandaka kulanda malongi ya mbote ya Yoyada. Yandi bakaka ngindu kuyidika Nzo-Nzambi na bisika Atalia me fwaka yo.

📖 Tangila bana : 2 Bansangu 24 :2-4, 7

2 Na luzingu yonso ya nganga-Nzambi Yoyada, Yoashi pesaka Mfumu Nzambi kiese na mambu ya yandi salaka.

4,7 ...Ntotila Yoashi zengaka nde bo fweti yidika Nzo-Nzambi, sambu basielo ya Atalia, nkento ya mubulu, bo bebisaka yo. Bo bakaka nkutu bima ya Nzo-Nzambi sambu na kusambila nzambi Baale.

❓ Yula bana bakestio.

🏠 Bana sala bageste.

🗨 Bana yimba ti kina.

18.2 Yoashi songaka banganga-Nzambi kukwenda kulomba bantu kupesa mbongo sambu na kuyidika Nzo-Nzambi, kansi bo salaka yo ve.

📖 Tangila bana : 2 Bansangu 24 :5-6

5-6 Yandi (Yoashi) bingaka banganga-Nzambi ti bantu ya dikanda ya Levi, yandi tindaka bo na babwala ya Yuda nde, « Beno kwenda

kulomba mbongo ya bantu yonso ya Israele sambu na kuyidika Nzo-Nzambi konso mvula. Beno sasuka na kusala yo. »

Kansi bantu ya Levi sukininaka na kwenda, yo yina Yoashi bingaka Yoyada ti yulaka yandi nde : "Sambu na nki nge songaka ve bantu ya Levi kukwenda kufutisa bantu ya Yuda ti ya Yeruzalemi mbongo yina ya Moize tubaka nde bantu ya Israele fweti pesa sambu na Nzo-Nzambi ya ntenta ? »

? Yula bana bakestio.

🏠 Bana sala bageste.

👑 Bana yimba ti kina.

18.3 Yoashi songaka bo kusala sanduku kutula na munoko ya Nzo-Nzambi sambu bantu kutula mbongo kuna sambu na kuyidika Nzo-Nzambi.

📖 Tangila bana : 2 Bansangu 24 :8-10

8 Ntangu yai, Ntotila Yoashi songaka bantu ya Levi kusala sanduku ya bo ta tula na munoko ya Nzo-Nzambi.

9 Na nima, bo tindaka ndinga na Yeruzalemi ti na ntoto ya mvimba nde bo fweti kwisa kupesa Mfumu Nzambi makabu...

10 Bambuta ti bantu kwisaka na kiese yonso kutula makabu na bo na sanduku. Sanduku yina zolaka kufuluka.

? Yula bana bakestio.

🏠 Bana sala bageste.

👑 Bana yimba ti kina.

18.4 Bo sadilaka mbongo yina kuyidika Nzo-Nzambi ti kusala diaka bima ya nkaka sambu na bisambu.

📖 Tangila bana : 2 Bansangu 24 :12-14

12 Ntotila Yoashi ti nganga-Nzambi Yoyada vandaka kupesa mbongo yango na bantu yina vandaka kutala kisalu ya kuyidika Nzo-Nzambi. Bantu yai bakaka na kisalu bantu ya kupasulaka matadi ti basharpanti ti bantu ya kisalu ya bibende.

14 Ntangu kisalu manaka, bo pesaka wolo ti arza yina bikalaka na ntotila ti na Yoyada. Bo

kitulaka yo babolo ti bima ya nkaka ya Nzo-Nzambi.

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Yoashi salaka mbote na kimfumu na yandi sambu yandi waka conseye ya kinzambi ya Yoyada pesaka yandi. Yandi yidikaka diaka Nzo-Nzambi, ti bantu yonso vandaka na kiese na yo.



Devoir sambu na bakristo :

Bana bakristo, na mposo yai keti nge ta wa conseye ya kinzambi ? Ketu nge ta wa yo na pasteur ? Na bibuti ? Na Bible?



Verse ya Kulonguka :

*Kiese na muntu yina ke ndimaka ve ngindu ya bantu ya mbi,
ke landaka ve banzila ya bantu ya masumu,
ke vandaka ve kisika mosi na bantu yina ke sekaka Nzambi,
Kansi yandi ke monaka kiese na bansiku ya Mfumu Nzambi.
Yandi ke yindulaka yo mpimpa ti mwini.
Bankunga 1 :1-2*



Bankunga ya kwenda nzila mosi ti leso :

Kuwa Bansongidila ya Mbote
Mfumu Zaba Nzila na Mono



Invitation sambu na bo ya me yamba Yesu ntete ve :

Conseye ya nene ya Bible ke songa beto kele kutula ntima na Yesu Kristo, Mwana ya Nzambi yina bikaka zulu, yina fwaka na zulu ya kulunsi na sika ya beto, ye telamaka na lufwa. Kana nge me balula ntima ntete ve, tula kivuvu na nge yonso na Yandi bubu. Yandi ta lolula mbi yonso ya nge. Yandi ta kitula nge mwana na Yandi, mukristo

Kana ntangu lunga : Longa mikanda ya Bible



Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 18.



Leso 18

Mfumu Yoashi songaka bo kutula sanduku ya offrande na munoko ya Nzo-Nzambi. Yandi sadilaka mbongo yina sambu na kuyidika Nzo-Nzambi. Yandi landaka conseye ya mbote ya nganga Yoyada.



Leso 18

***Kiese na
muntu yina
ke ndimaka
ve ngindu
ya bantu ya
mbi,
ke landaka***

***ve banzila ya bantu ya masumu,
ke vandaka ve kisika mosi na bantu
yina ke sekaka Nzambi,
Kansi yandi ke monaka kiese na
bansiku ya Mfumu Nzambi.
Yandi ke yindulaka yo mpimpa ti
mwini.***

Bankunga 1 :1-2

Leso 19. Yoakazi bingaka Nzambi na ntangu ya mpasi kansi vilaka Yandi na nima.

2 Bantotila 13 :1-13, 14 :24

I. PREPARASIO SAMBU NA MONITEUR-

🎯 Kikuma ya Leso :

Bana ta sosa lusadisya ya Nzambi kaka na ntangu ya mpasi ve, kansi ntangu yonso.

♥ Verse ya Kulonguka :

Sambu na mono, mono ta lombamba Mfumu Nzambi, ebuna Yandi ta gulusa mono. Bankunga 55 :17

👤 Bankunga ya kwenda nzila mosi ti leso :

Nzambi Kuwa na Suka
Nzambi Ta Kuwa Nge

II. REVISIO

👤 Kuyindula diaka baleso me luta :

Beto me vanda kulanda ndambu ya bamfumu na Kimfumu ya Yuda na sude. Ndambu ya bamfumu yai salaka mbote. Mbandu : Yoashi. Yandi yantikaka mbote ntangu yandi waka conseye ya nganga-Nzambi Yoyada. Kansi na nima ya lufwa ya Yoyada, yandi landaka conseye ya mbi. Yandi sambaka biteki ya Nzambi ndimaka ve. Nsuka ya moyo na yandi mawa ti nsoni.

III. KULONGA LESO YAI

➡ Kuyantika :

Bubuyai beto ke yindula diaka bamfumu na norde parti ya ntoto, na kimfumu bo bingaka Israele. Mawa mingi nde na kimfumu ya Israele, ata mfumu mosi ve pesaka Nzambi kiese.

🏠 Malongi ya nene ya leso yai (developpement) na banti ya malongi 4 :

19.1 Na bamvula ya nsuka ya Yoashi na Yuda, Yoakazi kumaka mfumu na Israele. Yandi salaka mbi ti sambaka biteki, yo yina Nzambi pesaka mbeni Siria ngolo kuyangisa Israele.

📖 Tangila bana : 2 Bantotila 13 :1-3

1 Bu Yoashi ...me lungisa bamvula 23 na kimfumu ya Yuda, Yoakazi kumaka ntotila ya Israele na bwala Samaria. Yandi yalaka kuna bamvula 17.

2 Yandi salaka masumu na meso ya Mfumu Nzambi ti kubenda bantu ya Israele kusala masumu.

3 Yo yina, Mfumu Nzambi wilaka bantu ya Israele makasi. Yandi vandaka kupesa bo mbala na mbala na maboko ya Ntotila ya Siria...

? Yula bana bakestio.

🏠 Bana sala bageste.

👤 Bana yimba ti kina.

19.2 Na ntangu ya mpasi, Yoakazi sosaka lusadisya ya Nzambi. Nzambi songaka mawa ti sadisaka yandi.

📖 Tangila bana : 2 Bantotila 13 :4-5

4 Kansi Ntotila Yoakazi sambaka Mfumu Nzambi. Ebuna Mfumu Nzambi wilaka yandi mawa, sambu Yandi monaka mutindu bantotila ya Siria vandaka kumonisa bantu ya Israele mpasi.

5 Nzambi tindilaka bo muntu mosi kukatula bo na maboko ya bantu ya Siria. Ebuna na nima, Israele kumaka diaka na ngemba...

? Yula bana bakestio.

🏠 Bana sala bageste.

👤 Bana yimba ti kina.

19.3 Kansi na nima Nzambi me sadisa Israele na mvita, bo landaka kaka kusamba biteki ya Yeroboami.

📖 Tangila bana : 2 Bantotila 13 :6

6 Kansi ata mpidina, bo bikisaka ve na kusala masumu...ata kiteki ya nzambi ya nkento Ashera vandaka kaka ya kutelama na bwala Samaria.

? Yula bana bakestio.

🏠 Bana sala bageste.

👤 Bana yimba ti kina.

19.4 Mwana ya Yoakazi vandaka mbi, ti mwana na yandi Yeroboami 2 mpi. Bo yonso vilaka nde Nzambi me sadisa bo bu bo bingaka zina na Yandi.

 **Tangila bana :** 2 Bantotila 13 :10-11, 14 :23b-24

10 ...Mwana ya Yoakazi kumaka ntotila ya Israele. Yandi yalaka na bwala Samaria.

11 Yandi mpi salaka masumu na meso ya Mfumu Nzambi...

14 :23b-24 Yeroboami 2, ntekolo ya Yoakazi, kumaka ntotila ya Israele na bwala Samaria... Yandi salaka masumu na meso ya Mfumu Nzambi. Yandi landaka mbandu ya mbi ya nkaka na yandi Yeroboami 1, yina bendaka bantu ya Israele na kusala masumu.

? Yula bana bakestio.

 **Bana sala bageste.**

 **Bana yimba ti kina.**

>|< Kumanisa Malongi :

Mfumu Yoakazi bingaka Nzambi na ntangu ya mvita, ntangu ya boma. Ata yandi zolaka Nzambi ve, Nzambi wilaka yandi ti sadisaka yandi ti bantu ya Israele. Ketu na nima, Yoakazi landaka Nzambi ? Ikele ve. Yandi kwendaka kusamba biteki ya mpamba-mpamba. Ketu yandi yantikaka kubinga Nzambi konso mambu ? Ikele ve. Nzambi gulusaka moyo ya Yoakazi, kansi na nima, yandi vilaka Nzambi. Mwana na yandi landaka mbandu na yandi ya mbi, ti ntekolo na yandi, Yeroboami 2. Bo mpi vilaka Nzambi ya zolaka sadisa bo. O, mawa na Israele sambu bo bingaka zina ya Nzambi kaka na ntangu ya mpasi ! Yandi zolaka kusadisa bo

konso lumbu, kansi bo zwaka ve lusadisu yina, sambu bo buyaka kubinga zina na Yandi.



Devoir sambu na bakristo :

O, bana bakristo, beto binga zina ya Nzambi konso lumbu. Konso ntangu, Yandi zola sadisa beto. Beto landa Yandi ya kieleka konso ntangu.



Verse ya Kulunguka :

Bana tuba verse fraze na fraze na nima na nge, moniteur. Na nima, bo tuba yo na bapositio yonso ya lombilu—maboko na zulu, kufukama, kukanga meso, etc. Bo tuba yo mbala 6.



Bankunga ya kwenda nzila mosi ti leso :

Nzambi Kuwa na Suka

Nzambi Ta Kuwa Nge



Invitation sambu na bo ya me yamba Yesu ntete ve :

Mbala ya nkaka nge zaba kubinga Nzambi ve. Kieleka, nge zaba Yandi ntete ve ata fioti. Beto yonso vandaka kuvila nzila, kuyungana bonso mameme. Kansi Nzambi zola beto. Yandi ke sosa beto. Yandi zola kulolula masumu yonso ya nge, kutula nge na fami na Yandi ya mvu ya mvu. Binga zina na Yandi sesepiyai. Songa Yandi nde nge zola bika nzila ya masumu, nge zola balula ntima, nge kwikila Yandi.

Yandi ta gulusa nge bubu yai.

Kana ntangu lunga : Longa mikanda ya Bible



Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 19

Leso 19



Mfumu
Yoakazi
lombaka
lusadisus na
ntangu ya
mvita, ti
Nzambi
sadisaka
yandi.

Kansi na
nima, yandi
landaka ve
kulomba
lusadisus ya
Nzambi
diaka. Yandi
yantikaka
kusamba
biteki ya
mpamba. Yo
yina, Nzambi
sadisaka
yandi diaka
ve.

***Sambu na mono, mono ta
lomba Mfumu Nzambi,
ebuna Yandi ta gulusa
mono.***

Bankunga 55 :17

Leso 20. Israele ti mbeni na Bo Nineve, Nzambi wilaka yonso zole mawa na ndinga ya profete Yonasi.

2 Bantotila 14 :23-29 , Mukanda ya Yonasi

I. PREPARASIO SAMBU NA MONITEUR-

🎯 Kikuma ya Leso :

Bana ta songa nsangu ya mbote na bantu yonso, sambu Nzambi zola bantu yonso, ti Yandi lenda wila bo mawa, ata bo kele bankwa-mbi.

♥ Verse ya Kulonguka :

Mfumu Nzambi kele mbote. Nlemvo na Yandi ke manaka ve... Bankunga 100 :5a

🗨️ Bankunga ya kwenda nzila mosi ti leso :

Benda Bampangi ya Nkaka, Beno Kwis (verse ya nkunga, 'Mono Kele na Nzo Kitoko)
Kwenda Nordee, Kwenda Sudee

II. REVISIO

👆 Kuyindula diaka baleso me luta :

Beto me mona mpila Mfumu Yoakazi salaka na Kimfumu ya Israele. Kansi konso ntangu, bamfumu zole vandaka kuyala kaka mbala mosi—mfumu mosi na sude, na Yuda. Ti, mfumu ya nkaka na norde, na Israele. Bubuyai beto ta vanda diaka na norde. Ntangu Amasia vandaka kuyala na Yuda, Yeroboam 2 vandaka kuyala na norde, na Israele.

III. KULONGA LESO YAI

➡ Kuyantika :

Keti bubuyai beno kele na batribu ya nkaka ya beno ke zola bo mingi ve ? Ya beno ke wakana ti bo ve ? To babwala ya mutindu yina ? To bafami ?
[Moniteur, pesa bana nzila kutuba ndambu bambandu, kana bo zola.]

Kana beto ke zola bantu yina ve, nki mutindu Nzambi ke mona bo ? Nki mutindu Yandi zola beto kuvanda ti bo ?

🏠 Malongi ya nene ya leso yai (developpement) na banti ya malongi 3 :

20.1 Yeroboam 2 landaka kaka na nzila ya mbi ya Yeroboam 1, kaka kusamba biteki.

📖 Tangila bana : 2 Bantotila 14 :23-24

23 ... Yeroboami 2, ya Israele kumaka ntotila na bwala Samaria. Yandi yalaka bamvula 41.

24 Yandi salaka masumu na meso ya Mfumu Nzambi. Yandi landaka mbandu ya mbi ya nkaka na yandi Yeroboami 1, yina bendaka bantu ya Israele kusala masumu.

❓ Yula bana bakestio.

🏠 Bana sala bageste.

🗨️ Bana yimba ti kina.

20.2 Nzambi wilaka Israele mawa. Yandi sadisaka Yeroboami 2 kuvutula ntoto ya bambeni me baka, bonso ndinga ya profete Yonasi.

📖 Tangila bana : 2 Bantotila 14 :25-27

25 Kansi yandi botulaka ntoto yonso yina vandaka ntete na maboko ya bantu ya Israele...kaka mutindu Mfumu Nzambi...ya Israele, tubaka na munoko ya profete Yonasi...

26 Sambu Mfumu Nzambi monaka mutindu bantu ya Israele vandaka kumona mpasi ya ngolo na maboko ya bambeni na bo. Ata muntu ya kusadisa bo vandaka ve.

27 Yo vandaka mpi ve ngindu ya Mfumu Nzambi na kufwa Israele kimakulu. Yo yina, Yandi sadilaka Yeroboami 2 sambu na kugulusa bo.

❓ Yula bana bakestio.

🏠 Bana sala bageste.

🗨️ Bana yimba ti kina.

20.3 Nzambi mpi bingaka profete Yonasi kukwenda na mbeni ya nene na bo, bwala ya nene Ninive, kubinga bo kubalula ntima. Bo wilaka ndinga na yandi ti balulaka ntima. Yo yina, Nzambi wilaka bo mawa.

📖 Tangila bana : Yonasi 1 :1-2, 4 :11

Yonasi 1 :1-2 Mfumu Nzambi tubaka na Yonasi... nde : "Nge Yonasi, kanga bima. Kwenda na Ninive, bwala yina ya nene.

Kwenda songa bantu ya bwala yina nde mbi na bo me kuma tii na meso na Mono."

4:11 Ebuna Mono, keti Mono lenda mona mawa ve sambu na Ninive, bwala yai ya nene, ya ke na bantu kuluta 120,000 bayina me zaba ve kusola nki mambu ya mbote ti nki mambu ya mbi ? Nki mutindu Mono lenda wila bwala yai mawa ve ?

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Nzambi zola bantu yonso. Yandi ke songa beto mawa na bampila mingi konso lumbu. Yandi zola kuwila bantu yonso mawa, kulolula bo ti kukitula bo bana na Yandi, kana bo ta kaka vutuka na Yandi. Beto vanda nswalu kusonga nsangu ya mbote ya Yesu na bantu yonso. Na kati na yo, bantu ya nkaka ta balula ntima.



Devoir sambu na bakristo :

Keti nge lenda songa nsangu ya Yesu na muntu mosi na mposo yai ? Kaka songa bo nki Nzambi me sala na luzingu na nge. Bu Nzambi kangula nzila, keti nge ta songa nsangu yina ata na konso muntu ?



Verse ya Kulonguka :

Bana ta tuba verse fraze na fraze na nima ya nge, moniteur. Mbala ya 3, bo yika bageste. Mbala ya 4 ti na 6, bana songa musapi bo na bo.



Bankunga ya kwenda nzila mosi ti leso :

Benda Bampangi ya Nkaka, Beno Kwise (verse ya nkunga, 'Mono Kele na Nzo Kitoko)
Kwenda Norde, Kwenda Sude



Invitation sambu na bo ya me yamba Yesu ntete ve :

Kana nge me yamba Yesu Kristo ntete ve, Nzambi zola wila nge mpi mawa. Kana ntima na nge ke ndima nde nge me sala mbi, yai kele mbote. Bible ke tuba nde beto yonso me sala masumu (Roma 3 :23). Beto yonso me yungana bonso mameme (Yezaya 53 :6). Kana nge zaba nde yai kele kieleka, ti yo ke pesa nge mpasi, kaka balula ntima. Ndimba nde nge kele na mfunu ya Ngulusi, Yesu Kristo, Mwana ya Nzambi. Ndimba nde Yandi fwaka sambu na masumu na NGE, ti Yandi nungaka lufwa. Yandi telamaka na lufwa.

Binga Yandi na ntima na nge yonso. Yandi ta gulusa nge bubuyai kana nge kwikila Yandi.


Kana ntangu lunga : Longa mikanda ya Bible



Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 20

Leso 20



Nzambi tindaka Profete Yonasi ntama sambu na kusamuna na mbeni ya bantu na yandi. Na munoko ya Yonasi, Nzambi songaka bo kubalula ntima sambu Nzambi wila bo mawa.

***Mfumu Nzambi kele mbote.
Nlemvo na Yandi ke
manaka ve...
Bankunga 100 :5a***

Leso 21. Lulendo bebisaka luyalu ya mbote ya Oziasi.

2 Bansangu 26 Yo ke monika mpi na 2 Bantotila 15 :1-7.

I. PREPARASIO SAMBU NA MONITEUR-

🎯 Kikuma ya Leso :

Bana ta tina lulendo, sambu bo ta bakisa nde Nzambi zola lulendo ve. Lulendo ke bendaka bantu kubuya ndinga ya Nzambi, sambu bo banza nde bo zaba kuluta mbote ti Yandi.

💖 Verse ya Kulonguka :

Ntotila Oziasi kumaka lulendo sambu na ngolo na yandi. Yo yina, yandi kubwaka. Yandi salaka mbi na meso ya Mfumu Nzambi....2 Bansangu 26 :16

🗨️ Bankunga ya kwenda nzila mosi ti leso :

O Lulendo Yambula
Kana Beno Ke Zolaka Mono

II. REVISIO

👆 Kuyindula diaka baleso me luta :

Beto me mona nde bamfumu mingi vandaka mbi kaka. Bo landaka Nzambi ve ata fioti. Ya nkaka yantikaka mbote, kansi na nima bo bikisaka nzila ya Nzambi.

III. KULONGA LESO YAI

➡ Kuyantika :

Bubuyai beto ta mona diaka mfumu ya yantikaka mbote ti salaka mbote. Bamvula mingi yandi salaka mbote. Kansi na nsuka, lulendo simbaka yandi ti yandi bwaka. Beto ta yindula Mfumu Oziasi. Beto mona histoire na yandi na mukanda ya 2 Bansangu.

🏠 Malongi ya nene ya leso yai (developpement) na banti ya malongi 4 :

21.1 Mfumu Oziasi yingaka tata na yandi Amazia na Kimfumu ya Yuda. Yandi waka ndinga ya profete Zakaria, landaka Nzambi, ti salaka mbote. Yo yina, Nzambi sakumunaka yandi.

(Moniteur ya bajeune ya niveau secondaire, NB : Yai kele ve Zakaria ya sonikaka mukanda ya Zakaria penepene na nsuka ya Kuwakana ya Ntama na Bible. Zakaria yina sonikaka na nima. Yai kele profete ya nkaka.)

📖 Tangila bana : 2 Bansangu 26 :1, 5

1 Oziasi ...vandaka bamvula 16 ntangu bantu ya Yuda tulaka yandi ntotilaYandi yalaka bamvula 52....

5 Profete Zakaria vandaka kulonga yandi ndinga ya Nzambi, ti Oziasi vandaka kulanda malongi yina. Yo yina, mambu na yandi yonso vandaka kubonga.

? Yula bana bakestio.

🏠 Bana sala bageste.

🗨️ Bana yimba ti kina.

21.2 Oziasi nungaka na bamvita. Yandi tungaka bisika mingi, ti lukumu na yandi kwendaka ntama.

📖 Tangila bana : 2 Bansangu 26 :6-11

6-7 Oziasi tungaka babwala ti Nzambi nungisaka yandi na bitumba.

8 Bantu kwisaka kupesa yandi bakado. Yandi kumaka ngolo mingi. Lukumu na yandi panzanaka.

9-11 Oziasi tungisaka banzo ya nda sambu na kukengilaka ntoto. Yandi timunaka mpi mabulu ya masa, sambu yandi vandaka na bambisi mingi, bilanga ya vinu, ti basoda mingi.

? Yula bana bakestio.

🏠 Bana sala bageste.

🗨️ Bana yimba ti kina.

21.3 Kansi, mawa ! Na nima, lulendo simbaka yandi. Yo yina, yandi kwendaka kusala ksalu ya Nzambi pesaka kaka na banganga-Nzambi.

📖 Tangila bana : 2 Bansangu 26 :16-18

16 Ntotila Oziasi kumaka lulendo sambu na ngolo na yandi, yo yina yandi kubwaka. Yandi salaka mbi na meso ya Mfumu Nzambi... Nkutu kilumbu mosi yandi kotaka na kati ya nzo-Nzambi sambu na kuyoka makabu ya bima ya mananasi na zulu ya mesa-kimenga.

17-18 ...Banganga -Nzambi ya kikesa mpenza 80, bo landaka ntotila ti telamaka na ntuala na yandi. Bo songaka yandi nde : « Mfumu, nge ke na nswa ve ya kupesa makabu ya bima

ya mananasi nge mosi na Mfumu-Nzambi. Yo keke kiyeka ya banganga-Nzambi. Basika na kisika yai ya nsiku, sambu nge me sala masumu... »

? Yula bana bakestio.

🏠 Bana sala bageste.

👑 Bana yimba ti kina.

21.4 Ntangu bo songaka yandi mbi na yandi, yandi wilaka bo ve, kansi makasi fulusaka yandi. Yo yina, Nzambi pesaka yandi maladi ya lepre tii nsuka ya moyo na yandi.

📖 Tangila bana : 2 Bansangu 26 :19-21

19 Oziasa ...wilaka banganga-Nzambi makasi. Ebuna na mbala mosi, maladi ya lepre simbaka yandi na ilungi po pana na meso ya banganga-Nzambi.

20 Bo monaka nde ilungi na yandi me fuluka na bamputa. Bo basisaka yandi nswalu na Nzo-Nzambi. Yandi mosi Oziasa mpi monaka nde Mfumu Nzambi me pesa yandi ndola. Yo yina, yandi basikaka nswalu.

21 Ntotila Oziasa vandaka kaka ya kubela tii kuna yandi fwaka. Yandi vandaka kubikala na kingenga na nzo na yandi mosi. Mwana na yandi Yotami vandaka kuyala ntoto.

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Oziasa yantikaka mbote, kulanda ndinga ya Nzambi. Yo yina, Nzambi bongisaka kimfumu na yandi. Nzambi pesaka yandi ngolo mingi ya kimfumu.

Kansi ntangu Oziasa monaka ngolo yina, lulendo simbaka yandi. Yandi monaka bonso yandi mosi me nungisa kimfumu na yandi. Yandi yantikaka kuyindula nde yandi lenda sala konso mambu yandi ta zola.

Yandi zabaka nde Nzambi me pesa kisalu ya kupesa makabu na maboko ya banganga-Nzambi. Kansi na lulendo na yandi, yandi yindulaka nde mambu ve, mabanza na yandi mbote kuluta ndinga ya Nzambi. Sambu na lulendo yina, Nzambi pesaka yandi

maladi ya ngolo ti ya nsoni—maladi ya lepre. Yo simbaka yandi tii na lufwa na yandi.

👏 Devoir sambu na bakristo :

Beto bakristo, beto tina lulendo. Beto kudikulumusa sambu beto lenda kuwa ndinga ya Nzambi ti kulemfuka na yo. Mposo yai, sosa kukatula lulendo yonso na mabanza na nge.

♥ Verse ya Kulonguka :

Bana tuba verse fraze na fraze na nima ya nge, moniteur. Bo yika bageste ti bo tuba yo na ndinga ya mutindu na mutindu. Yonso mbala 6.

👑 Bankunga ya kwenda nzila mosi ti leso :

O Lulendo Yambula
Kana Beno Ke Zolaka Mono

✝ Invitation sambu na bo ya me yamba Yesu ntete ve :

Lulendo kuluta nene keke kuyindula nde nge keke mbote ti Nzambi kukonda Yesu Kristo. Lulendo ya nene keke kumona nde nge ke na mfunu na Yandi ve. Beto keke bankwa-masumu, mbi na meso ya Nzambi. Beto me zinga bonso Nzambi ikeke ve. Yo yina, beto me zwa makambu ti Yandi. Kukonda Yesu, beto keke na kinduku, na kintwadi ti Yandi ve.

Kansi Nzambi zolaka beto, bantu ya mbi. Yandi tindaka Yesu Kristo, Mwana na Yandi mvu ya mvu. Yesu bakaka masumu yonso na beto na zulu ya ntu na Yandi ntangu Yandi fwaka na zulu ya kulunsi. Nzambi tedimisaka Yesu na lufwa sambu na kusonga nde kieleka, Yandi Tata Nzambi me ndima lufwa ya Yesu na sika na beto.

Bible ke songa beto nde bubuyai, konso muntu yina ta balula ntima ti tula kivuvu na Yesu Kristo, yandi ta guluka. Ketu nge bambuka ntangu ya nge gulukaka? Kana ketu-ketu ikeke, kuyamba Yandi bubuyai. Yandi ta lolula nge.

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda ya Bible. Bangindu ke monika na page

NSUKA YA LESO 21



Leso 21

Nzambi sakumunaka Mfumu Oziasi. Yo yina, yandi kumaka lulendo.

Yandi kwendaka kusala mambu ya Nzambi me pesa kaka na banganga-Nzambi. Yo yina, Nzambi pesaka yandi maladi ya lepre tii na nsuka ya moyo na yandi. O, lulendo kaka mawa !

***Ntotila
Oziasi
kumaka
lulendo***

sambu na ngolo na yandi.

Yo yina, yandi kubwaka.

***Yandi salaka mbi na meso ya
Mfumu Nzambi....***

2 Bansangu 26 :16

Leso 22. Na Israele, bapofete bingaka bamfumu kuvutuka na Nzambi, kansi bo landaka kaka mbi.

2 Bantotila 15 :8-31, Mikanda ya Ozea ti Amosi

[*Moniteur, NB: Atasio! Mfumu Ozea kele, profete Ozea kele muntu ya nkaka. Mfumu Ozea mbi, Profete Ozea mbote. Yo yina, konso ntangu beto sadila zina zina, beto ta tuba mpi titre—Mfumu Ozea to Profete Ozea.*]

I. PREPARASIO SAMBU NA MONITEUR-

Kuyidika na ntwala : Tala karte ya bamfumu na nsuka ya lesa yai. Yilama kusonga ti tendula yo na bana. Yilama na karte geografika ya Israele mpi.

🕒 Kikuma ya Leso :

Bana ta kuwa ntangu muntu songa bo mbi na bo. Bo simba mbi na bo ve, kansi bo vutuka na Nzambi.

♥ Verse ya Kulonguka :

Bika muntu ya mbi kubika nzila na yandi ya mbi.

Bika muntu ya nku kubika mabanza na yandi ya nku.

Bika bo vutuka na Mfumu Nzambi. Yandi ta wila bo mawa.

Bika bo vutuka na Nzambi na beto,
sambu Yandi ke lembaka ve na kulolula.
Yezaya 55 :7

🗨 Bankunga ya kwenda nzila mosi ti lesa :

Kuwa Bansongidila

Masumu na Mono Me Kwenda

II. REVISIO

👤 Kuyindula diaka baleso me luta :
Na mposi me luta, beto monaka Ozias na kimfumu ya Yuda na sude parti ya ntoto ya Israele. Yandi salaka mbote, kansi na nima, yandi fwaka nsiku ya Nzambi na lulendo. Yo yina, Nzambi pesaka yandi ndola ya maladi ya lepre.

III. KULONGA LESO YAI

➡ Kuyantika :

Mposi yai, beto vutuka kulanda Kimfumu ya Israele na norde parti ya ntoto na bo. [*Moniteur, songa karte geografika.*]

🏠 Malongi ya nene ya lesa yai (developpement) na banti ya malongi 4 :

22.1 Na Israele, bamfumu yonso kaka mbi.

Bo yonso buyaka Nzambi ti sadilaka biteki ya mbi.

[*Moniteur, songa ti tendula bazina na karte ya bamfumu na nsuka ya lesa yai.*]

📖 Tangila bana : 2 Bantotila 15 :8-28

(NB : Bana tuba bazina ya kele na font fonce na nima ya nge, moniteur. Konso ntangu nge tuba 'masumu', bo tuba 'Mawa ! Mawa !')

8-9 ...**Zakaria** mwana ya Yeroboami 2 kumaka ntotila ya Israele... Yandi salaka masumu na meso ya Mfumu Nzambi bonso bankaka na yandi....

13 **Shalumi** ...kumaka ntotila ya Israele...

14, 18 **Menahemi**....bakaka kimfumu...Yandi salaka masumu na meso ya Mfumu Nzambi tii lufwa na yandi....

22, 24 Yandi fwaka...ebuna mwana na yandi **Pekaya** bikaka kuyinga yandi na kimfumu.... Yandi salaka masumu na meso ya Mfumu Nzambi kulanda mbandu ya mbi ya Yeroboami.

25, 28 **Peka** bakaka kimfumu...Yandi salaka masumu na meso ya Mfumu Nzambi na kulanda mbandu ya mbi ya Yeroboami 1 kubenda bantu kusamba biteki.

? Yula bana bakestio.

🏠 Bana sala bageste.

🗨 Bana yimba ti kina.

22.2 Na nlemvo ya Nzambi, bamfumu mingi yalaka kaka ntangu fioti. Mingi na bo yingaka tata na bo ve, kansi bo simbaka kimfumu ya kingolo-ngolo. [*Moniteur, songa diaka karte ya bamfumu ti tendula mambu yai.*]

📖 Tangila bana :

Mbandu ya bo ya yalalaka kaka ntangu fioti—
2 Bantotila 15 :8 ...**Zakaria** ...yalaka na bwala Samaria bangonda sambanu...

13 **Shalumi**...yalaka na bwala Samaria ngonda mosi kaka.

Mbandu ya bo ya simbaka kimfumu na kingolo-ngolo—

10 **Shalumi**...sosaka mpila ya kufwa Zakaria.
Yandi fwaka yandi na bwala...ebuna yandi
bakaka kimfumu na yandi.

14 **Menahemi**...kwendaka na bwala Samaria
sambu na kufwa Shalumi...ebuna yandi bakaka
kimfumu na yandi.

25.... Soda mosi ya Mfumu Pekaya zina ya
Peka...wakanaka na bantu 50. Bo fwaka
Pekaya na kati ya nzo ya kimfumu na Samaria,
ebuna Peka bakaka kimfumu na yandi.

30 Mfumu **Ozea** sosaka mpila ya kufwa ntotila
Peka. Yandi fwaka yandi, ebuna yandi bakaka
kimfumu na yandi.

? Yula bana bakestio.

🏠 Bana sala bageste.

👤 Bana yimba ti kina.

22.3 Nzambi tindilaka bamfumu yai baprofete bonso Amosi ti Profete Ozea, kansi bo waka ve.

📖 **Tangila bana :**

Amosi 1 :1 ...Profete Amosi vandaka na kisalu
ya kukeba mameme. Nzambi kwisaka
kumonika na yandi.

2 :6 Mfumu Nzambi tubaka nde : « Bantu ya
Israele me sala mbi mingi. Yo me lutana.
Mono ta pesa bo ndola. »

12 Kansi beno bantu ya Israele songaka
baprofete nde : ‘Benotuba ve ndinga ya
Nzambi.’

Ozea 1 :2...Nzambi songaka Profete Ozea nde,
“Kwela nkento ya ndumba. Buta ti yandi bana-
makangu. Yo ta songa nsoni ya bantu ya ntoto
yai, mpila bo me bikisa Mono Mfumu Nzambi
kukwenda kusamba banzambi ya nkaka, mpila
bo me kuma bonso nkento ya ndumba....”

13 :9 “Bantu ya Israele, imene na beno ! Zaba
nde Mono muntu ta fwa beno ! Ebuna nani
diaka lenda sadisa beno ? »

? Yula bana bakestio.

🏠 Bana sala bageste.

👤 Bana yimba ti kina.

22.4 Ndola yantikaka. Nzambi pesaka bambeni nzila kuyantika kukanga bo. Yai salamaka sambu bo waka ve baprofete Nzambi tindilaka bo.

📖 **Tangila bana : 2 Bantotila 15:19-20**

19-20 ...ntotila ya nene ya nsi ya Asiria kwisaka
kukota na ntoto ya Israele, ebuna Mfumu
Menahemi futisaka yandi mpaku ya arza.

29 ...Ntangu Peka vandaka ntotila ya Israele,
ntotila ya Asiria botulaka babwala ti ntoto.
Yandi kangaka bantu ti nataka bo na kimpika
na nsi ya Asiria.

? Yula bana bakestio.

🏠 Bana sala bageste.

👤 Bana yimba ti kina.

>|< **Kumanisa Malongi :**

Bamfumu ya Kimfumu ya Israele landaka kaka
kusamba biteki mpi kusala mbi. Ata Nzambi
tindilaka bo baprofete, bo waka ve ndinga ya
Nzambi. Yo yina, Nzambi kangulaka ndola na bo
yantikaka.

👤 **Devoir sambu na bakristo :**

Kana muntu ya Nzambi songa beto mbi na beto,
beto kuwa, beto balula ntima.

♥ **Verse ya Kulonguka :**

Bana tuba verse mbala 6 na nima ya nge, moniteur.
Konso mbala bo kuwa ‘vutuka’, bo sala geste
sambu na yo.

👤 **Nkunga ya kwenda nzila mosi ti leso :**

Kuwa Bansongidila

✝ **Invitation sambu na bo ya me yamba Yesu
ntete ve :**

Ndola ti lufwa ke kinga beto bantu ya masumu,
sambu beto me vila nzila ya Nzambi. Kansi Nzambi
zola beto. Yandi me pesa Mwana na Yandi Yesu
sambu na kubaka ndola na beto. Kana muntu
ndima Yandi bonso Mvulusi ti Mfumu, Nzambi ta
lolula yandi. Yandi ta kuma mwana ya Nzambi.

Kana ntangu lunga : Longa mikanda ya Bible

📖 Kana ntangu lunga, longa ndambu ya mikanda
ya Bible. Bangindu ke monika na page

NSUKA YA LESO 22



Leso 22

Mfumu Menahemi pesaka arza na mfumu ya nene ya nsi Asiria. Nzambi pesaka nzila nde bambeni kununga bantu ya Israele, sambu bo vandaka kusala kaka mbi ti kusamba kaka biteki.

Bika muntu ya mbi **kubika** nzila na yandi ya mbi. Bika muntu ya nku **kubika** mabanza na yandi ya nku. Bika bo **vutuka** na Mfumu Nzambi. Yandi ta wila bo mawa. Bika bo **vutuka** na Nzambi na beto. Yandi ke lembaka ve na kulolula. Yezaya 55 :7

Bamfumu ya Israele (norde) na Leso Yai :



Nani ?	Zina ya Mfumu ?	Kumaka mfumu nki mutindu ?	Yalaka ntangu ikwa ?
Zakaria	Yingaka tata		Bangonda 6
Shalumi	Simbaka kimfumu		Ngonda 1
Menahemi	Simbaka kimfumu		Bamvula 10
Pekaya	Yingaka tata		Bamvula 2
Peka	Simbaka kimfumu		Bamvula 20
Mfumu Ozea	Simbaka kimfumu		Bamvula 9

Kaka mbi, mbi, mbi

Leso 23. Kimfumu ya Israele zwaka ndola ti Nzambi panzaka bo. Ozea mfumu ya nsuka na bo.

2 Bantotila 17 :1-23

I. PREPARASIO SAMBU NA MONITEUR-

🎯 Kikuma ya Leso :

Bana ta bakisa nde Nzambi fweti pesa ndola na bo yina landa kaka masumu, kana bo buya ndinga na Yandi ya ke binga bo kubalula ntima. Yo yina, bo ta vanda nswalu kundima masumu na bo ti kuvutuka na nzila ya Nzambi.

♥ Verse ya Kulonguka :

Kana nge ke tula ntu-ngolo konso ntangu bo ke pesa nge ndongisila, kilumbu mosi, ndola ta simba nge nswalu. Mpila kuvutuka ta vanda ve. Bingana 29 :1

🗣️ Nkunga ya kwenda nzila mosi ti leso :

Kuwa Bansongidila ya Mbote
Vutuka, Afrika, Afrika !

II. REVISIO

↑ Kuyindula diaka baleso me luta :

Na nima ya Mfumu Salomo, kimfumu ya Israele kabanaka na bandambu zole:
Na norde nki kimfumu ? (Israele)
Bamfumu na bo nki mutindu ? (Kaka mbi.)

Na sude nki kimfumu ? (Yuda)
Bamfumu na bo nki mutindu ? (Ndambu mbote, ndambu mbi.)

III. KULONGA LESO YAI

➡ Kuyantika :

Beto me mona nde Nzambi yantikaka kupesa kimfumu ya norde, Israele, ndola. Keti bo ta balula ntima sambu Nzambi wila bo mawa ? To, keti bo ta landa kaka na nzila ya mbi na mpila nde Nzambi fweti pesa bo ndola mosi ya ngolo ? Beto ta mona na leso ya bubuyai.

🌟 Malongi ya nene ya leso yai (developpement) na banti ya malongi 4 :

23.1 Mfumu Ozea belaka na mvita ti Asiria. Yo yina, yandi fweti futa mpaku na mfumu ya Asiria.

📖 Tangila bana : 2 Bantotila 17 :1-3

1 Ozea kumaka mfumu ya Israele. Yandi yalaka bamvula 9 na bwala Samaria.

2 Yandi salaka masumu na meso ya Mfumu Nzambi...

3 Ntotila ya nene ya Asiria kwisaka kunwanisa yandi. Mfumu Ozea belaka, yo yina, yandi vandaka kufuta ntotila yina mpaku konso mvula.

? Yula bana bakestio.

🏠 Bana sala bageste.

🗣️ Bana yimba ti kina.

23.2 Mfumu Ozea mekaka kufwa mfumu ya Asiria sambu yandi basika na mpaku yina. Yo yina, mfumu ya Asiria tulaka yandi na boloko.

📖 Tangila bana : 2 Bantotila 17 :4

4 Kansi na nima, Mfumu Ozea sosaka mpila ya kufwa mfumu ya Asiria. Yandi mpi buyaka kufuta mpaku na yandi. Ntangu mfumu ya Asiria waka mpidina, yandi kangaka Ozea ti tulaka yandi na boloko.

? Yula bana bakestio.

🏠 Bana sala bageste.

🗣️ Bana yimba ti kina.

23.3 Mfumu ya Asiria ziungaka bwala Samaria bamvula 3. Na nima, yandi simbaka yo ti kumisaka bantu ya Israele bampika na yandi. Kimfumu ya Israele kufwaka bamvula 722 na ntwala ya Yesu.

📖 Tangila bana : 2 Bantotila 17 :5-6

5-6 ...Mfumu ya nene ya Asiria ti basoda na yandi kotaka na Israele. Yandi ziungaka bwala Samaria. Na nima ya bamvula 3, mfumu ya Asiria botulaka Mfumu Ozea ya Israele. Yandi nataka bantu ya Israele na kimpika na nsi na yandi...

? Yula bana bakestio.

🏠 Bana sala bageste.

🗣️ Bana yimba ti kina.

23.4 Ndola yai yonso salamaka sambu bo landaka kusala mbi mingi ti kusamba biteki. Bo waka baprofete ya Nzambi tindilaka bo mpi ve, kansi bo buyaka ndinga ya Nzambi.

Tangila bana :

7 Mambu yina kubwaka sambu bantu ya Israele salaka masumu na meso ya Mfumu Nzambi. Bo sambaka banzambi ya nkaka.

8-9 Bo landaka mpi bikalulu ya bantu ya Mfumu Nzambi kulaka na nsi yina na ntuala na bo...

13 Mfumu Nzambi tindaka baprofete na Yandi kusonga bantu ya Israele nde : « Bikisa banzila na beno ya mbi ti landa bansiku ya Mono... »

14-17 Kansi bo lemfukaka ve. Bo vandaka ntu-ngolo...Bo buyaka kulanda malongi na Yandi. Bo sambaka biteki ya mpamba. Bo mosi mpi kumaka bantu ya mpamba. Bo kwendaka na banganga-ngombo ti na banganga-nkisi...

18 Mfumu Nzambi wilaka bantu ya Israele makasi. Yandi tulaka bo ntama na meso na Yandi. Bantu ya dikanda ya Yuda mpamba bantu bikalala.

? Yula bana bakestio.

🏠 Bana sala bageste.

👑 Bana yimba ti kina.

>|< Kumanisa Malongi :

Bamvula mingi, bamfumu ya Kimfumu ya Israele me twadisa na mpila ya mbi. Bo yonso, kaka mbi, mbi, mbi. Na mawa na Yandi, Nzambi me tindila bo baprofete-- Elia, Elisa, baprofete ya nene. Yandi me tindila bo baprofete ya sonikaka malongi na bo, bonso Amosi, Profete Ozea, ti Mishee. Malongi na bo me kuma parti ya Bible na beto. Baprofete yai yonso bingaka bo kuvutuka na Nzambi, kansi bo buyaka diaka ti diaka. Na nsuka, Nzambi kangulaka nzila nde mbeni mosi kwisa kununga bo, kumanisa Kimfumu ya Israele. Na ndola ya Nzambi, bo kumaka bampika na nsi ya Asiria. Kaka Kimfumu ya Yuda na sude vandaka kubikala, sambu ndambu ya bamfumu na bo vandaka mbote.

Devoir sambu na bakristo :

Beto bakristo, yindula. Kana muntu ya Nzambi songa nge nde nge me sala mbi, nge sala nki ? Kana nge kuwa ndinga ya Bible, ti yo songa nge nde mambu nge me sala kele mbote ve, nge ta sala nki ? Keti nge ta balula ntima ti kuvutuka na Nzambi ? Keti nge ta lomba pardo ti bika mambu yina ya mbi ? Yai kele mpila Nzambi zola beto kusala. Yandi fweti pesa ndola na bantu ya landa nzila na Yandi ve, kansi Yandi ta lolula bo yina balula ntima ti bika masumu na bo.

Verse ya Kulonguka :

Bana tuba verse fraze na fraze na nima ya nge, moniteur, mbala 2. Na nima, bo yika bageste ti tu ba yo mbala 2 diaka. Na nima na yo, kana mwana mosi lenda tuba yo mbote yandi mosi, yandi simba Bible na nge kutuba yo.

Nkunga ya kwenda nzila mosi ti leso :

Kuwa Bansongidila ya Mbote
Vutuka, Afrika, Afrika !

Invitation sambu na bo ya me yamba Yesu ntete ve :

Nki mutindu Nzambi lenda lolula bantu ya me sala mbi ? Yandi lenda lolula bo sambu Mwana na Yandi Yesu Kristo pesaka menga na Yandi bonso makabu. Makabu yina futaka mfuka ya masumu na beto yonso. Yandi lenda lolula beto bantu ya mbi sambu Mwana na Yandi Yesu Kristo fwaka na sika na beto ti telamaka na lufwa.

Yandi ke lomba kaka nde nge balula ntima, kwikila ndinga na Yandi nde nge kele nkwa-masumu. Yai zola tuba nde nge ke na ntima kubika nzila ya masumu ti kulanda Yesu. Mpidina Nzambi ta pesa nge ntima ya mpa ya zola bansiku na Yandi. Yandi ta lolula nge. Kaka Yesu lenda sala mambu yina. Kwisa na Yandi bubuyai.

Kana ntangu lunga : Longa mikanda ya Bible

 Kana ntangu lunga, longa ndambu ya mikanda ya Bible. Bangindu ke monika na page



Leso 23

Nzambi pesaka
Israele ndola
sambu bo
landaka na nzila
ya mbi ti bo
balulaka ntima
ve. Mfumu ya
nsi Asiria
nungaka bo.
Yandi fwaka
bwala Samaria ti
kumisaka bantu
ya Israele
bampika na
yandi.

**Kana nge ke tula ntu-ngolo
konso ntangu bo ke pesa nge
ndongisila,
kilumbu mosi, ndola ta simba
nge nswalu. Mpila kuvutuka ta
vanda ve.**

Bingana 29 :1

Leso 24. Kimfumu ya Kukabana--Revisio

Nsaka—Sola na kati ya bantu zole

[Moniteur, nge lenda kaka tuba bazina ya bantu, to nge lenda sonika zina na kitini ya papier. Kana na papier, pesa kitini na mwana, yandi telama na ntwala ya classe kutanga kestio.]

Nani tulaka biteki na norde ti na sude, ebuna yandi twadisaka bamfumu yonso na nima kusala masumu kusamba yo ?
Yeroboami to Roboami ? (Yeroboami.)

Nani tubaka na bantu na mpila ya ngolo, ebuna kimfumu kabanaka?

Salomo to Roboami ? (Roboami.)

Nani bingaka Nzambi na ntangu ya mvita, kansi bingaka Yandi ve lumbu na lumbu ?

Abiya to Yeroboami ? (Abiya)

Nani Mfumu ya Israele ya kuluta mbi, nkento na yandi Yezebele mpi kuluta mbi ?

Akabi to Shalumi ? (Akabi)

Nani Mfumu ya Yuda tindaka balongi kulonga ndinga ya Nzambi ?

Akabi to Yozafati ? (Yozafati)

Nani profete ya Nzambi tesaka baprofete ya kiteki Baale, ebuna Nzambi tindaka tiya na makabu na yandi ?

Mishe to Elia ? (Elia)

Nani profete ya Nzambi songaka yandi kukwela nkento ya ndumba ?

Profete Ozea to Elia ? (Ozea)

Nani nkento ya mfumu yumaka ntima sambu na kilanga ya vinu ya Naboti ?

Yezebele to Atalia ? (Yezebele)

Nani profete bakaka sika ya Elia na nima Nzambi me baka yandi na zulu ?

Elisa to Yonasi ? (Elisa)

Nani profete samunaka na bambeni ya Israele na bwala Ninive, ebuna bantu kuna balulaka ntima ?

Elisa to Yonasi ? (Yonasi)

Nani mfumu yalaka kaka ngonda mosi ?

Shalumi to Akabi ? (Shalumi)

Nani mfumu ya nsuka ya Kimfumu ya Israele ?

Mfumu Ozea to Mfumu Yeroboami ? (Mfumu Ozea)

Mfumu ya nki nsi nungaka Kimfumu ya Israele ti kumisaka bo bampika na yandi ?

Chine to Asiria ? (Asiria)

Bamfumu ya nki Kimfumu vandaka kaka mbi yonso ?

Israele to Yuda ? (Israele)

Eksplikasio—Mikanda ya Histoire ya Israele na Ntoto Nzambi Pesaka Bo

[Moniteur, kana bana to bantu ya nkaka kele kulunga ya zaba kutanga mbote, konso muntu lenda tanga paragrafe mosi. Kana ve, bantu zole lenda sala yo na tour—muntu mosi tanga paragrafe mosi, muntu ya zole paragrafe ya ke landa, muntu ya ntete paragrafe ya nkaka, etc. Na nsuka ya konso paragraphe, bana tuba zina ya mukanda yina mbala 3. Mbandu : Mukanda ya-- Kubasika ! Kubasika ! Kubasika !]

Bampika na Ezipte—Mukanda ya Kubasika

Ntangu bantu ya Israele vandaka bampika na Ezipte, Yandi kumisaka bo mingi. Bo kumaka dikanda ya nene. Yandi twadisaka bo kubasika na Ezipte. Moize twadisaka bo, ti Nzambi pesaka yandi bansiku na Yandi. Nki mukanda ya Bible ?

[Bana : Mukanda ya Kubasika ! Kubasika ! Kubasika !]

Kukota nsi Nzambi me sila bo—Mukanda ya Yozue

Nzambi silaka bantu ya Israele nde Yandi ta pesa bo nsi na bo mosi. Yandi twadisaka bo na nsi ya Kanana. Bantu kuna me sala mbi mingi, yo yina Nzambi zolaka kula bo. Yandi sadilaka bantu ya Israele kusala yo. Yozue twadisaka bo, ebuna bo nungaka bantu ya Kanana. Kansi yonso ve. Ndambu bantu ya Kanana bikalaka, ti biteki na bo mpi bikalaka. Nzambi songaka Israele nde kana bo ta landa bansiku na Yandi, Yandi ta sakumuna bo. Nki mukanda ya Bible ?

Bana : Yozue ! Yozue ! Yozue !

Bazuze yala, konso muntu sala na mpila na yandi—Mukanda ya Bazuze

Na nima ya Yozue, bambeni vandaka kuyangisa bantu ya Israele mbala na mbala. Nzambi bingaka bazuzi kutwadisa bo mpi kukula bambeni na bo. Biteki ya me bikala na ntoto vandaka kubenda bo konso ntangu kubika nzila ya Nzambi. Beto tanga yo na nki mukanda ya Bible ?

Bana : Bazuze ! Bazuze ! Bazuze !

Bamfumu kuyala bo—Mikanda ya 1 & 2 Samuele

Nzambi Yandi mosi zolaka kuyala bantu ya Israele, kansi bo zolaka muntu kuvanda ntotila to mfumu. Bo zolaka kuvanda bonso bansi ya nkaka. Nzambi vandaka na yo kiesa ve. Kansi Yandi kangulaka nzila nde bo vanda na mfumu. Mfumu ya ntete vandaka Saule. Yandi yantikaka mbote, kansi yandi salaka mbi na nima. Nzambi kulaka yandi ti tulaka Davidi mfumu. Davidi sosaka Nzambi na ntima yonso ti ndimaka nswalu kana yandi me sala mbi.

Mwana ya Davidi Salomo yingaka yandi. Yandi lombaka Nzambi mayele kuyala mbote. Ebuna Nzambi kumisaka yandi mayele, mvwama ti lukumu. Kansi yandi landaka nsiku ya Nzambi ve na mambu ya bankento. Bu yandi nunaka, bo bendaka yandi kusamba biteki. Nki mikanda ya Bible ?

Bana : 1 ti 2 Samuele ! 1 ti 2 Samuele ! 1 ti 2 Samuele !

Salomo Mfumu ya Nene. Na nima na yandi, Kimfumu kabanaka—Mukanda ya 1 Bantotila

Mwana ya Salomo Roboami yingaka yandi. Bantu lombaka yandi kusadisa bo, kansi yandi landaka conseye ya mbi. Na bilumbu na yandi, kimfumu kabanaka. Na kati ya batribu 12, kumi na norde kwendaka na Mfumu Yeroboami. Bo kumaka Kimfumu ya Israele. Kaka zole na sude kangamaka na Roboami. Bo kumaka Kimfumu ya Yuda. Nki mukanda ya Bible ?

Bana : 1 Bantotila ! 1 Bantotila ! 1 Bantotila !

Kimfumu ya Kukabana—Mikanda ya 2 Bantotila ti 2 Bansangu

Na baleso yai, beto me landa bamfumu ya Israele na norde, ti ya bamfumu ya Yuda na sude, na Kimfumu ya Kukabana. Bamfumu yonso ya Kimfumu ya Israele, kaka mbi, mbi, mbi. Na luyantiku, Yeroboami tulaka biteki na babwala zole, sambu bantu vanda ve na mabanza kukwenda na Yeruzalemi, sambu na kusamba na temple of Nzambi. Na mpila yina, yandi twadisaka Israele kusala masumu. Bo yonso landaka mbandu na yandi.

Nzambi tindilaka bo baprofete kubinga bo kuvutuka na Yandi, kansi bo waka ve ata fioti. Na nsuka, na bilumbu ya Mfumu Ozea, Nzambi pesaka bo ndola. Yandi kangulaka nzila nde bambeni kubaka kapital na bo, bwala Samaria, ti kumisa bo bampika na nsi ya Asiria. Bo buyaka kuwa Nzambi. Ebuna ntangu yina, Kimfumu ya Israele fwaka. Date bamvula 722 na ntuala ya Yesu. Kaka Kimfumu ya Yuda vandaka kubikala. Nki mikanda ya Bible ?

Bana : 2 Bantotila ti 2 Bansangu ! 2 Bantotila ti 2 Bansangu ! 2 Bantotila ti 2 Bansangu !

Yai ke songa nki ? (Kubinga bana na Yesu)

Na yai yonso, Nzambi ke songa beto nde beto kele banka-masumu. Beto kwenda nswalu kubika nzila na Yandi. Bantu me sala yo diaka ti diaka. Beto kele na mfunu ya Mvulusi sambu na kuvutula beto na nzila ya Nzambi.

Nzambi silaka kupesa bantu ya Israele mambu zole—Mosi, ntoto, ti ya zole, Mvulusi. Ntoto vandaka sambu na bo, Israele, kansi Mvulusi kele sambu na beto yonso.

Na nima ya ntangu, Nzambi sadilaka mwana-nkento mosi na kati na bo kubuta Mvulusi Yesu Kristo. Kansi Yesu kwisaka ve

kaka sambu na dikanda mosi. Yandi bakaka masumu ya beto yonso na zulu na kulunsi. Yandi silaka moyo mvu ya mvu na bantu ya makanda yonso, konso muntu yina ta ndima Yandi.

Keti nge me ndima Yandi ? Kana ve, nki ntangu nge ta balula ntima ? Bubuyai ? Zaba nde, konso mposo na nima ya ecodim, beto kele awa, sambu na kusadisa konso mwana ya zola balula ntima. Bo ke yambaka Yesu kaka mbala mosi. Kana nge me yamba Yandi ntete ve, mbote kuzenga mambu yina bubuyai.

NSUKA YA REVISIO

MIKANDA YA BIBLE—Bangindu ya Kulonga Yo :

Mikanda ya histoire, histoire, histoire,
 Mikanda ya histoire—Histoire ya Bayuda !
 Yozue, Bazuzi, ye Ruti, ti BaSamuele,
 Ye Bantotila, Basangu, ye Esdrasi
 Nehemia, ye Estere, Mfumu-Nkento
 Yai yonso kumi na zole mikanda ya histoire.

Mikanda ya baprofete ya tubaka mingi
 Mikanda ya baprofete ya tubaka mingi
 Yezaya, Yeremia, ye mukanda ya mawa
 Ezekiele ti Daniele, kwikama na Nzambi.

Mikanda ya baprofete ya tubaka kaka fioti
 Mikanda ya baprofete ya tubaka fioti.
 Osée, Yoele, Amosi, Abdiasi,
 Yonasi, Mishé, Nahumi, Habakuki, Sofonia,
 Agai, Zakaria, ye Malashi.

**1 ti 2 Bantotila, 1 ti 2 Bansangu—
Nki Luswaswanu ?**

Mikanda ya 1 ti 2 Bantotila landa histoire ya Israele
 na nima ya 1 ti 2 Samuele. Bantotila mingi yalaka
 na ntangu yina. Yo yina, bo bingaka yo mikanda ya
 Bantotila.

Bana tuba mikanda ya histoire kuyantika na Yozue
 ti kusuka na 2 Bantotila :

Yozue, Bazuzi, Ruti, 1 ti 2 Samuele, 1 ti 2 Bantotila.

Na nima, nge sola mwana mosi, ti yandi fweti tuba
 mukanda mosi na kati ya liste yina. Yandi mpi sola
 mwana ya nkaka, ti mwana yina fweti tuba zina ya
 mukanda ya ke landa yo.

Mikanda ya 1 ti 2 Bansangu ke tuba diaka mambu
 mingi ya kele na kati ya 1 ti 2 Bantotila. (Yo kele
 revisio.) Kansi bo sonikaka yo bamvula mingi na
 nima ya mikanda ya 1 ti 2 Bantotila. Bo sonikaka yo
 na ntangu ya bo me mona mpasi mingi, ti bo zolaka
 kubambuka diaka mambu yonso ya mbote ya
 Nzambi me sala sambu na bo.

Profete Yonasi

Profete Yonasi tubaka ndinga ya Nzambi na ntangu
 ya bamfumu vandaka kuyala Israele. Kansi Nzambi
 tindaka yandi na Israele ve. Nzambi tindaka yandi
 na bantu ya zingaka ntama ti yandi—bantu ya
 Kimfumu ya nene Asiria. Bantu yai vandaka
 bambeni ya bantu ya Yonasi. Bo me vilaka nzila ya

Nzambi mingi. Bo me sala mbi mingi na meso ya
 Nzambi.

Kansi Nzambi zola bantu yonso. Yandi zola ve nde
 bantu kuvila, kansi Yandi zola nde bo balula ntima.
 Yo yina, Nzambi tindaka Yonasi kusamuna na
 bambeni ya bantu na yandi. Yo kele mukanda ya
 fioti (kaka bakapu 4), kansi yo ke longa beto lesa ya
 nene : Nzambi zola bantu ya bansi yonso ti
 makanda yonso, ti Yandi ta lolula bo kana bo balula
 ntima.

Profete Ozea

Nzambi songaka Ozea kusala mambu ya kele
 normal ve—kukwela nkento ya ndumba. Mpila
 nkento ya Ozea vandaka kwikama ve songaka mpila
 bantu ya Israele vandaka kwikama ve na Nzambi.
 Mpila bakala kele kiese ve kana nkento na yandi ke
 kwikama ve na makwela, kiteso mosi Nzambi
 vandaka na kiese ve na bo.

Profete Amosi

Profete Amosi vandaka na kisalu ya kukeba
 mameme. Yandi vandaka mvungi, kansi Nzambi
 bingaka yandi kusonga bantu ya Israele masumu na
 bo. Amosi lemfukaka, kansi bantu songaka yandi
 nde yandi kutubila bo ve ndinga ya Nzambi.

Bana tuba mikanda ya baprofete kuyantika na Osée
 ti kusuka na Yonasi. Meka kutuba yo na mpila
 ritimika :

Osée, Yoele, Amosi, Abdiasi, Yonasi.

Na nima, bana tuba yo na nzila ya 'shene'. Mwana
 mosi tuba mukanda ya ntete Osée, ya zole landa na
 Yoele, ya tatu na Amosi, etc. Sala yo mbala iya.

BANKUNGA SAMBU NA BALESO YAI :

NB: Kana nkunga kele na kidimbu na ntwala na yo, yo songa nde nge lenda kuwa yo na YouTube, kanal ECM Congo to na site ya MCE, www.ecodimafrique.com.

BANA YA FIOTI YONSO

Bana ya fioti yonso ya kwikila na Yesu
Lenda kukota zulu na nzila na Yandi
Sambu kana mwana ndima
Yesu na ntima na yandi
Mwana yina me kuma
Mukwikidi na Yesu !

BANSIKU KUMI KULANDA

Nzambi kupesaka
Bansiku kumi (3x)
Ya beto fweti kulanda.

Ntete, kusamba kaka Yandi, Nzambi (3x)
Nsiku ya ntete kulanda

Ya zole, sala biteki
Ve, Ve, Ve ! (3x)
Nsiku ya zole kulanda

Ya tatu, zitisa zina ya Nzambi (3x)
Nsiku ya tatu kulanda

Ya iya, zitisa kilumbu kupema (3x)
Nsiku ya iya kulanda

Ya tanu, zitisa tata ti mama (3x)
Nsiku ya tanu kulanda

Sambanu, Kufwa muntu
Ve, ve, ve ! (3x)
Nsiku ya sambanu kulanda

Nswambadi, Kusala bizumba ve (3x)
Nsiku ya nswambwadi kulanda

Ya nana, kuyiba ve mpangi na nge (3x)
Nsiku ya nana kulanda

Ya uvwa, kutuba luvunu ve (3x)
Nsiku ya uvwa kulanda

Ya kumi, yuma ntima ve
Na bima ya mpangi (3x)
Nsiku ya kumi kulanda !

BANZAMBI YA NKAKA

Banzaaa-mbi ya nkaka
Bantu me sala yo
Nge kaka ke Nzambi

Ya salaka beto !
Ya salaka beto ! (O Yesu) Repete

BENDA BAMPANGI YA NKAKA (Mono Kele na Nzo Kitoko)

Benda bampangi ya nkaka
Beno kwisa !
Benda bampangi ya nkaka
Beno kwisa !
Benda bampangi ya nkaka
Beno kwisa !
Kwisa na Yesu ! (O Nzambi)

Mvutu:

Mfumu, O Mfumu, mono ta tonda Nge
(O Nzambi)
Mfumu, O Mfumu, mono ta tonda Nge
(O Nzambi)
Mfumu, O Mfumu, mono ta tonda Nge
Kuna na zulu !

BETO BAKRISTO, SADISANA

Beto bakristo sadisana
Beto bakristo sadisana
Beto bakristo sadisana
Yo kele mbote.

Ee, MFUMU, Ee

Ee, Mfumu, ee
Na yonso ya Nge tuba
Ee, Mfumu, ee
Mono zola lemfuka

Mvutu :

Bu mo' tanga Bibila
Mono kaka ta ndima
Ye mono ta tuba ee,
Mfumu, ee !

KANA BENO KE ZOLAKA MONO (Yoane 14 :15)

Kana beno ke zolaka Mono (3x)
Beno ta lemfuka.(3x)
Beno ata lemfuka.

Kana beno ke zolaka Mono (3x)
Beno ta landaka bansiku na Mono (3x)
Beno ata lemfuka.

KANA NGE ME VULUSWA

Kana nge me vuluswa XX
 Tubila bampangi XX
 Nsangu X XX Ya Yesu X XX

Kana nge me vuluswa XX
 Tubila bampangi XX
 'Buna bo ta zaba Yesu mpi.

KUDIKULUMUSA NA MESO YA NZAMBI

Kudikulumusa na meso ya Nzambi
 (Kudikulumusa na meso ya Nzambi)
 Kudikulumusa na meso ya Nzambi
 (Kudikulumusa na meso ya Nzambi)

Ye Yandi ta nangula nge (Lumbu na lumu)
 Ye Yandi ta nangula nge !

KUMISA NZAMBI

(Ton : Kumbaya)
 Kumisa Nzambi na kiese (3x)
 Aleluya ! Na kiese !

KUSALA MBOTE NA KIMVUKA

Nge sadisa mono
 Mono, mpi, sadisa nge
 Kusala mbote na kimvuka
 Ke sadisa beto yonso !

◀ KUWA BANDONGISILA

Kuwa bansongidila }
 Ya mbote. 3X
 Bansongidila ya kinzambi.

Kuwa bansongidila }
 Ya mpamba-mpamba ve. } 3X
 Ya bantu kele kusonga nge.
 (Yimba Verse ya ntete diaka ti suka na yo.)

KUWA BIBLE

Kuwa Bible
 Tanga Bible
 'Buna Nge
 Ta mona
 Nzila mbote mingi
 Nzila mbote mingi
 Ye ngangu
 Ye ngangu

KWENDA NORDE, KWENDA SUDE

Kwenda norde
 Kwenda sude
 Kwenda na gauche et droite

Beto kwenda
 Beto kwenda
 Na nsangu ya mbote

Na bandombe
 Na mindele
 Na makanda yonso
 Beto kwenda
 Beto kwenda
 Na nsangu ya Yesu.

◀ LOMBA NA NZAMBI KAKA

(Ton : Yesu Ke Zola Mono)
 Beto fweti lombila
 Na Nzambi, Yandi kaka
 Ata muntu mosi ve
 Ya nkaka lenda sadisa !

MVUTU :

Lomba na Nzambi !
 Na Nzambi kaka
 Lomba na Nzambi
 Na zina ya Yesu !

MAWA, MAWA

Mawa, mawa, kuvanda mwana-Satana
 (repeter)
 O, walewale, O, walewale-e !
 Kiese, kiese, kuvanda mwana ya Nzambi
 (repeter)
 O, wale-e, O, wale-e !

MASUMU NA MONO ME KWENDA

Ma-su-mu na mono me kwenda
 Yesu me katula yo, Aleluya !
 Yandi mene vila yo
 Yo ikele diaka ve
 Mono me kuguluka
 Kiese! Masumu
 Yo-nso me kwen-da !

MAWA, MAWA

Mawa, mawa, kuvanda mwana-Satana
 (repete)
 Kiese, kiese, kuvanda mwana ya Nzambi
 (repete)
 O, wale-e, O, wale-e !

MAZONO, BUBU, MVU YA MVU

Mazono, bubu mvu ya mvu,
 Yesu mutindu mosi !

Bantu yonso kulenda change,
kansi Yesu ve.
Nkembo kwa yandi ! Nkembo kwa Yandi !
Bantu yonso kulenda change,
kansi Yesu ve.

🔊 MFUMU ZABA NZILA NA MONO

Mfumu zaba nzila na mono
Mono fweti landa kaka
Mfumu zaba nzila na mono
Mono fweti landa kaka

Ngolo bubu Yandi ta pesa
Ye yonso ya mfunu mbasi
Mfumu zaba nzila na mono
Mono fweti landa kaka !

🔊 MONO KELE NA NZO KITOKO

Mono kele na nzo kitoko
Kuna n'zulu !
Mono kele na nzo kitoko
Kuna n'zulu !
Mono kele na nzo kitoko
Kuna n'zulu !
Kuna na zulu ! (O Nzambi !)

Mvutu:

Mfumu, O Mfumu, mono ta tonda Nge
(O Nzambi)
Mfumu, O Mfumu, mono ta tonda Nge
(O Nzambi)
Mfumu, O Mfumu, mono ta tonda Nge
Kuna na zulu !

Benda bampangi ya nkaka
Beno kwisa !
Benda bampangi ya nkaka
Beno kwisa !
Benda bampangi ya nkaka
Beno kwisa !
Kwisa na Yesu ! (O Nzambi)

MONO ME SILA KULANDA YESU

Mono me sila kulanda Yesu (3X)
Kuvutuka, yo lunga ve.

Ata mono mosi (3X)
Ee, mono ta landa
Kuvutuka, yo lunga ve.

MONO TA MONA KIESE

Mono ta mona kiese (3x)
Na yonso Nzambi me pesa

Mo' ta yuma ntima ve (3x)
Na bima ya bantu ya nkaka.

Mo' ta yuma ntima ve (3x)
Na sika ya bantu ya nkaka

Nzambi na mono zaba (3x)
Nki mo' ke na yo mfunu.

Nzambi na mono zaba (3x)
Nki kele mbote na mono.

🔊 MO' TA KWISA NA NZAMBI NA LULENDO VE

Mo' ta kwisa na Nzambi na lulendo ve
Mo' ta kwisa na lulendo ve
Mo' ta kudikulumusa na ntwala n'Yandi
Mo' ta kwisa na lulendo ve.

Mvutu :

Sambu Yandi kele Nzambi
Mo' ke Nzambi ve.
Kele Yandi me salaka mono !

NANI KELE NGOLO ?

Nani kele ngolo ?
Nzambi ikele ngolo
Kuluta bantu yonso.

NZAMBI IKELE NENE

Nzambi ikele nene
Yandi yala na zulu
Yandi ke ngolo yonso
Nzambi ikele nene !
Nzambi ikele nene !

Nzambi na mono ta pesa
Bima yonso ya kele ya mfunu,
Yandi ta tula bawanzio na lweka
Na lweka na kukeba mono (Na lwee-ka)
Na lweka na kukeba mono !

🔊 NZAMBI KUWA NA SUKA

Nzambi na mono ta kuwa
Konso ntangu mono samba
Ata n' suka, Ata mpimpa,
Nzambi ata kuwa !

Mvutu --

Nzambi kuwa na-a su-uka
Nzambi kuwa na mi-idi
Nzambi kuwa na nkokila
Konso ntangu beto samba !

NZAMBI TA KUWA NGE

Nzambi ta kuwa nge (3X)
Na zina ya Yesu !

Yandi ta sadisa (3X)
Na zina ya Yesu !

Zitisa Yandi ! (3X)
Na zina ya Yesu !

Matondo na Nzambi (3X)
Na zina ya Yesu !

🔊 **O, BIBLE KELE KIELEKA**

O, Bible kele kieleka, kieleka, kieleka,
O, Bible kele kieleka
Yo ke luvunu ve !

O, Bible kele kitoko, kitoko, kitoko,
O, Bible kele kitoko
Mo' zola yo mingi !

O LULENDO YAMBULA (O Luvunu Yambula)

O lulendo, o lulendo, o lulendo yambula !
(O lulendo) (yimba diaka) Repete

SOSA NTETE

Sosa ntete Kimfumu ya Zulu,
Ye lunungu na Yandi
Bima yonso Yandi ta yika na nge !
Alelu, Aleluya !

Muntu kuzinga ve na madia kaka
Kansi na ndinga Nzambi !
Sosa ntete mambu ya kele mfunu
Alelu, Aleluya !

VUTUKA, AFRIKA! VUTUKA !

Vutuka, Afrika ! Vutuka !
Vutuka na Nzambi nge me vila
Beto bika bampeve yonso, biteki yonso,
Beto vutuka n'andi ya salaka beto !
Beto vutuka n'andi ya salaka beto !

🔊 **YEZAYA 53 :6**

Beto yonso, beto vandaka
kuyungana bonso mameme,

Konso muntu na nzila na yandi,
Mawa na beto !

Ebuna Mfumu Nzambi tulaka
Mbi na beto yonso na zulu
na ntu na Yandi, Yandi Mesia
Kiese na beto ! (wa-la-la-la !)
Kiese na beto

Linya ya Ntangu sambu
na revisio

Mikanda ya 1 & 2 Bantotila, 2 Bansangu, Yonasi, Ozea ti Amosi ...



Kinifumu ya Israele (Nord)

Bamfumu yonso kaka mbi

Kukabana Kinifumu ya Yuda (Sud)

Bamfumu ndambu mbote, ndambu mbi



Bamvula 930 ti na 722 na ntuala ya Yesu